

Indhadeed
Ku aaway?

ISMAACIIL C UBAX

Copyright © 2015 Ismaaciil C Ubax
www.ismaaciilubax.com
info@ismaaciilubax.com
All rights reserved.
ISBN: 978-91-88133-39-7
Qaabaynta jaldiga:



Musawi Abdallah
CEO, Co-Founder
penlayout@gmail.com

MAHADNAQ

Macbuudkaa mahad leh.

TUSMADA BUUGGA

Hordhac i

1	Magacaa?	1
2	Bulsho	18
3	Aabbo	28
4	Indhadeeq	42
5	Waan ku soo jeclaanayaa	60
6	Waan ku jecelahay	113
7	Mudane madaxweyne!	123
8	Nabadgelyo	154
9	Ma kaa dhab baa?	179

HORDHAC

Waxa aynu rabno iyo waxa aynu u baahan nahay ma is tagaan? Inta badan maya. Buuggan waxa aynu ka dheehan doonnaa labadaas baahiyood ee kala duwan, marka ay midoobaan qaabka ay nolosha u yeelaan, marka ay kala ahaadaanna sida ay noloshu noqoto.

Waa hal qiso oo ku saabsan Faysal Keynaan iyo Indhadeeq Cali. Waxa aynu dhex tegi doonnaa xafiiska dalka looga taliyo iyo qalbiga u taliya cidda u talisa.

Akhris wacan!

1 MAGACAA?

Xubnahayga ayaa ka wahsanaya in ay dhaqaaq sameeyaan. Walow aan si fiican u seexday xalay, haddana naftu in ay kacdo ma rabto. Codka hooyo ayaa daaqadda dhinaceeda kale ka yeedhaya. Iftiinka daaqadaha ka soo gelaya ayaa ka markhaati kacaya in aanay subax hore ahayn. Sidaas oo ay tahay haddana dhanna u ma socdo. Walow ay tahay in aan ka qaybgalo shirka aan maanta tegayo, haddana ma rabo in aan jiiifka ka kaco. Jidhku dhaqaaqa wuu diidayaa. Sababtu lababa mid way noqon kartaa: in aan jiiifka jeclaysanayo iyo in aan iyada diidayo in aan ka tago. Sababtuna tan dambe ayay u badan tahay. I ma ag joogto iga mana dheera. Telefoon laba usbuuc kahor hadyad la'iigu keenay ayaan gacanta bidix ku hayaa. Gacanta midigna korkiisa ayay salaaxaysaa. Indhahayguna wejigeeda ayay daawanayaan. Sawirradeeda ayaan kolba mid eegayaa. Naftaydu waxa ay isku qancisay in ay aniga i eegayso. Is ma naqaanno, goor annu Facebook-ga ku midownayna ma garanayo. Maalin dhoweyd ayuu magaceedu i soo jiiyay. In yar kaddibna waxa aan ogaaday in aanay bilicdu magaca oo keli ah ku koobnayn. Waan ku

xasilay muuqeeda. Waan isa siiyey. Baadhitaan ayaan sameeyey aan ku ogaaday in aannu isku magaalo nahay. Caasimadda Dalsan ayaa hoy noo ah. Maalintaa ayaan gujo hawada u mariyay. Maalin kaddib ayay igu soo celisay. Qiyaastii waxa ay is lahayd “kanna muxuu kaa rabaa?”. Hoos ayaan u idhi “quruxdaada iyo adiguba isa soo raaca”. Saacadda iyo jawaab-celinteeda ayaa hal mar toddobada subaxnimo ku wada istaagay. Maan sugin, nin aan hadlan la ma ammaanayn. Waan u celiyey markiiba. Iyaduna ma ay sugin, markan qoraal ayay jawaab iiga dhigtay. Qoraal illaa maanta qalbigayga ku xardhan. “Walaal maad gujada iga daysid jidhkii baa i xanuunee”. Halkaas ayaa la’iga raacay. Ma garanayo sababta, habka ay u soo qortay ayaa iiga dhignaa in ay hortayda ka tidhi oo kale. Waan codeeyey, laxan ayaan saaray. Haddii ay hortayda ka odhan lahayd, sidii aan dareemi lahaa oo wax lagu daray, ayaan ka dhigtay. Waan iska qoslay. Labada suul ayaan shaashadda isugu geeyey si ay jawaab degdeg ah u daabacaan. “Walaal waan ku daandaansanayee iga raalli ahow” ayaan isugu hagaajiyay. Oodda ayay iga qaadday, illaa daaradda ayaan socday. Nin ay wax isugu beegbeegmeen ayaan noqday. Dabcan maan dayicin. Hoos ayaan u raxlaynayey. Indhadeeq

ayaad qoraal is weydaarsan doontaan, meesha maan soo dhigan. Waxay ka mid ahayd waxyaabaha aan macquulka ahayn ee Ilaahayna laga la xishoodo weydiintooda.

Horto gaajo aan la soo kacay markii ayaa iigu dambaysay. Baahi ka weyn ayay qaboojisay. Qoraal kasta oo dhankeeda iga soo gaadha, shan is hoos yaalla ayaan isu raaciyaa markayga. "Yaan lagaa dareemin" ayaan is leeyahay, haddana qoraal ayaan ugu meydhay. Qof aad imika uun is baranaysaan bal maxaad weydiin? "Reerkii ka warran?" ma odhan kartid. Su'aalo badanna loo ma baahna. Waa barta rag ku kala hadho. Waa jidka siraaad ee is-barashada. In aan ka gudbay ayay u badan tahay. Waan ku qasbanahay. Jid kale ayaan jirin. Aniga oo aan keligeys guusha isa siin, aan idhaahdo iyada ayaa ii naxariisatay. Waa dabeecad ka mid ah kuwo badan oo qalbigayga xerooyin waaweyn ka oodan doona. Way i la daaddihsay. Daqiiqaddaas la joogay, farxadda adduunka qaybiyaheeda ayaan ahaa. Haddii aan da'deeda qiyaaso, labaatan maan dhaafiyeen. Haddana muuqaalkeedu ma uu ahayn mid ay kala siman tahay qayrkeed. Qof da'deeda ka weyn ayay u eekayd. Qalad ha ii fahmin, da'dii tirada ahayd u ma jeedo. Wejigeeda ay qaybtiisa weyn

indhahedu buuxiyeen, sunniyaha midba gees ka daaddegay, labada dhaban ee keligeed u gaarka ah, debnaha aan qaabkoodu lumayn marka ay dhoolla-caddayso iyo gadhkeedan hoos u dheer ayaa muuqaal aanan macnihiisa weli fahmin bixinayay. Qof yar oo haddana wejigeeda mudakarnimo ku xardhan tahay. Sawirka noocaas ah ee aan muuqaalkeeda koowaad ka helay ayaa ahaa mid sidiisa iigu rumoobayay kolba inta aan ka barto dabeecaddeeda. "Maxaad qabanaysaa?" ayaan weydiiyey. "Xinne ayaa la ii marinayaa" ayay jawaab ii soo qortay. Waxa kale oo ay ii sheegtay in ay u socoto meel muhiim ah, waanay i macasalaamaysay. Aniga oo ku qasban ayaan telefoonka hoos u dhigay si aan haddana kor ula soo boodo mar kale. Farriimihii aan is weydaarsannay ayaan dib u akhriyey. Debnahayga oo kala jiidan ayaan si aayar ah u akhriyayey qayb kasta. Dareenka dushayda hadheeyey ayaan diidayey in aan xadhigiisa jaro. In uu codka hooyo iga saari doono xaaladda aan ku jiro maan fileyn.

- Waar hooyo miyaanad kicin weli? Sowka aabbahaa kugu soo waashay.

- Oo mee aabbo?

- Dee isagu shir kale ayuu ku jiraaye, adigu meeshii miyaanad tegayn?

- Mayee waan kacayaa, hooyo.

Runtaa fiicane maan rabin in aan meeshaas tago. Waa laba saacadood oo ay qaar ajaanib ahi kaga hadlayaan nabadda iyo nabadeynta. Waa aqoon-isweydaarsi uu aabbo aad iigu qasbayey. Waxa ay ka mid tahay diyaargarowga uu wado, si uu iigu wareejiyo guddoomiyenimada xisbiga, marka uu isagu madaxweyne noqdo kaddib doorashadan soo socota. Dedaal dheer oo uu u galay kaddib, wuu ka ansixiyey asxaabtiisa kale. U malayn maayo in ay diidi lahaayeen kolley, waayo ka maarmi maayaan adeegga aan xisbiga u hayo. Dad badan oo siyaasadda faalleeya ayaa inta badan ku tilmaama guulaha xisbiga qaar aan anigu ka dambeeyey. Walow aan dhowr sanno uun si fiican uga shaqaynayey, haddana waxa ay ahaayeen dhowr sanno oo xasaasi ahaa.

Farxad miisaankaygii fududaysay ayaa cagaha iyo caloosha ii fadhida. Degdeg ayaan u diyaargarobay waanan baxay. Magaalada ayaan sii dhex qaaday aniga oo ku indho-doogsanaya midabka astaanta u ah xisbiga ee cagaarka ah, meel kastana sudhan. Waraaqaha waaweyn ee ay ku xardhan yihiin "KA XOROW QABYAALAD – U CODEE BULSHO" iyo

"CODKA BULSHO AAD SIISAY KU HUNGOOBI MAYSID" ayaa meheradaha albaabbadooda ku dheggan. Waa olole wakhti dheer qaatay midhihiisii. Dad kala qaybsan ayaannu intoodii badnayd midaynay. Cilmiga arrimaha bulshada ee aan saddexda sanno ku soo lumiyey ayaa i baray in marka aad dad midaynayso loo adeegsado qalab kala duwan. Qalabka aan u adeegsaday ayaa ahaa in si aan dadkan u mideeyo aan tuso wax ay wadaagaan oo dantooda guud ku jirto. Waxa aan farta ugu fiiqay waxyaabaha ay wadaagaan aniga oo ka qarinaya waxa kala duwa. Waxa ay ahayd siyaasad aan u qaabbilsanaa xisbiga oo guul ku dhammaatay. Waxa uu ahaa olole qaatay sagaal bilood oo ka unkamay tuulooyinka yaryar ee aanay siyaasiyiintu danaynin kuna dhammaaday caasimadda dalka. Waxa qasab noqotay in aannu tuulo kasta joogno ugu yaraan toddoba maalmood. Si aannu u beddelno fikirka ay ka qabaan siyaasiyiinta guud ahaan, ayaannu bilownay adeegsiga fikirkooda. Iyaga ayaannu kulamo kala duwan la qaadannay si ay uga sheekeeyaan xaaladdooda nololeed iyo baahida ay qabaan. Halkaa waxa nooga soo baxay meelaha ay u jilicsan yihiin, meelaha aan ballanqaadkayga ku aaddin doono. Haddii aan

wax ka bartay bulsho meel deggan, weliba ragga, waxa aan ogahay in ay raggu inta badan ka faalloodaan waxyaabbo aan suurtoagal ahayn. Tusaale ahaan, oday gadh weyn oo cas leh ayuu ahaa kii isaga oo cadhaysan ka kacay shirka ee noo sheegay in uu u baahan yahay waddo laami ah oo tuuladiisa ku wareegta. Sidaas darteed wax weyn ka ma so qaado baahiyaha kala duwan ee ay raggu sheegtaan, waxaan aad u dhegeystaa dumarka. Dumarka oo ka hadla waxyaabaha aasaasiga ah, sida iskuul ay carruurta aaddo, ceelka oo ka dheer iyo wax aan ka durugsanayn. Qofka bani'aadamka ah haddii aad jiif wadaagtaan, way fududahay fahamka idin dhex mari karaa. Marka aannu – aniga iyo kooxdaydu – lix habeen jiif iyo jidiinba la wadaagno qaybaha kala duwan ee bulshada, ayaan maalinta toddobaad ku soo gunaanadaa khudbad ay iska dhex arki karaan. Hadal iyaga taabanaya ayaan u sheegaa, ballanqaad saaxiibkood ka imanayana ayaan guddoonsiiyaa inta aanan ka huleelin tuulada. Tuulada xigta ayaan gaadhaa si aan intii in le'eg u sameeyo. Lix bilood kaddibna caasimadda ayaan imid aniga oo dad i oggol dhabarka ku sita. Caasimadda ayaa iyadu u baahan in dhowr siyood looga hawl galo. Taasna aabbo ayaa ku filan oo intaa aan

maqnaa aan wax kale qaban. Waa qof jecel in uu ka midho dhaliyo hawsha uu bilaabbo, sannadkan isaga ahna way ka go'an tahay in uu madaxweyne noqdo. Waajibkayga ayay tahay in aan ku garabgalo hayaanka. Noloshayda dhan ayaan u hakiyey si aan isaga tiisa u meel mariyo. Waa xaq la'igu leeyahay oo aan gudanayo. Tani waxa ay dhalisay in dadka siyaasadda falanqeeyaa igu sheegaan shaqsiga ka dambeeya guulaha uu xisbigu ka soo hooyay gobollada. Guushaas oo xisbiga kor-marinaysa xisbiga talada haya ee tacbaanka ah, soona gaadhsiinaysa xisbiga aannu colka nahay ee Aqbal oo muddo dheer caan ka ahaa waddanka. Waxa haysta xisbigan oday aad macangag u ah oo la yidhaa Cali Shaandho. Cali Shaandho inta aan ka aqaanno, waa qof aad u qallafsan, qof aan jeclayn in rabitaankiisa laga soo dhex galo, waa qof marka uu doodayo laga fogeeyo qalimaanta iyo waxyaabaha uu u adeegsan karo in uu ku tuuro qofka la doodaya. Taasi waxa ay keentay in ay isaga iyo aabbo is af-dhaafaan. Shirka uu maanta leeyahayna waa mid iyaga dib loogu wada hadashiinayo oo ay odeyaasha magaaladu dhex ka yihiin. Shaandho waxa uu adeegsadaa habkii 40 sanno kahor la adeegsan jiray ee odayaasha ku salaysnayd. Reer kasta gaarkiisa

ayuu ula shiray. Beentu ma wanaagsanee habkani waxa ay u soo jiidday sumcad uu beelaha dhexdooda ku yeeshay, geyiganna caan ayuu ka yahay. Waxa se hadda bilaabantay shaki dadka ka galay ujeeddooyinkiisa, annaguna Bulsho ahaan waxa ay noqotay fursad noo bannaanaatay. Halkaa shakigu ka yimid in aannu farta ku fiiqno ayay shaqadayadu ahayd sannadkii u dambeeyeyba, taas oo keentay kulaylkii doodda isaga iyo aabbo dhex martay mar uu isagu aabbo ku yidhi "inankaaga la'aantii waxba maad ahaateen", taas oo uu aabbo kaga jawaabay "Ilaahay u cadhoo dee anigu innamada ma bixiyee". Sida aan maqlay wax wiilal ah ma uu dhalin Shaandho, gabadh ayuu dhalay aan siyaasadda ku jirin.

Natijadii doodda habeenkaa dhoweyd ayaa keentay in na loogu yeedho aqoon-is-weydaarsigan ku saabsan nabadda iyo nabadeynta. Kolley wax aan tixgelinta afkaarta kala duwan ahayn ka hadli maayaan. Dirawalkii ayaa baabuurkii joojiyey, shan daqiiqo oo ay ka dhaaftay wakhtigii ballanta ayaan qolkii madaxa ku soo horreysiiyey. "Faysal Keynaan, soo dhawoow" ayuu af qalaad igu soo gaadhsiiyey kii caddaa ee madasha horjoogaha ka ahaa. "Shan daqiiqo ayaad soo daahday" ayuu ka daba

keenay si uu iigu tilmaamo habsankayga. Waar iska aamus waaban soo dheereeyee. Kursi bannaan ayaan ka helay qaybta dambe ee qolka ay dhex fadhiyaan dadka tiradoodu labaatanka gaadhaysaa. Kuraasida ayaa u taalla afar layn oo midkiiba lix kursi iyo miiskiisii oo horyaalla yahay. Qof waliba gaarkiisa ayuu u fadhiyaa. Durba waan hamaansaday, wax micno leh ayaan u arki waayey waxan uu ka sheekeynayo. Haddii aan ogaan lahaa sida uu dareenkaygu u beddelmi doono ilbidhiqsiyo kaddib, maan hamaansadeen. Waxa aan dareemay indhaha dhabankayga bidix sida fallaadha ugu taagan. Intii aanan eegin dhankeeda kahor, ayuu ninkii yidhi "fadlan laba-laba u fadhiista oo su'aalahan ka dooda". Dhankii indhaha la'igaga soo ganay ayaan u jeedsaday. Waa iyadii. Waa Indhadeeq! Maxay meesha ka qabanaysaa? Afka ayaa i kala tegay. Inta aanay qof kale la fadhiisan ayaan kursigaygii dhankeeda u jiitay aniga oo ka hor jeedsanaya. Iyadu sidayda oo kale ugu ma faraxsana kulankan, sababta gadaal ayaan ka ogaan doonaa. Hadallo isku qasan ayaan mar ku wada dhawaaqay. Su'aashii uu ninku yidhi ka dooda ayay jawaab iiga dhigtay.

- Haddii aabbahaa iyo hooyadaa hortaada isku dagaalaan, sideed u xallin lahayd?
-

- Een.. aabbahay iyo hooyaday miyay waalan yihiin markay hortayda ku dagaallamayaan, ayaan jawaab uga dhigay aniga oo ilaaqdoon ah.

Weli waxa aan rabaa in ay iiga jawaabto sababta ay goobtan u timid, waayo shirkan waxa ka qayb gelaya oo keliya xukuumadda iyo labada xisbi ee mucaaradka ah. Qayb iga mid ah ayaa igu leh "xukuumadda ayay ka socotaa", qayb kale ayaa diidaysa.

- Bisinkee su'aalo badanidaa! ayay si hoose u tidhi.

Waan isku khajilay, waa runteed. Su'aalo ayaan nafta kaga jaray. Dabcan xiisaha ayaa iga keenay, waan u qaadan waayey. Riyo oo kale ayay ila ahayd. inantii aan maalmo ka daawan jiray shaashadda telefoonka ayaa imikana i hor fadhida. Waa wax la rumaysan waayo.

- Oo meeshii aad u soo socotay ma halkanay ahayd? ayaan haddana weydiiyey.
 - Haaye su'aasha ka jawaab.
 - Walaal Ilaahbaan kugu dhaariyee ii sheeg waxa aad meeshan ka qabanayso. Horto
-

waan ku faraxsanahay in aan ku arko
runtii oo waan u qaadan la' ahayba,
laakiin ma xukuumaddaad ka socotaa?
Mise odaygii Shaandho ee qallafsanaa
ayaad u shaqaysaa.

Qosol foolxun ayaan raaciyey markaan intaa
idhi. Wejigeedii ayaa doorsoomay markii aan
intaa idhi. Kor ayay ii soo eegtay iyada oo
beddelan.

- Cali waa aabbahay! Indhadeeq Cali waa
aniga.

Hadalka ayaan ka boobay.

- Naa walaal ka noqo, kaasi malaha ku
muu dhaline.

Ha odhan lahaydaa!

- Neef xun baad tehee shadhaab! Waar
maxaad aabbahay ku caayaysaa?
Markaad soo gashay ayaan gartay inaad
ina Keynaan tahay, kibirkaaga. Waar
aabbahay muxuu kugu sameeyey?
Adiguu aabbahaa haacoo yahaye..

- Dee yeynaan is caayin walaale u kaadi.
 - Oo waar haddaa ma adaa ii subkay?
-

Bal adba ka jawaab, waa runteed. Cali Shaandho ayaan horteeda ku caayey. Aar ninka dhalay qallafsanaa iyana qurxoonaa.

- Inaadeer wax ma kuu sheegaa, i nabad geli oo dib ha ii la hadlin. Is ma naqaanno marka horeba ee imikana yaynaan is barannin. Orod oo kursigaaga qaado oo si edeb leh u fadhi meeshaada.
- Walaaleey waan kaftamayey.
- Kaftanka was!
- Hoognay! Walaal raalli noqo, wallaahi kaftan ayay iga ahayd ee iga raalli noqo.
- Ma cayda aabbahay ayaa kaftan ah, waan ogahay in adiga iyo aabbahaaba aydaan wax kale ku foogganayn. Fadlan meesha ka kac intaannan kor u dhawaaqin.

Belo ku degtay! Si edaab leh ayaan kursigayga u qaatay. Waar maxaa i helay? Dhacdooyinka daqiiqado gudohood ku dhacay ayaa u dhacay xawaare ay maskaxdaydu diiwaangelintooda ka gaadhsiiin weydey. Weli maan fahmin waxa i helay. Laba saacadood kahor ayaan helay inantii aan maalmo ku wareegi jirey. Sheeko macaan oo isbarasho ah

ayaa na dhex martay, iyada darteed ayaan uga soo habsaami gaadhay madashan aan imika joogo. Markii aan imidna iyadii ayaan ugu imid, af-kala-qaad! Farxad aanan ogeyn ayaan ku dul kufay si markiiba si degdeg ah la'iiga faro-maroojiyo haddana. Markii kulanku dhammaaday ayay degdeg u baxday iyada oo cadhaysan, waan ka soo daba baxay si aan qalbi-jileec uga raadsado, baabuur sugayey ayay xuddunta u fadhiisatay, dhanka barina qorraxda ka hor tagtay. Daruur madow oo keligay dushayda foolxumo hoganaysa ayaan dhankii guriga tegay. Weligey Axad ka foolxumi i ma ay soo marin. Gurigii ayaan toos ugu hagaagay aniga oo nafta canaan ku deldelaya. Sariirtaydii ayaan dul jiifsaday aniga oo naftayda cunaya. Wixii i helay ayaan dib ugu noqday, hadalladii afkayga dheer ka soo yeedhay ayaan dib ugu ceshaday. Maxaa igu watey? Bal maxaa i waalay? Aayar uun maan su'aasheeda ka jawaabbo oo aan hadalka yareeyo. Telefoonka ayaan soo saaray si aan u eego wejigeedii aan jeclaa. Sheekaba waa ta dambeysa. Xidhiidhkiiba way jartay, way i xannibtay oo ay iga tuurtay meeshii aan kala xidhiidhi lahaa. Waa duntii u dambeysey ee isku kaaya haysay, way jartay tiina. Waxaan u qaadan waayey in kaftankaygii

uu agteeda macnahaa weyn ka samaynayey. Waa maxay hadalka aan ku idhi ee keenay in ay sidaas oo dhan ii fogeeyso? Runtii waan khaldamay, laakiin may ahayn in ay sidan oo dhan ii ciqaabto. Qof aad xiisaynayso oo agtaada boos weyn kaga jira, marka uu ku fogeeyo sidan oo kale, qalbiga ayaa dhowr qurub ku noqonaya. Anna maanta waxa aan dareemay in aan lumiyeey qayb noloshayda ka mid ah. Walow aannaan is aqoon wakhti saacado ka badan, walow aanay ahayn qof aannu wax badan wadaagnay, haddana sidii qof aan weligeey aqaannay oo noloshayda ka baxday ayay noqotay. Su'aalo badan ayaan jawaabbo u waayey. Ma hadalka aan ku idhi ayaa ka weynaa wanaaggii aannu wadaagnay? Mise iyada ayaan ii dareemayn sida aan u dareemayo? Malaha aniga ayaa keligeey is qanciyeey ee inantu wax xiiso ah ii ma hayso! Waayo xadhkaha ii ma ay goyseen haddii ay sidayda oo kale dareemayso. Caloosha ayaa si fudud ii xanuuntay, naqas weyn ayaan kolba soo tuurayaa. Su'aal kasta oo aan jawaab u waayo ayaa culays saa'id ah ku noqota madaxayga. Aniga oo badweyn fikir ah dhex muquuranaya ayaan haddana is weydiiyaa sababta aan sidan oo dhan ugu dareemayo qof aannu isku cusub nahay. Waxa aan ka jawaabi kari waayaa sababta

aan muhiimadda intan le'eg u siinayo qof aan isaguba ii dareemayn sida aan u dareemayo. Waan ka joogi kari waayey, ka jiifi kari waayey. Madixii ayay ila qaybsatay, anna canaan ayaan nafta iskaga jaray. Nasiib xumiyaa! Haddana waxa aan eegaa xaqiiqada oo ah in aannaan kolleyba is helneen siyaasadda awgeed. Wax dhici kara maaha in aan iyada ka dhigto lammaane aniga oo siyaasadda ku jira, xitaa haddii aan ka baxo ayuu shaki ku jiraa. Taariikhda aabbahay iyo aabeheed dhex martay, dhex marina doonta, ayaa riyo ka dhigaysa rejo noocaas ah. Sidaas ayaan u ogaa, haddana sina waan uga nasan waayey. Qof kala maqan ayaan noqday, farxadda albaabbadeedii ayaa iga xidhmay, cuntadana dhadhankii ayaa ka tegay.

Sidaas ayaan ahaa muddo laba maalmood ah markii aan go'aansaday in aan si uun ula xidhiidho. Maaddaama oo ay xannibtay lambarkaygii iyo meel kasta oo aan kala xidhiidhi lahaa, waxa aan ka wareegay jid kale. Aniga oo qof kale ah ayaan farriin dheer u diray, rejo aan weyneyna waan ka qabay in ay heli doonto. Qalbiga ayaan kala hadlay aniga oo u sharraxaya sida nacasnimada leh ee aan hadalka u idhi, waxa kale oo aan si guudmar ah uga

sheekeeyey dareenkayga iyo sida aan haatan dareemayo. Waxa aan hubay in ay jawaab ii soo diri doonto marka ay akhrisato qoraalkaas isaga ah. Jawaab ayaan ka waayey. In aanay helin ayaan ogaaday. Tijaabbo lagu fashilmay ayay noqotay. Halkaa waxa iiga dhuroobay in aanay murugadaydu ku koobnaan doonin labadaa maalmood oo keli ah. Sidii ayaanay u dhacday. Dhadhaar dhabarka ii saaran ayay iga la cuslaatay. Waan se ku qasbanaa in aan meel walba la aado culayskaa. Siyaasaddii ayaan halkii ka sii wadey, aabbo garabkiisa ayaan taagnaa aniga oo garabka Indhadeeqna ka dheer.

2 BULSHO

Afar sanno kahor ayay ahayd galabtii qorraxdoo gaaban aannu arrinkan aniga iyo aabbo si wadajir ah u soo bandhignay. Dood dheer iyo faallayn aannu ka wadnay siyaasadda qallafsan ee dalka ka jirta ayaa ku dambeysey aasaaska xisbiga. Wax badan waxa aannu faallaynay sababta loo waayey xisbi danta runta ah ee looga baahan yahay in uu ka shaqeeyo ka shaqeeya, taas oo ah danta bulshada. Isbeddel ayaa jira oo aannu raadinaynay. Goor dambe ayaannu is weydiinney sababta aannu u raadinayno ee aannu annagu u samayn weyney. Qosol ayaannu isku darnay. Ciyaar ayay nooga badnayd. Kaftan laba is dhalay looga bartay ayaannu u beddelnay. Waannu faallaynay, far iyo suul ayaannu kolba qurub ugu rognay faallada muuqaalka uu yeelan lahaa xisbi noocaas ahi. Dhan walba oo aannu u rognay way foolxumaatay. Quudhsi xisbi noocaas ah ayaannu bilownay. Sida ay dadku u diidi lahaayeen ee loogu fashilmi lahaa ayaannu sii qaadaa-dhignay. Si uu u noqdo mid aan meel marin ayaannu ujeeddadiisa ka dhignay mid dadka mideeya, mid qabyaaladda aasa iyo mid aan reer hebel u xidhnayn. Illeyn kolleyba ma hirgalayee, "magaciisana aynu Bulsho ka dhigno" ayaannu nidhi. Habeenkii oo dhan hawl

aan qosol iyo deldalaad xisbi ahayn ma aannu haynin. Goor dambe ayaannu kala seexannay. Halkii ayaan kaga kacay fikirkii, waxa aanan ogeyn in uu aabbo qolka hurdada u sii qaatay fikirkii aannu yasaynay.

Subaxnimadii ayaan ku toosay jugta garabka igaga socota. Kor ayaan u eegay, muuqaalkiisa ayaa ii saxmay. Cod ayuu iigu daray.

- Waar ka kac meesha waxba ku ma filnide, ayuu igu salaamay.

Waxba ma aan odhan, hadalba igu ma jirin xilligaas. Wax yar kaddib ayaan fadhiistay miiskii aan ku cuntayn lahaa. Quraacdii aniga oo aan bilaabin ayuu qolka igaga soo baxay isaga oo diyaar ah.

- Innamari, war baan kuu hayaaye dhakhso dee naga quraaco!
 - Aabbo maxaa dhacay saaka?
 - Bulsho ayaynu dhidbaha u taagaynaa.
 - Yaa?
 - Waar bal quraaco bannaankaan kugu sugayaaye oo dhakhso, afkan yar kala qaadoo si nool wax u cun.
-

Wuu iska baxay. Waan iska cunay, deedna ka daba baxay. Sidiisaba baabuurku waa meesha keliya ee aad qof hadal ku kala bogan kartaan, waayo meel uu kaaga dhaqaaqo ma laha. Sida ay wax u jiraan ayaan weydiiyey. Sida uu wax u rabo ayuu ii sheegay. Fikirkii waalnaa ee xalay in uu rumeeyo in uu rabo ayuu ii sheegay. Waxa aan weydiiyey sababta keentay in fikirkan aynu xalayna waalli qornay, saakana miyirqab. Waxa kale oo aan xasuusiyey in aanu xisbigani ahayn mid hirgeli doona, waayo dadku diyaar u ma aha hadda. Maaha wax macquul ah. Waxa uu ii sheegay in ay taa lafteedu ku dhalisay rumaynta fikirkan. In ay soo jiidatay waallida ah in xisbi noocaas ah la aasaaso. Runtii qayb iga mid ah ayaa jeclaysanaysay in aan ku raaco waxan aan macquulka ahayn, qaybtii kalena isaga ayaa qanciye. Waan ku taageeray. Inta aannaan fikirkan u soo bandhigin cid kale, waa in aannu annagu fahamnaa waxa aannu rabno. Qaab-dhiska xisbiga, yoolkiisa iyo hilinka loo marayo ayaannu meel ku tiirinnay. Aniguna warqad ayaan ku xardhay. Hab ku dhisan nidaam qarsoodi ah ayaannu ku bilownay. Tallaabadii koowaad ayaannu ka dhignay in aannu fikirkii la wadaagno xubno caasimadda jooga oo qabyaaladda ka caafimaad qaba.

Qorshihii wuu fulay, kulammo kale oo xeerka xisbiga lagu dejinayo ayaannu

dhammaystirnay. Magacii xisbiga "Bulsho" ayaa laga dhigay. Markii intaa aannu dhammaynay, welina annaan shaacin warka, ayaannu bilownay in magaalo kasta oo waddanku ka kooban yahay aannu la xidhiidhno xubnaha aannu bidayno in ay qabyaalad ka madhan yihiin. Taasi waxa ay sababtay in magaalo walba aannu ku yeelanno unug ku xidhan xisbiga oo afkaartiisa si buuxda u haysta. Magaalooyinka qaar waxa aannu ka helnay wax aan ka badnayn laba qof oo keli ah. Balse taasi waxa ay ka fiicnayd qof aannaan rabin oo booska soo cidhiidhsada. Haddii la rabo in uu xisbigani taabbagalo, waa in gunta si fiican looga unkaa. Qalfoof si fiican isu haysta ayaannu qotominay. Si uu qof u noqdo, waa in gudihiisa la buuxiyaa. Anigu xisbiga xil ka ma hayo, balse imika ayaa loo baahday cilmigaygii bulshada. Waxa ay shaqadaydu noqotay in aan soo diyaariyo qorshe bulshada lagu hanan karo. Qorshe ka aan ku aqoon la'isku bari karo, ka kaa shakisanna lagu soo xero gelin karo. Waxa ay noqonaysaa tijaabadii u horreysey ee aan si toos ah u isticmaalo wixii aan saddexda sanno soo dhiganayey.

Waxa aan bilaabay in aan derso bulshada lafteeda, walow aan ogahay wax badan, haddana in aan su'aal kasta si cilmiyeysan uga jawaabbo ayaan doortay. Maxaa ka farxiya? Maxaa ka qosliya? Qosolka iyo farxaddu ma il ayay uga

wada yimaaddaan? Kuwa miyiga iyo kuwa magaaladu se miyay ka siman yihiin dareemmada? Ma isku wax ayay ku qoslaan? Ma isku wax ayay ka xanaaqaan? Haddana hoos ayaan u dhaadhacay. Imika sidee ayay bulshadaadu dareemaysaa? Miyey niyad-jabsan tahay? Ma in la khiyaameeyey ayay is moodaysaa? Haddana waxa qasab igu noqotay in aan deegaan kasta u derso si gaar ah. Deegaannada ay colaadda dheeri dhex taallay iyo sida uu midba midka kale u dareemayo. Bulshooyinka dhulalka isku haysta iyo sida loogu khudbadayn karo iyada oo aan midna laga xanaajin. Kuwa dareemaya in la duudsiyey sidii loo dareensiin lahaa rejo iyada oo aan kuwa kalena lagu istaagin. Qalin iyo buug ayaan qaatay. Tuulada galbeed ugu xigta ayaan ka soo bilaabay safar xaqiiqo-raadis ah, aniga oo ku dhammaynaya tuulada cidhifka bari. Aniga oo aan siyaasi ahayn ayaan soo waraystay, makhaayadahooda la fadhiistay, dhuxullahana la sheekeystay. Waan asteeyey qoraalkii, hab fudud oo qofkii fasax u haystaa u daallacan karo ayaan u diyaariyey. Taas kaddib ayay bilaabantay in lagu dhawaaqo xisbiga iyo magaciisaba.

Wax kasta oo cusub waa lala yaabaa, kanna ka muu duwanayn. Dadku way fogeeyeen fikirka uu xisbigu ku dhisan yahay. Hadalhayntiisa ayaa

aad u badatay, dadka intooda badanna waxa ay ku eegayeen indho aan caafimaad qabin. Odhaahyo qofkii aan lugaha si fiican dhulka ugu hayn tuuryeynaya ayaa ka soo yeedhayey dadkii uu warku gaadhay. Idaacadaha ayaa falanqayn dheer ku sameeyey. Si kasta oo ay falanqayntaasi u xumeyd, haddana aniga ayuun baa ogaa in ay xisbiga faa'iido u tahay. Waayo haddii aan wax ogahay, waxa aan ogahay in hadalhayntu – teeda wanaagsan iyo teeda xunba – ay u fiican yihiin shaygaa amma qofkaa la hadal hayo. Siyaasiyiinta markaa wax laga weydiinayey siyaasadda dalka ee xisbigan fageynayey waxa aanay garanayn hal shay: in odhaahdooda xumi kor u qaadi doonto xisbigan imika uun masraxa siyaasadda soo fuulay. Siyaasiyiinta qaarkood ayay hadallo aad u qadhaadh ka soo yeedheen, waxa aan filayaa in ay ahaayeen kuwo u arkayey xisbigan mid ku qabsan doona garoonka ay xuurtada ku haysteen.

Hadallada qarriban sidoodaba hab deggan ayaa looga hawl galaa. Taas oo ah in aan laga jawaabin wax uu qof yidhi amma eedeeyn aan meelna haysan oo lagu soo jeediyey. Ficilka u wacan ee lagaga hortago ayaa ah in la sameeyo ficillo wax ku ool ah, kuwaas oo sidooda u tirtiraya eedeymihii hore dushaada u hoganayey. Dadka qaar ayaa xisbiga ku eedeeyey in aanu qoys keliya dhaafsiisnayn. Taas jawaabteeda

ayaannu ka dhignay in guddoomiyaha xisbiga ee gobolka ugu shisheeya dalku agaasimo maalin ay nadaafadda gobolka oo dhan wax kaga qabannayaan. Tani waxa ay keentay in warbaahintu soo weriso sawir burinaya kii ahaa in xisbiga hal qoys iska leeyahay. Weli inta aannu shir-jaraa'id qabannay ka ma aannu jawaabin eedeyn cid nooga timid. Habkaa dadban ayaa ahaa xabaasha aannu ku aasno hadal kasta oo si qaldan na looga sheegay. Muddo sannad gudaheed ah ayay dadku dhammaantood magacii xisbiga ku xafideen. Ficilka ayaannu sii kordhinay, hadalkana waannu yaraynay. Wixii aannu ku doodi lahayn mustaqbalka ayaannu bilownay in aannu sii yagleelno. Wax-qabadka aannu mustaqbalka sheegan doonno ayaannu seeskiisa dhismihiisa bilownay. Waxa uu noqday safar aannu isku barannay aniga iyo aabbo. Dad wada shaqaysanaya ayaannu noqonnay, markii u horreysey ee noloshayda ayuu aabbo talo i weydiiyey. Markii u horreysey ee noloshayda ayaan dareemay in aan aabbo meelaha qaar uga aqoon badanahay. Way ku adkayd in uu aqbalo intii hore, maaha qof si fudud loo la heshiin karo. Qalad ha iga fahmin, maaha qof aan lala shaqayn karin, balse waa qof si adag dadka ku aqoonsada. Waa qof gacantiisa ku ciil baxa oo aan jeclayn in aanu hawlaha gacanta ku haynin.

Wax aanu ogeyn in uu dhaco ma oggola. In kasta oo aannu imika isla garannay habka aannu isu la shaqaynayno, bilowgii way adkayd in uu igu aamino waxyaabaha qaar. Sannadkii u horreeyey ee aan cilmibaadhista wadey, habeenkii isaga oo aan karayn ayuu i dul fadhiyi jiray marka aan wax qorayo. Isaga oo dhowr jeer gam'ayna waan kiciyey.

Bilowgii waan dhibsan jiray sida uu iila dhaqmayo, maan jeclayn in uu i aamini waayo. Waxa aan dareemi jiray in aanu nin ii arkayn. Si aanay kalsooni ku jirin ayuu amarka ii siin jirey. In badan ayuu hadalka ii raaciyey "ma kugu halleeyaa?". In badan ayaan hoos u idhi "ma carruur baan ahay aabbo?". Waxba maan dareensiin jirin, sabab ayaa kolley ka keenaysay.

Aabbahay waxa uu u weynaa siddeed carruur ah. Aabbihii waxa uu dhintay markii uu isagu dugsiga sare dhiganayey. Isaga ayaa qoyska hoggaamiye u ahaa. Dantu waxa ay qasbaysay in uu isticmaalo ad-adayg saa'id ah si uu ugu taliyo toddobada ciyaal ah ee ka yaryar. Waxa aan dareemay in uu weli ku jiro habkii uu berigaa u fikiri jirey. Markii ay walaalladii ka waaweynaadeenna uu carruurtiisa ku bilaabay. Taasi waxa ay igu qasabtay in aan isaga fahamsiiyo in uu igu kalsoonaan karo. In aan tuso in aan ka soo bixi karo shaqo la ii diray. May fududayn. Dulqaadkeeda ayaan yeeshay.

Ugu yaraan sannad ayay qaadatay in uu culayskii weynaa iga dul qaado isaga oo weli siyaabbo kale ii dhowraya. Waan la qabsaday habkiisa shaqo, in uu maalin uun si buuxda ii oggolaan doono ayaan ogaa. Waayo aniga ayay igu xidhnayd. Dhowr jeer ayaan isaga iyo asxaabtiisaba u soo bandhigay cilmi-baadhisyo muhiim u ahaa xisbiga, taas oo noqotay in aan xisbiga u noqday xubin aan laga maarmi karin.

Wakhtigii ololaha doorashadan imika soo socota ayay ahayd markii aan u soo gudbiyey fikir raalli geliyey isaga iyo intii u dhoweyd ee maamulka xisbiga haysay. Maaddaama oo uu xisbigu yahay mid la rabo in uu hanto qaybaha kala duwan ee bulshada, waa in aanu guddoomiyuhu noqon midka khudbad kasta soo jeediya. Waa in ay jiraan dad kala duwan oo afkiisa ku hadlaya oo hadallo kala duwan ka soo jeedinaya gobollada kala duwan ee dalka. Iyada oo qof kasta oo hadlayaaba ka duulayo macluumaadka aynu ka haysanno gobolkaas amma degmadaa iyada ah, loona diyaarinayo khudbadda uu qofkaasi jeedinayo. Dad kala duwan oo isugu jira rag iyo haweenba ayaa sidaa ku shaqo galay. Waxa ay noqdeen aalad lagu shubto wixii aad doonayso oo kuugu dhawaaqaya codkooda daweyn kara boogo uu kaagu korka ka dhayi lahaa. Khudbadda oo ku salaysan dareenka degmo iyo waxyaabaha ay u

baahan yihiin in lagu yidhaahdo ayaan u diyaarin jirey qof kasta oo hadlaya. Waxa intaa dheeraa, qof kasta oo khudbadda jeedinaya waxa wehelin jiray laba qof oo midna dumar tahay, midna oday dhaqameed yahay. Kuwaas oo sida runta ah ka tirsanaa xisbiga laakiin dadka isa ga dhigayey in ay maalintaas uun ku qanceen afkaarta xisbiga. Dadkaas waxa ay shaqadoodu ahayd in ay dareensiyaan dadka dhegeysteyaasha ah in ay iyaga u hadlayaan, iyaga oo ammaanaya xisbiga oo odhanaya in uu xisbigani yahay kii ay u baahnaayeen. Taasi waxa ay sahlaysaa in dadka inta ku diidanna aad kaxaysan karto. Way fudud dahay marka qof aad isku dan iyo deegaan tihiin ku qanco wax kugu cusub, in aad adna soo dhoweyso.

3 AABBO

Aabbahay lixdanka afar ayaa u dheer. Haddii aad muuqiisa aragto, waxa aad mooddaa in uu aad uga weyn yahay. Dhirbaaxooyin badan oo uu waayuhu ku dhuftay ayaa raadkoodii ka muuqdaa foolkiisa. Maskaxdiisa ayaa ah ta keliya ee sidii la rabay u shaqaysa, waxna ku darsata.

14 sanno kahor ayay ahayd mar uu qalliin beerka ah galay. Qalliin fudud ayuu ahaa. Marka la eego saamaynta uu qoyskayaga ku yeeshay, waxa uu ahaa mid cabsi badan nagu reebay. Si fiican ayuu noo la caweynayey habeenkaa, casho aannu cunaynay ayaannu markaas uun afka ka qaadnay. Faraha oo aannaan weli iska dhaqin ayaannu meeshii sheeko ku wadaagaynay. Hooyaday iyo laba adeerraday ah ayaa na wehelinayey. Dayaxa ayaa korkayaga joogay oo daruurahana xayndaab ka samaystay. Adeerraday ayaa walaalkood dacaayadaynayey, sidii uu ahaa markii uu soo korinayey iyo dagaalkii soo dhex maray. Aniga oo amminta taagan ku raaxaysanaya ayaan dareemay qosolka uu ku margaday. Ilbidhiqsi kaddibna caloosha ayuu is qabtay. Dhulka uu u dhacay iyo dhididka aad mooddo in jidhkiisa qasab lagaga soo tuujiyey ayaa kulmay. Wuu dubaaxinayey markii aannu dhakhtarka ula cararnay isaga oo aan

miyirkiisu joogin. Qalliin degdeg ah ayaa lagu sameeyey. Intii qolka lagu la jiray ayaan meelna xammili waayey. Nolosha iyo sida aan loogu kalsoonaan karin ayaa ii caddaatay. In ay caddo aannu qosol ku ciidaynay isku rogi karto gudcur aan la gudi karin ayaan ogaaday. In noloshu marka ay doonto kaa qoslin karto si ay ilbidhiqsi kaddibna kaaga oohiso. Daqiiqadaha ayaa igu dheeraaday, qolka aan laga soo baxayn iyo kalkaalisoooyinkan midba dhinac u ordayso ayaa intii naxdin ii dhinnaydna ii dhammaystiray. Quraan intii aan aqaannay ayaan dhammeeyey, intii aan hooyo aamusiin karayay ayaan afka qabtay. Mahadi Eebbe ayay u sugnaatay, qalliin lagu sameeyey waa lagu guuleystay. Beerkiisa iyo waxyaabbo aanan fahmin ayay badbaadiyeen dhakhaatiirtii qalliinka samaysay.

Maalintaas illaa imika, dhacdadaasi waxa ay ahayd mid saamayn ku yeelatay noloshayda iyo nolosha qoyskayaga. Waxa ay noqotay mid i cabsi gelisay oo farxadda i nacsiisay. Mar kasta oo aan aad u qoslo waan aamusaa. Waxa aan ka baqaa in naxdin laabka igu sugaysay i maqasho. Farxadda iyo qosolka kiisa badan ayaan yaraystay. Waan ogahay in aanay saamayn isku lahayn, balse dhacdadaas iyada ah ayaa i tustay in uu jiro hooseeye ay farxadda iyo naxdintu wadaagaan. Dabeecad ayay iga noqotay in aan

qosolka qadhiidho. Sidaas oo ay tahay, haddana balaayo ma soo daahdo.

Sannad kahor ayay ahayd markii uu aabbo aad u xanuunsaday. Subax hore, wakhti ay ahayd in aannu ku kulanno miiska cuntada, ayaan dhinacayga ka waayey. Aniga oo ku aqaannay in uu iiga horreeyo miiska, ayuu maanta jifka ku raagay. Waa laga yaabaa in uu hurdada uun ku yara raagay, waa laga yaabaa in aanu caafimaad qabin. Werwer iyo calool-xanuun ayaan ugu soo dhaqaaqay qolkii uu jifay. Wuu dubaaxinayaa, jidhkiisa oo dhanna dhidid ayaa qariyey. Muuqaalkii habeenkii ayaa keligey dib iigu soo laabtay. Markaas cid kale oo i wehelisaa ma ay joogin. Qof weyna waan ahaa markan oo qiyaasi kara dhibka xanuunka. Waan isku dhex yaacay, wax aan sameeyo ayaan garan waayey. Ma aha dhacdo ay tahay in ay qofna ku dhacdo, gaar ahaan ubad. Mar isaga ayaan ku ordaa, mar waan ka ordaa, marna dhaqaaqa ayaan joojiyaa. Si kasta oo aad imika isu leedahay "waxaas ayaad samayn lahayd", wax kale ayaad samayn doontaa marka naxdintu ku hayso. Qof adag ayaan isu haystay, liddigeeda ayaan noqday. Ilaahay waa i waafajiyey, cusbitaalkana waan ku habsaday. Wax qalliin ah lagu ma samayn da'diisa awgeed, balse dawooyin xanuunka ka yareeya oo tiro badan ayaa dhowr siyood loo siiyey. Wakhti yar

kaddibna miyirkii ayaa u soo noqday. Dhakhaatiirta oo aan waraystay ayaa ii sheegay in uu dhibku yahay kacdoon dhanka beerka ah, wax qalliin ahna aan la samayn karin. Marka laga tago da'diisa, beerka laftiisa ayaan xammilayn qalliin kale. Taasi waxa ay sababi kartaa geeri degdeg ah. Maalin ayuu cusbitaalka sii jiifay, guriga ayuu maalmo kalena nasasho ku qaatay intii aanu sidiisii orod magaalada ku gelin. Maaha qof la joojin karo, si uu ujeeddadiisa u gaadho, waa qof diyaar u ah in uu dedaalka ay rabto geliyo. Dhowr jeer ayaannu isla soo qaadnay caafimadkiisa iyo hawsha xisbiga, mar kastana waxa uu hadalku ku dhammaan jiray weedhiisa ah "habar caanalaad tee wax kale ka hadal". Qof noocaas weeyaan.

Si kasta oo ay shaqada xisbigu noo kala kaxayso, waxa aan ku dedaali jiray in aanan agtiisa ka dheeraan. Ma rabo in aan hadhow isku canaanto in aan ka dheeraa. Intii macquul ah waan la joogey. Inta kalena isaga ayaaba hawlo ii dirayey. Isagu ma uu ogeyn, balse hoosta ayaan kala socday xaaladdiisa caafimaad. Si gaar ah ayaan u eegi jiray marka aannu wada joogno, naqaskiisa ayaan dhegeysan jiray. Aabbahay waa qof xanuunka haya si fudud isku illowsiin kara, taasina khatarteeda ayay leedahay. Marka ay da'diisu sii korodhaba, difaaciisuna wuu sii yaraanayaa. Sidaas oo ay

tahay, isaguna maanta ayuu ugu shaqo badan yahay.

Dhacdooyin yaryar ayaa jirey oo bilihii la soo dhaafay soo noq-noqonayey. Waxa dhacday in uu mararka qaar socodka awoodi waayo oo uu degdeg u fadhiisto. Waxa uu ku qarin jiray sabab uu markaa abuuro, inta badan "jilibka ayaa i xanuunaya" ayuu odhan jirey. Waan ogaa in aanay run ahayn. In aan ka werwero dhibka haysta isaga, ayaa isaga wax walba kaga darnayd. Ma uu jeclayn in aan ku arko xaaladda uu ku jiro. Balse ma ay ahayn mid la qarin karo, waanan isku dayey in aan si fudud uga la hadlo. Dabcan suurtoagal may noqon. Wuu is diidsiin jirey. Markii dambe wuu i fahmay in aan si gaar ah u eego, taasi waxa ay keentay in uu meel ii diro marka la soo hayo. Xanuunkiisii ayaa isku soo dhowaaday.

Galab, salaadda casar kaddib, aniga iyo isaga. Waduhu waa aniga isaguna dhankayga bidix ayuu fadhiyaa. Sheeko yar oo qosol ku dambeysey kaddib ayuu qufaxay. Sidiisii caadada u ahayd beryahan dambe ayuu maradii afka kula rooray si uu candhuufka isaga masaxo. Intii aanu degdeg isugu laabin ayaan arkay midabka guduudan iyo sida uu u sii qarinayo. Naxdin ayaan qallalay, baabuurkii ayaan degdeg wadada uga saaray aniga oo ku hadaaqaya "aabbo waxaasi ma dhiig baa?". Show si xun

ayaan baabuurka u duway. Waxa aan jawaab u helay "waar ha na dilin inantiinna wase, wuxu miyuu waalan yahay?!".

- Aabbo raalli ahow oo waxaasi ma dhiig baa Ilaah baan kugu dhaariyee?
- Waar dee waa iska caadi, waa iska uun.. markaan qufaco weeyaan inta badan.
- Haaye waa dhiig?
- Haddaa ma fiimtaa?!

Dabogal dheer oo aan sameeyey ayaan ku ogaaday in uu dhiiggani beryahanba socday. Waxa ii caddaatay in xaaladdu sii xumaanayso. Isagu rejo weyn ka ma qabo caafimaadkiisa, si uu aniga ii qanciyo ayuu iigu raacay dhakhtarka. Dhowr quraarradood oo dhiig ah ayaa laga qaaday si baadhitaan loogu sameeyo. Laabtiisa ayaa sawir la saaray. Natiiyooyin aan ka naxay ogaanshahooda ayaa wejiga la'igaga dhufatay. In dhiiggiisu sii xumaanayo ayaa la ii sheegay. In aan waxba laga qaban karinna xagga dambe ayaa hadalkii lagaga ladhay. In aanay wax khatar degdeg ahi jirin ayaa la ii qaddimay, in siday doonto ku dhammaan doontana waa lagu khatimay. Matag ayaa i qabtay. Habeenkaa jiifka ayaan ku ooyey markii aan hurdo iska waayey. Isagu marna dareen xun wejigiisa igama uu

tusin. Taasi ayaa haddana culays saa'id ah i saartay. In aan dadka ugu jecelahay isaga ayaan ogaaday. Sida aan u rabo in uu weligey agtayda joogo ayaan nafta ugu sheekeeyey, sida aanay wax jira u ahayn ayay runtu farta iigu fiiqday.

Waxa aan ku khasbanaa in aan khudbado ka soo jeediyo gobollada oo aan tuulo kasta joogayey toddoba maalmood, taasi oo aad noo kala dheereysay. Sidaas oo ay tahay haddana waxa aan isku qasbi jiray in aan usbuucii mar soo maro, saacadna ha ahaatee. Wejigiisa caafimaad ayaa ka muuqday mar kasta oo aan u imaaddo. Qosol ayuu igu soo dhoweyn jiray anna laabta ayaan gelin jirey. Mar kasta oo aan ka tegayana waxa aan u sii salaami jiray sidii oo ay tahay markii u dambeysay een aan muuqiisa arko.

Waa bilihii ugu muhiimsanaa ee ololaha doorashada, iyadana bilo yar ayaa naga xiga. Caasimadda ayuu si weyn uga hawl galay isaga oo midayna odeyaasha magaalada, u baaqaya mucaaradka, inta iimaanka la'na dhallaan-habaabis u tilmaamaya. Inta badan habeenkii ayaannu kala war qaadan jirney, marka aan soo waco ayaannu faallayn jirney dhacdooyinkii maanta iyo khudbadihii kala duwanaa. Mar kasta oo aan is qanciyo waxa uu iiga digi jiray dareenka noocaas ah. "Illaa aad guulaysato nafta waxaa ha ugu sheekeyn" ayuu odhan jiray.

Saadaasha iyo guulaha aannu soo hoynay ayaan farta ugu fiiqi jirey, in aannaan weli kursiga fuulin ayuu i tusi jirey. Waxa uu aad u jeclaa in uu kursiga ku fadhiisto, in uu madaxweyne u noqdo dadkan kala daadsan oo uu mideeyo. "Dadku hoggaan daacad ah ayay u baahan yihiin" ayuu odhan jirey. Fikirkaa aannu habeenkii sida kaftanka ah u rogrogaynay ayuu rumayntiisa wax walba ka jeclaa. Mar kasta oo aan daalo ayuu i odhan jiray "illaa aynu helno guusha, ha daalin. Weligaa ha nasan illaa aad guulaysato!" ayuu iigu celcelin jiray. Waa riyo wax kasta kala weyneyd.

Waa maalintii u dambeeysey ee ololaha aan ka wado gobollada. Daqiiqado kahor ayaan la hadlayey aabbo aniga oo u sheegayey in aan toos u soo baxayo marka aan dhammeeyo, isaguna ii sheegayey in aan caawa iska nasto oo aan berri uun soo baxo. Tuuladii u dambeysay ayaan khudbaddii badhtanka kaga jiray markii telefoonku yeedhay. Si dahsoon ayaan ugu gudbiyey qofkii iga dambeeyey aniga oo aan eegin. Gacantii iga qaadday ayaa dhegteeda ku qabatay si ay u hesho war wejigiisii beddelay. Isha ayaan aayar ku xaday, waan fahmay markiiba. Si kasta oo aan u wado khudbad muhiim ah, haddana waan sii wadi kari waayey marka aan arkay wejiga is beddelay. Waan weydiiyey.

- Ma aabbaa?

Madaxa ayuu ii ruxay. Makarafoonkii ayaan ka durkay, wax walba bilaa midab ayay ii noqdeen. Baabuurkii ayaan gunta ugu dhacay. Khasab ayaa la'igu fadhiisiyey kursiga kale. Jidka ayaannu sii haysannay markii aan ku celcelinayey "siduu yahay? Siduu yahay?". In cusbitaalka loo la orday ayuu ii sheegay. Indhahaa i madoobaaday, sidii oo aan wax u qabanayo ayaan isku canaantay maqnaanshaha aanan la joogin. Quraan, duco iyo baroor ayay naftu qaybsanaysay markii uu telefoonku mar labaad yeedhay. War aanan sugayn ayaa la'ii sheegay. Way ka baxday.

Tilifoonkii ayaan sii daayey, indhuhuna biyo ay kaydinayeen ayay oodda ka qaadeen. Qalbiga ayaa si' i noqday, caloosha ayaan iska dhex waayey, maskaxduna in ay fahmi weydey waxa loo sheegay ayay u badan tahay. Waxa aan noqday qof cirku ku soo dumay. Mar keliya ayaan cidlo dareemay, cidladuna wehel yeelatay. Dhulkii hoosteyda yaallay ayaad mooddaa in uu shaqadiisii dayacay. Faraha ayaan taagay si baabuurka loo joojiyo. Aniga iyo matag ayaa mar keliya baabuurka ka wada degnay. Dhul dhuxusha ka madow ayaan haahaabtay aniga oo aan garanayn waxa aan raadinayo. Jilbaha ayaan dhulka jiiday aniga oo beerka ka ooyaya. Wixii

uu lahaa oo dhan qof laga qaaday ayaan noqday. Si kasta oo aan u ogaa kaalinta uu aabbahay iigu jiro, haddana weligey maan moodayn in aan sidan oo kale dareemi doono maalinta Ilaahay na kala kexeeyo. Cagaha aan ku taagnaa ayuu ahaa, madaxa aan ku fikiro ayaa ku jirey. La'aantii qof lunsan ayaan noqonayaa, "la'aantii" in ay jirto in aan ku fikiro ma rabo. Waayo ma noolaan karo isaga oo aan ila quraacan, ma qadayn karo aniga oo aan codkiisa maqlin. Habeenkaa madoobaa, markaa aan ciidda galgalanayey, noloshaydu haddii ay ubbo ahayd, markaas ayaa sallax lala eegtay. Dhulka ayaa la isku dayey in la iga kiciyo, in la'i daayo aan iska jiiffee ayaan codsaday. Ciidda niista ah ayaan dareemayaa sida ay u adkaanayso marka qoyaanku gaadho. Bartaa ayaan laabnaa sidii gal muus oo la tuuray. Waxyaabaha aan dareemayey oo badnaa awgood ayaan dareemay in aanan waxba dareemayn. Maskaxda iyo qalbigaba wax ka weyn oo helay awgeed ayay is xidheen. Dadkii aannu wada soconnay oo midba dhinac u jeedo ayaan soo dhex qaaday aniga oo kursigaygii ku hagaagaya. Afka ayaa ii xidhan, indhaha ayaa ii ballaqaan. Dareenkii ayaa iga haaday, illin aan qalbiga soo marinna laabta ayay sida rasaasta ugu dhacaysaa. Saddex saacadood oo aan safar soo ahaa maan nuuxsan, in aan libiqsadayna u malayn maayo. Marka laga

tago buuqa guriga ka socda, baroor aniga ii gaar ah ayaa albaabka igu sugaysay. Wixii aan la aammusnaa ayaa mar keliya i soo jiidhay markii aan albaabka ka galay. In aan hooyaday macaan isu adkeeyo ayay ahayd, waayo saaxiibkeedii rumaad ayay weydey, way dhici weydey. Dhabteeda ayaan ku baroortay.

Habeenkii noloshayda ugu adkaa ayaa dhammaad ku dhowaaday, waaga ayaan damcay in aan ku qasbo in uu beryo. Indho gudhan ayaan sariir godan kala kacay. Adeerraday oo hawsha waday ayaa guriga iigu yimid. Hawshii aaska ayaannu u dhaqaaqnay. Waxa la ii sheegey in meydka la soo meydhayo, in aanay ii sii wadin hadalka noocaas ah ayaan weydiistay. Aniga agtayda weli meyd muu noqon. Weli waa aabbahay. In aan sii arko inta aan la aasin ayaa la ii soo jeediyey, "ma hubtaan in aanu noolayn?" ayaan jawaab uga dhigay. Waxa aan maqlay in dad badan nolol lagu aaso, sidaa darteed maan rabin in lagu degdego aaska. Kun su'aalood oo aan arrintaa ka weydiyey ayaa jawaabbo gaagaaban la'iga siiyey. Nin khalkhalsan ayaa la ii arkayey. Dhankii baabuurka ayaan u soo dhaqaaqay, Muxiyaddiin oo sidii xalay furaha u haysta ayaa baabuurka dhinaciisa taagan. Indhaha ayaan mar kor ugu eegay wejigiisa murugadu madoobaysay. Muxiyaddiin waa gacantayda midig, waana

mas'uulka iigu soo dhow dhanka shaqada xisbiga. Dabeecaddiisa oo ay tayda walaaloobeen ayaa asxaab isku dheer naga dhigtay. Kursigii xalay ayaan ka wareegay, kuwa dambe ayaan mid ka xushay. Afar gaadhi ayaannu isku raacnay. Idaacadda oo aan war kale haynin ayaa durba ka faalloonaysa sooyaalkii aabbahay. Markii ay dhowr jeer ku celceliyeen ereyga "marxuumka" ayaan sii dhegeysan kari waayey. Dadka waddada taagan oo baabuurkayga astaamaha xisbigu ku yaallaan sii eegaya ayaannu ku hagaagnay dhakhtarka weyn ee magaalada. Intii aannaan gaadhin ayaannu garan weynay meel aannu baabuurtan waddadii xidhay ka marno. Waan u fiirsaday, illaa dhakhtarka oo aan noo dhoweyn ayay taxan yihiin labada dhinac ee waddada. Dhammaantood waxa ay u yimaaddeen aaska. Astaamihii labada xisbi ayaa baabuurta dheeggooda midba gaar ugu xardhan. Maanta way walaalobeen. Baabuurkayga oo la garanayo ayay dadku soo eegayaan iyaga oo ku hungoobaya kursiga hore ee bannaan. Albaabkii ayaannu ku hagaagnay, ilaalladii ayaa hore noo fasaxday. In yar kaddibna baabuur sanduuq sida oo na hoggaaminaya ayaannu ka soo wada baxnay. Dhankii xabaasha ayaannu u jeedsannay, baabuurtii waddada dhinaceeda daadsanaa ayaa midba mar nagu soo faylay. Mar

kasta oo aan dib u eego, ishaydu may gaadhayn barta ay ku dhammaadaan. Waxa aan rajayn lahaa in aanay ujeeddadu aas ahaan lahayn. Waan ku raaxaysan lahaa. Imika se aabbahay ayaa hortayda lagu sii sidaa god uu mardhow ku keliyoobi doono. Wixii aan duco iyo quraan aqaannay ayaan kun jeer ku celcelinayaa. Xabaashii oo ay kulaallayaan dad iyo baabuur ka tiro badan kuwii dhakhtarka hortiisa tubnaa ayaannu soo gaadhnay. Baabuur ay hub saaran yihiin ayaan sheedda ka arkaa. In uu madaxweynihii goobta sii joogo ayaan fahmay. Markiiba waxa aan arkay Cali Shaandho oo meel aan durugsanayn baaburkayga ka soo eegaya. Maanta siyaasad ka ma hadlayso, isna wuu ogsoon yahay. Markii aan baabuurka ka degay, qofkii u horreeyey ee si kal iyo laab ah ii bariidiya ayuu ahaa. Hawl i sugaysa awgeed ayaan uga dhaqaaqay. Muraayadda madow ee sankayga sudhan hoosteeda illinta ka yaacaysa ayaan kolba masaxayey intii aan hawsha wadey. Dad lagu qiyaaso saddex kun oo qof ayaa goobjoog ahaa, intaa in ka badanna warbaahinta goobta sida tooska ah uga tebinaysa ayaa guryahooda ku gaadhsiinaysa. Haddii aan qof kasta oo raba in uu iga tacsiyadeeyo geerida aan u joogo, dhowr maalmood ka gayoon maayo. Intii aan awoodayey ayaan salaanta ka qaaday. Caag ayaan ahaa, hadalna waxa ay igaga dhegtay

"dhammaanteenba, dhammaanteenba". Weriyeaal hadal iga doonayey ayaan u gambiyey aniga kursigaygii dambe isku maqiiqaya. Toloow maxay i weydiin lahaayeen? Ma su'aashii cajiibka ahayd ee "dareenkaaga ka warran?". Anna toloow maxaan odhan lahaa? Malaha "dareenkaygu aad ayuu u kacsan yahay". Dadkaa hadli karaya wax weydiiya oo iska kay daaya aniga.

Markaa aan dhanka magaalada u soo dhaqaaqayey, qayb iga mid ah ayaan xabaasha kaga imid. Aniga oo aan anigii ahayn ayaan is idhi "gurigii buuqiisa ha ku noqone meel kale tag". Haddii aanay hooyaday macaan – oo imika ah qofka garabkayga u baahan – iyo carruurtayadu joogi lahayn gurigaa, ku maan qasbanaadeen. Muxiyaddiin ayaan fasaxay, telefoonka oo uu ii soo fidiyey ayaan weydiistay in uu iga hayo. Dumar aan shalmadahooda meel aan ka maro garan waayey ayaan sii dhex jiidhay si aan qolkayga ugu hagaago. Sariirtayda ayaan miciin mooday, iyada ayaan damcay in aan si ku-meel-gaadh ah ula sheekaysto.

4 INDHADEEQ

Maalintii aan qolkan soo galay, sagaal maalmood ayaa ka soo wareegay. Welina waan dhex jiifaa. Maalmuhu dheereeyaan! Gadhkan durba igu baxayna muxuu ahaa? Sownigan daankii gas ku yeeshay. Waxa aan tebayo ayaa ka weyn jidh la dhaqaaleeyo. Halka i bannaan ayaa ka weyn haddii aan ku gufayn lahaa bilicda korkayga ka maqan. Sidii qof waalan ayaan qolka dhex wareegayey markii aan dareemay naxariista qolka soo gashay. Waa hooyo. Miskiinta yari waa qof adag, in ay aniga ii calool-adaygaysana waa macquul. Indhahayga iyo kuweeda ayaa isku dhacay. Waan ka foorarsaday, way ii soo dhowaatay. Dhowr jeer oo hore oo ay damacday in ay ila hadasho, aniga ayaa ka orday. Maanta cidlo ayay iga heshay, meel aan uga dhaqaaqana ma joogo. Gacanta ayay si dabacsan ii soo jiidday iyada oo oogada sariirta farta iigu fiiqaysa. Hal mar ayaannu wada fadhiisannay. Hadal aan soo daahin ayay iga hor keentay.

- Hooyo, hooyo Faysal..

Waan ka foorarsaday indhaheedan qoyan.

- Kor ii soo eeg hooyo, ma arkaysaa diifta wejigayga ka muuqata?

Waan u jawaabi kari waayey, kor in aan u eegana hadalkeedaba daa! Way sii wadatay.

- Aabbahaa Keynaan wuu innaga wada dhintay, keligaa kaa ma uu dhiman Faysaloow. "Waan murugoonayaa" inta aad tidhi ayaad haddana qol isku soo xidhay. Aniga maxaad iga og tahay, hooyo? Weli miyaad is weydiisay sida aan habeenkii u seexdo? Ila hadal dee!

Cod ayaa iga soo bixi waayey.

- Sida aan u noolahay miyaad og tahay, hooyo? Aabbahaa anigaba wuu iga dhintay, balse imika sida aad tahay adiguna qof dhintay waxba ma dhaantid. Aabbahaa haddii aan waayey ma rabo in aan adigana ku waayo, hooyo. Hooyo Faysal, i soo eeg hooyo macaan. Adiga oo carruurta kaa yaryar tusi lahaa calool-adayg ayaad sidan u dhaqmaysaa, hooyo. Miyaanad ahayn kii ay ku dayan lahaayeen, kii tusi lahaa in uu walaalkood nool yahay? Bal imika u fiirso, toban cisho ayaad sidii wax waalan qol ku xidhan tahay oo cuntada lagu la baryayaa.
-

- Sagaal..
- Waar sagaal iyo toban waa isku mide i dhegeyso, hooyo. Imika adiga ayaa reerka nin u ah, hooyo. May ahayn in aan anigu sidan wax kuugu sheego maanta oo aad tahay nin talin kara. Nin la rabo in uu kaalintii aabbihii ka baxay buuxiyo ayaad tahay, hooyo. Xitaa xisbigii ayaa ku sugaya oo ay odayaashii doonayaan in aad aabbahaa meeshiisii gasho.

Mar keliya ayaan soo toosay.

- Yaa? Ma aniga? Maya maya, anigu ma qaadi karo xilka intaa le'eg, hooyo.
 - Waxba ha qaadin bee, aniguba imika xisbi kugu ma aamineen hooyee, mid samee. Muxiyaddiin ayaa bannaanka kugu sugaya, biyo isku shub oo qadhamuunkan is ka meydh dabeedna isaga raac. Timahan iyo gadhkan iska soo hagaaji, hooyo. Adiga oo qof caadi ah u eeg waxaad soo martaa Oday Cumar iyo xertiisii oo xafiiskii guud kugu sugaya.
 - Ma imika ayay i sugayaan?
-

- Haa hooyo ee qolkan uraya ka bax, in ay bahallo galeen ayaan u malaynayaa intii aad ku xidhnayd meeshee.

Intaa markii ay is raacisay ayay degdeg u baxday. In ay hadalkeeda i gaadhsiisay ayay og tahay. Erey kasta oo ay i tidhi ayaa ku taagan maskaxdaydan hurdada dheer gashay. Waa runteed, in ay iyadu sidan ii la hadasho may ahayn aniga oo ninkii reerka u weynaa ah. Albaab aan maalintii laba jeer ka bixi jirey ayaan ka dusay si aan musqusha ugu soo qubaysto. Indhaha socodkayga la socda ayaa iga soo gaadhaya walaalahay oo daaradda midba meel ka fadhiyo.

Lebbis ayaan isku taagey aniga oo og in uu Muxiyaddiin i sugayo, sida caadiga ah aabbo ayaa i sugi jirey. Qorrax aanan siddeed maalmood arag ayaa muuqayga ka naxday oo daruur isku qarisay markii aan guriga ka soo dhammaaday. Indhaha ayaa iftiinkii badnaa albaabbadooda ka ceshaday. Qayb iga mid ah ayaa faraxday markii aan arkay saaxiibkay oo baabuurka dhinaciisa iga soo sheedaalinaya. Gacan-qaad kaddib ayaan baabuurka fuulay, haddana waan ka degay. Wejigiisa yaabban ayaan siiyey jawaab uu u garaabay.

- Inna ga dhig gaadhigan, kaa kale ee aan la garanayn innoo kaxee walaal.
-

Wadajir ayaannu ugu dhaqaaqnay dhanka suuqa iyo goobtii aan timaha ka jaran jirey. Aniga oo gas leh ayaan galay, bustaan ayax maray aniga oo ka qaab daran ayaan kursiga si dhuuban dabada ugu qotomiyeey. Axmed Jiir oo yaqaannay sida aan u xiirto ayaa wejigayga dib uga faagtay. Kaftan naga dhexeeyey ayuu isku dayey in uu sheeko ku furfuro.

- Aar abti sowdigan digaagad xafashtay u eekaaday.

Runtaa fiicane xabaddaasi way iga qoslisay. Afka ayaan degdeg isugu qabtay aniga oo dareemaya in uu qosolkaasi dembi agtayda ka yahay. Wuu sii watey.

- Ma ninkaaga sidan u eeg ayay dadkuna doonayaan in uu madaxweyne noqdo.

Hadad aan la yaabay ayuu iga noqday.

- Madaxweyne maxay ah? ayaan u celiyey.
- Oo dee miyaan waxba lagu sheegin?

Muxiyaddiin oo wejiga iga la ordaya ayaan ka daba tuuray:

- Waar ninku muxuu ka hadlayaa?

Jiir oo moogganaantayda ka yaabban ayaa mawduucii beddelay. Madaxa oo dhan ayuu xumbo iiga buuxiyey. Hoos ayuu u soo

dhaadhacay isaga oo wejigana u eekaysiinaya. Saacad wax ku dhow markii uu hawshiisa waday ayuu i fasaxay. Nin kale ayaan u eekaa markii aan dhankii baabuurka gucle ku soo gaadhay. Isaga oo aan weli fadhiisan ayaan su'aal i gubaysay la gaadhay.

- Waar Muxiyaddiin, ninku muxuu ka hadlayey? Dadka madaxweynenimada ila rabaa waa ayo?

Shan jeer oo isku xigta ayuu cantuugooyin candhuuf ah liqay.

- Maalmihii u dambeeyey waxa sare u kacay sumcaddaada, geeridii aabbo oo aynu dhammaan ka wada xun nahay ayaa keentay in taageeradii xisbigu kor u kacdo.
 - Yaa?
 - Haa, weliba adiga gaar ahaan.
 - Aniga hee?
 - Yacnii dadku waxay rabaan in aad adigu guddoomiye xisbiga ka noqoto.
 - Dadkee, ma shicibka? Shicibku waxba ma oga, xisbigu ma dhaxaltooyaa?
-

- Shicibka oo keli ah maaha, Oday Cumar..
- Oday Cumaraa?
- Laftiisa, iyo dhammaan asxaabtiisa. Golaha dhexe ee xisbiga oo dhan ayaa isku raacsan.
- Waar maxaad leedahay imika?
- Imika iyaga ayaa ku sugaya, dhankii xafiiska ayaynu tegaynaa.

Mahiigaan cir buluug ah ka hooray ayuu hadalkiisu igu noqday. Si kasta oo aan siyaasadda u jecelahay, haddana weligay tan oo kale meesha ma aan soo dhigan. Barta u sarraysa ee sallaanka siyaasadda ayaa ii bannaan, anna diyaar u ma ihi in aan kaabad kale fuulo. Runta marka la sheego, midda aan ku taaganahay imika ayaan rabaa in aan ka dhaadhaco. Maalmaha qaar, wax walba waan ku iibsan lahaa furaha albaabkan maanta ii ballaqan. Wax walba, marka laga reebo geerida aabbahay. Sidan in aan guddoomiye ku noqdo ma rabo. Xafiiska oo ay beri hore iigu dambaysay ayaannu ganjeelka weyn ka soo galnay. Gudaha dhismaha ayaan uga soo gudbay qolka shirarka. Codad aan garanayo ayaa durba dhegahayga soo gaadhaya. Bartooda ayaan ku doontay. Dadkii ay ka soo

baxayeen ayaan hor istaagay. Waa Oday Cumar, caaqil Mustafe, ganacsadaha weyn ee Maxamed Gaab iyo Muxumed Caabbi. Waa xudduntii xisbiga, maskaxdii iyo dhaqaalihii oo meel wada jooga. Saaxiibkoodii shanaad ayaa ka maqan. Dhammaan fadhiga ayay ka kaceen. Waan xishooday. Soo-dhoweyn kal iyo laab ah, hadallo googoos ah oo aan dhanna haysan kaddib iyo codkayga oo xummaddiisa la eegay kaddib ayaa hadal la ii galay. Muxiyaddiin oo aan garab ka dhigan lahaa ayaa fahmay in aan meesha looga baahnayn, bannaanka ayuu u booday. Runta ayaa wacane waan yara naxsanaa, maaha odeyaal aayar uun la hor fadhiisto. Walow ay aqoon fiican ii leeyihiin, anna aan kun jeer oo hore la shaqeeyey, haddana sidan oo kale isugu ma aannu keliyoobin. Gaar ahaan, wejiyadoodu sidan oo kale u ma ay ahayn. In aanay xaaladdu saalloonayn, way ii dhacday. Waxa aan damcay in aan hadalladooda dhuuxo inta aanan juuq odhan kahor. Oday Cumar ayaa sidii caadiga ahayd bilaabay.

- Adeero horto soo dhawoow, waxa wax Ilaahay loogu mahadiyo ah in aad maanta adiga oo Faysalkii aannu naqaannay u eeg aad na hor fadhido.

”Ilaahayoow nin aan waxba ogeyn ha cadaabin” ayaan hoos u idhi.

- Waxa ay ka dhigan tahay in ay maanta tahay ammintii saxda ahayd ee aayaha xisbigan lagaga tashan lahaa. Sida aad og tahayba adeer, xisbigan hawl dheer ayaa loo soo maray. Adigana lagaaga sheekayn maayo oo shaqada aad gelisay waad og tahay. Waxa aad la socotaa..

Sheeko dheer ayuu halkaa ka galay, wax aanan ogeyn ii ma uu sheegin.

- ..Ilaahay ha u naxariisto aabbo, saaxiib qaali ah ayaa anigaba iga dhintay. Laakiin maanta waxa la joogaa wakhtigii murugada loo rogi lahaa farxad iyo dadka oo aynu siinno wixii aynu u ballan qaadnay. Maanta xisbiga Bulsho waxa uu haystaa awood aanu weligii hore u helin, waa xisbiga ugu taageerada badan waddanka oo dhan. Taasna waxa keenay dhowr shay, dhammaantoodna geerida naxdinta leh ee dalka oo dhan ka naxsatay ayay salka ku hayaan. Dad badan oo aan go'aansan xisbiga ay taageerayaan ayaa imika innagu soo biiray, kolley waxa ay ku qanceen taariikh-nololeedkii aabbo ee illaa

maanta warbaahinta haysta. Qaar kale oo naxdintii innagu soo dul suuxay ayaa jira. Qaarna waxa ay ka soo baxeenba xisbigan Shaandho.

Caaqil Mustafe ayaa is hayn kari waayey oo soo dhex galay.

- Dee jacaylka isaga loo qabana u sheeg..
- Waan soo wadaaye ii kaadiyoo – kow dheh adeer. Dadkuna waxa ay ogaayeen sida aad aabbahaa ugu dhoweyd, sida aad guulo badan uga soo hoysay gobollada dalka oo dhan iyo dee kaalinta guud ee aad xisbiga ku leedahayba. Maanta adeer waxa annu kaaga fadhinnaa in aad hayaanka ka sii waddo bartii aabbahaa geeddiga ku furay.

Intaas ayuu la soo fadhi weynaa. Waan aamusay, haddana hadlay.

- Adeero wallaahi hadalka aad i tidhi culayskiisa waan dareensanahay. Laakiin imika diyaar u ma ihi xilkaas isaga ah, ayaan ugu soo koobay.

Mar keliya ayay jabaqdii go'day. Maxamed Gaab ayaa dhaqaale iyo wax aan loo joogin ila galay.

- Faysaloow malaha maad fahmin waxa uu adeero ku yidhi. Maxaad leedahay "diyaar u ma ihi"? Bal i fahansii halkaa! Ma xisbiga aad ogeyd dedaalka aynu gelinnay ayaad sidaa leedahay? Ma xasuusataa sida aynu dhaqaalaha u soo baryi jirney ganacsatada? Maantana iyaga ayaa inna la baryaya ee ka warran? Markaa maxaad uga jeeddaa "diyar u ma ihi"? Ma adigaa odhan kara..

Caaqilkii ayaa ka soo dhex galay, hadal sii holcayey ayuu dhanka dabaysha ka maray.

- Waar mayee bal u kaadi Maxamedoow inanka ha canaanane. Adeer Faysaloow..

Waan ogahay in aanu isaguba wax kale ii soo wadin, si kale ayuun buu iigu dhigi doonaa.

- Bal adeer waa la'is waraystaaye, maanta oo aynu xukunka dalka la wareegi karno, doorashadiina laba bilood innaga xigaan, rag badanna xilkan isku dili lahaayeen, maxaa keenay in aad diiddo?

- Adeero dhammaantiin waan

dareensanahay xilka dushiinna saaran, mas'uuliyad ayaana idinka hadlinaysa, waxa kale oo aan ogahay mas'uuliyadda aad ila rabtaan iyo baaxadda ay leedahay, waxa aan jecelahay in aan idiin sheego in aanan lahayn dhabar qaada.

Oday Cumar ayaa la booday.

- Faysaloow adeero, wax yar i dhegeyso. Aabbahaa inta uu u soo halgamay xisbigan aniga ayuun baa og. Maalmihii u dambeysay oo uu xanuunkiisu sii batay aniga ayuu ahaa qofkii ka dalbaday in uu yara nasto. Isaga ayuu ahaa qofkii ii sheegay in aanu rabin nasasho. Waxa intaa xiijinayey miyaad garanaysaa? In uu dadkiisa qabyaaladda ka xoreeyo. Maanta markii ay suurto gal noqotay in aad adiga oo inankiisii ahi diiddo, waxa ay guuldarro ku tahay aabbahaa, isaga dartii in aad u samayso ayaa wanaagsan, waayo maanta adiga ayuu kuu baahan yahay.

Waan adkaysan kari waayey.

- Aabbahay wuu dhintay, weligiina ma soo noqonayo. Wax kasta oo madixiisa ku jireyna way la dhinteen, riyoooyinkiisii ayaa ka mid ah. Qof dhintay ayaad guuldarro adduunka ah uga baqaysaa. Aabbahay wuu dhintay, haddii uu wax iiga baahan yahayna waa duco. Bes. Aniga oo ixtiraam iyo qaddarin idiin haya, xilkan diyaar u ma ihi. Siyaasaddana iyada ayaan ku eedaynayaa in ay aabbahay dishay, iyadana waan ka baxay. Guul ayaan idiin rajaynayaa.

Waan ka soo baxay. Waxa aan u qaadan waayey in ay adduunyo iiga sheekeeyaan aniga oo dhammaanteedba nacay. Maxay faa'iido leedahay? Adiga oo maanta neefsanaya in berri lagu waayo. Adiga oo hebel ah marka "meyd" laguugu yeedho. Maxaan kaga daalayaa?

Muxiyaddiin oo bannaanka taagan ayaan furihii baabuurka ka qaatay. Tilifoonkaygii oo aanan beryahaa arkinna wuu ii soo fidiyay. Madaxa oo buur ka weyn ayaan baabuurka ku dhacay. Wax aan maqlayey ayaan jirin. Isaga oo hadlaya ayaan ka dhaqaaqay. Dhanka magaalada looga baxo ayaan afka u jeediyey. Ban cidlo ah iyo magaaladii oo dhabarkayga martay ayaan

istaagay. Baabuurka ayaan ka degay. Nafta ayaan la xisaabtamay, waan is dejiyey. Go'aan dareen ku salaysnaa ayaan gaadhay. In aan siyaasadda sidaa ku joojiyo, reerkayga oo ii baahan aan u tago. Noloshayda inta ka dhiman in aan agtooda joogo ayaan si xamaasadaysan nafta ugu sheegay. Go'aanka noocaas ah kaddib ayaan magaalada ku soo noqday, muddo dheerna ku dhaqmayey.

Maalinta inta tagtay ayaa ka badnayd inta hadhsan. Qorraxda ayaa shaqadeeda intii badnayd qabsatay. Istaanka basaska meel aan ka dheerayn ayaan ku sugayey Muxiyaddiin. Waxa ay ahayd marka aan ugu necebahay wakhtiga, naftayda ayaan ku keliyoobay. Inta aan buuq amma maaweelo kale ku jiro, nafta ayaan illowsiiyaa xanuunka. Marka aan keli noqdo ayay murugadu cadho ay ii qabtay igu dhirbaaxdaa. Sida imika oo kale ayaan keligeys iska ilmeeyaa. Nafta ayaa i tusta sida ay noloshaydii isu beddeshay, wakhtiga ayaa u markhaati kaca, indhuhuna qoyaana ayay ugu jiibiyaan. Aabbahay Ilaahay ayaa qaatay, siyaasaddii anaa ka tegay, farxaddiina iyada ayaa iga dhooftay. Wax badan ayaan is tusay, mugdi ayaan farta isugu fiiqay, qalbiga ayaa dareemay in aan qol madow ku xidhay. Dhan kasta ayaan eegay si aan iftiin aan bidhaansado u helo, waan la waayey. Dhanka aan eegaaba "iga jeedso"

ayuu i yidhaa. Albaab kasta oo furnaan jirey ayaa hadda meeshiiba ka guuray. Afar derbi oo naxaas ah oo hareerahayga qotoma iyo mid shanaad oo ku gambiyan, aniga oo garan la' meel aan uga baxo ayuu telefoonku yeedhay. Waa farriin kooban.

- Hey!

Muddadii la soo dhaafay ee bisha iyo saa'idka ahayd, meel kasta oo aan kala xidhiidhi karayey waan tijaabiyey, natiijo-la'aan. Maanta, aniga oo aan fileyn, in ay albaabkayga sidan dahsoon u soo garaacdo maan sugayn. Qoraalkeeda yar ee aan saddexda xaraf ka badnayn ayaa i gilgilay. Qoloftaydii murugada la dumaysay ayaa iftiin aanay filayni u baxay. Dhimbiiil aan moodayey in ay bakhtiday ayaa dambaskii ku dahaadhnay laga afuufay. U malayn maayo in aan weligey sidaa oo kale qof ugu farxay weligay. Cidhifka aan xadhiga dareenka ka laallaaday, cidhiifkiisa kale ee barwaaqada ah ayaan mar keliya si qumaati ah ugu booday. In uu qof sidaas oo dhan qof kale u saamayn karo, maalintaas ayaan bartay. Ilmadii iga dhacday ee shaashadda telefoonka dul fadhiday ayaan degdeg uga masaxay. Magaceeda oo aanan beryahaa arkin ayaan kun jeer akhriyey. Waa iyada lafteedii. Malaha raalligelintii aan u diray ayay aragtay. Intii ay ii

soo qortay in la mid ah ayaan u diray. Jawaab ayaan sugay. Cabsi ayaan dareemayey, ma garanayo sababta. Qoraal aan raagsaday, balse noqon doonaa mid aanan weligeey illoobin ayay ii soo qortay.

- Miyaad ii cadhoonaysaa?

Maxaa lagaga jawaabaa su'aal noocaas ah, ka timid qof aad si weyn u danaynayso, kuu timid wakhti aad wehel u baahnayd. Marka laga tago micnaha tooska ah ee su'aasha, waxa aan dhadhansaday micnaha dahsoon. Waxa aan halkaa ka ogaaday in aanay ii cadhoonayn iyadu, in ay wax walba iga saamaxday iyo in uu – haba yaraadee – dareen yari ii soo celiyey. Mid keliya ayaan hubaa, taasina waa in aan anigu dareen u qabo iyada. Si aanay ii raagsan ayaan jawaab u celiyey.

- May, aniga ayaa isu cadhoonaya. In aan anigu halkaa is dhigay ayaan aaminsanahay.
 - Waxa aan filayaa in uu shaydaan inna dhex cararay, iga raalli ahow.
 - Dhib ma laha. Dib aynu isu baranno.
 - Kkkkk haye.
 - Magacaygu waa Faysal.
-

- Anna waa Indhadeeq.
- Barasho wanaagsan.
- Barasho wanaagsan.

Dhaxan ayaa iga duushay, jiilaal aan ku jiray ayaa gu' xooluhu wada irmaan yihiin isku beddelay. Qorrax hoyatay ayaa godkii ku gam'i weydey oo ka soo noqotay. Dareen aan illoobay sida loo la tacaalo ayaan gadhwadeen ka noqday. Indhaha oo qoyaanka la bartay ayaa markii u horreysay qallalay, afka ayaa i kala tegay. Dhoolla-caddayn jidhku ka qaloonayo ayaa foolka badhtankiisa igaga sawiran. Caloosha oo i bannaanaan jirtey ayaan maanta dareemayaa in ay ii soo noqotay. Naftayda oo cilladdeeda la saari waayey, iyada ayaa dawadeeda noqotay. Qofkii aan daqiiqado kahor ahaa, aad ayuu uga duwan yahan kan aan imika ahay. Maalintaasi waxa ay ahayd maalintii aan ugu murugada badnaa, barta ugu hoosaysa ayaan joogay. Wax walba waan ka quustay markaa ay ila soo xidhiidhaysay. Markii ay farriinta u horreysa ii soo qoreysay, waxa ay ahayd markii aan u liitay. Haddii aan ogaan lahaa in ay Indhadeeq ii soo socoto, nafta maan dhibeen. In ay ila soo xidhiidhay isla daqiiqaddaa aan ugu liitay, kaddibna ay farxad i gelisay, waa astaan aan u arko in ay Ilaahay iiga

timid. Maaha wax aayar uun isku beegmay. Wax nasiib wado way ka badnayd, anna maan dhayalsan.

5 WAAN KU SOO JECLAANAYAA

Maalintii xigtay, halkii ay shalay joogtay waa in aan ka bilaabbo. Markii u horreysay muddo dheer, xalay si fiican ayaan u seexday. Rejo ay i gelisay ayaan saaka la soo toosay. In aan ka war doono ayaa qasab ah.

- Iska warran? ayaan u diray.
- Waan fiicanahay, adigu ii warran?

Bariido kooban kaddib ayaan anigu is weydiiyey in ay og tahay geerida dhacday iyo in kale. Aniga oo aan fikirkaa ka dhammaan ayay ii soo qortay:

- Siyaasaddiina ka warran?

Waxa aan fahmay in aanay waxba ogeyn. Jawaab ii diyaarsanayd ayaan u diray.

- Siyaasadi ma jirto.
- Maxaa dhacay?
- Wax badan ayaa is beddelay intii aynu kala maqnayn.
- Maxaa is beddelay?
- Aabbo sowkii geeriyooday.

Hakad aan naxdin u fahmay ayay qoraalkii gelisay. Way soo rogaal celisay.

- Alla walaal bisinka, maan maqale, walaal Ilaahay ha u naxariisto. Ax, wallaahi waan naxay.
- Aamiin walaal, aamiin.

Su'aalo kale oo ay iga sii weydiisay ayaan jawaab ka siiyey.

- Markaa siyaasaddiina?
- Walaal waan ka baxay, siyaasaddii waan iska dhaafay.

Intaa marka aan qorayey, waxa aan rajaynayey in ay i soo dhoweyn doonto. Maaddaama oo ay siyaasaddu ahayd midda aannu ku collownay, imika markii aan iska dhaafay waa in ay ii soo dhowaato. Waxa aan rajaynayey in aannu sidii hore isa ga soo dhowaan doonno.

- Wax siyaasadda dhaama ayaad ka shaqayn doontaa walaal, bahashaasi ma wacna.
- Waa run walaal, aad ayaan runtii u xiisayn jirey. Siyaasaddu waxa ay ahayd wax aabbahay igu ababiyey, waxyaabbo

badan oo uu ii sheegay waxa ka mid ahayd in siyaasadda dhanka xun soomaalidu ula kacday, waajibkaygana ay tahay in aan wixii aan awoodo ka geysto. Laakiin isaga la'aantii dhadhan ma laha.

- Waa run walaal, waan fahmi karaa.

Haasaawaheeda ayaa daawo ii noqday. Qof in la la sheekaysto u baahan ayaan ahaa, imika waan helay qofkii aan ku nafisi lahaa. Aqoon isku ma lihin, haddana waxa aan ugu warramayaa sidii qof ila rafiiqday oo kale. Habka ay iigu jawaabayso ayaa ii fududaynaya in aan u gudbiyo sida aan dareemayo.

Qof wehel leh ayaan noqday, qof haysta qof uu u soo boholyoobo ayaan noqday. Maalinta dhan waxa aan ahaa mid marna iyada la sheekaysta, inta aannu kala maqan nahayna wixii ay i tidhi dib u akhriya. Inta aan ugu jecelahay ayay ahayd, in aan dib u akhriyo wixii ay ii soo qortay. Erey kasta, xaraf kasta gaar ayaan ula bixi jiray si aan nafta uga beddesho. Micnaha guud ee weedha ay ii soo qorto ayaan toban jeer ku celceshan jirey. Waan iska laabi jirey, laba ilbidhiqsi inta aanay ka soo wareegin ayaan dib u furi jiray si aan intii uun mar kale u akhriyo. Waalli aanan dareensanayn halka ay ku dambayn doonto ayaa albaabka igu garaacaysay.

Dadnimadeeda ayaa sida duufaanta ila tegaysay. Awood aan iskaga caabbiyo maan lahayn. Sida xaqiiqdu tahay, maan rabin in aan ka gabbado. Markii ay "maad ii cadhoonaysaa?" ii soo qortay, markaas ayay naftayda yeelatay. In ay iyadu og tahay, taas ma hubo.

Laba maalmood oo keli ah ayaa tegay intii uu xidhiidhkayagu soo laabtay, haddana durba dhowr jeer ayaan uga warramay sida aan aabbahay u tebayo. Dhawaaqa hooyo ay Sarreeyeheeda ku baryayso ayay dhegahaygu maalayeen markii indho ilmaynaya aan ku akhrisanayey farriimaha ay igu dejinayso. Waxa ay ahayd markii u horreysay ee aan qof u soo bandhigo sida weyn ee aan aabbahay u tebayo. Illinta oo wadiiqooyin ku yeelatay dhabannadayda ayaa meesha ay martaba gubaysay. Wehelkaygii koowaad in uu ahaa ayaan uga sheekeeyey, tabobarahayga aan jeclaa in uu ahaa ayaan u sheegay. Faraha oo i gariiraya ayaan xarfo qalad ah la dhacayey. Wax kasta oo aan dareemayey ayaan u bandhigay. Ma garanayo sababta aan sidan oo dhan ugu warramay. Qofka aanad aqoon ayaa fudud in aad waayahaaga uga sheekeyso, waayo waxa aad og tahay in aanu ku xukumayn oo uu ku dhegeysanayo. Mise taas oo keli ah ma ay ahayne iyadu Indhadeeq ayay ahayd. Haddii aan rabo in aan gabadh aan aqoon ii lahayn u

sheekeeyo, boqollaal ayaan helayey. Maxaan kuwaa mid uga dooran waayey. Iyadu gabdhaha la mid ma ay ahayn. Qalbiga kiisa wanaagsan ayaa laabteeda ku jiray. Sida ay u tixgelinayso erey kasta oo aan u diro, ayaa i deeqday.

Maalintii in aannu hal mar soo wada xidhiidhno ayaa caado naga noqotay. In ay ka badato nafta ayaa rabta, balse waannu isku cusub nahay. Muddo maalmo ah ayaan ku noqday ninka adduunka ugu farxadda badan. Waxa aan maqli jirey in marka Ilaahay albaab kaa xidho, mid kale ayuu kuu furaa. Ganjeel ayuu ii furay. Xiisaha aan u qabo ayaa xawaaraha korodhkiisu ka dheereynayey ka ilayska. Dabcigeeda ayaa i deeqay. Inta aan ka barto in labadeed ah oo xiiso ah ayaan u sii qaadaa. Sida basasha oo kale, gal marka aan qaadaba, mid ka sii qurxoon ayaa ka hooseeyey. Waxa aan aad ula yaabay in uu jiro qof iyada oo kale ah. Sida ay u hadlayso, fikirka caafimaadka qaba ee ay wax walba ku kala shaandhaynayso iyo qalbigan saafiga ah. Awood ayay igu muquunisay, durba waa la'iga awood badiyey. Ninkaygii weynaa, ey waslad hilib ah la hor qaaday ayuun baan noqday. Sidaas oo ay tahay waxa aan ogahay in aannu guur mustaqbalka ahi suurtoagal ahayn oo labadayada na dhex maraa. Taasina waxa ay ku salaysnayd Cali Shaandho oo aan weligii inantiisa i siiyeen. Xaqiiqo ay naftu indhaha ka

qabsatay. Indhadeeq waxa ay noqotay qofkii weligeyba iga maqnaa ee aanan ogeyn in uu iga maqnaa. La'aanteed waan kala dhinnaa, imika ayaan ogaaday. Nin kasta oo aan aqoon u lahayn ayaa ayaan daran. Aniga oo Faysal ahina waan ugu nasiib wacanahay. Midda yaabka leh ayaa ah, marka aannu qoraal ku sheekeysanayno, sidii dad weligood aqoon isu lahaa ayaannu u wada hadlaynaa. Labada maalmood ee uu xidhiidhkayagu socday, labaatan sanno ayaad mooddaa. Markii u horreysey sidii aabbo u geeriyooday, farxad ayaan sariirta la tagaa. Qolka hoosta ayaan kaga jiri karaa inta aan doono, bilaa murugo. Sawirkeeda habeenka oo dhan ayaan daawan karaa, bilaa hurdo. Maalinta oo dhan sawirka xiga ayaan u nagaan karaa, bilaa shaqo.

Magaceedan iyo suuraddeedan sida cagta iyo kabta isu leh ayaan saacado ka fikiri karaa. Qoraal ay ii soo qortay ayaan kun micne oo kala macaan u samayn karaa, aniga oo og in uu jiro micne kun iyo koowaad oo aan illoobay. Hawada ayaan kala socdaa hawlaha ay maalinta oo dhan qabanayso, tilifoonkaygii oo aanan dan ka geli jirin ayay boggiisa burcad ii marisay. Qof aad raalli ka tahay, ma weydid si aad ula hadasho.

Intii hore sheekadu qoraal ayay ahayd, haddaba yarkan Faysal ee meesha qoslayaa, ma

uu sugayn tan oo kale. Aan iska jeclaado qof aanan aqoon, walow ay taasiba geesinnimo tahay, haddana fulaynimo badan ayaa igu jirta. In ay iyadu fulay iga dhigtayna garan maayo. Qorraxda ayaa barqo joogtay markii aan qalbi Indhadeeq ku jeeda la galgalanayey. Sidii ilmo yar ayaan beerka u jiifay markii ay ii soo dirtay:

- Fiidiyow iska soo duub oo ii soo dir.

Hoogi weyney! Waa in aan hadlo markaa, sow maaha? Waa marka koowaade qof aan ii jawaabayn u ma duubi karo muuqaal oo waan isku dhex yaacayaa, midda labaad Ilaahay ayaa runta jecele Indhadeeq muuqaalka loo duubayaa waa in uu ahaadaa mid iyada oo aroos loo socdo la iska duubay. Diifoo ayaan u eekahay ay furaashka is dagaaleen. Indhadeeq yaa diidi kara? Iyada ayaa muuqaal iska soo duubtay, malaha fulaynimadayda ayay aragtay. Walow ay siyaasad ahayd, qol madow ayay joogtay. Codkeeda oo keli ah ayaan maqlayey. Waxa ay ahayd markii u horreysey ee aan codkeeda maqlo. Ilaahayoow maxaan jidhidhicooday! Haddii ay sagaal ahayd, imika waa toban. Dhibicdii dhiilka ka dhinnayd ayuu codkeedu noqday. Ereyada naqaska wata ayaa u eekaa in ay ka soo bexeen dhuun xalay oo dhan malab lagu duugayey. Carrabka sida dabacsan ugu dhex ciyaaraha debnaha dhabarkooda ayaa u

eekaa mid ku carbisan qaddarinta xarfaha uu soo daaddihinayo. Xaad kasta oo dhegtayda ku taalla ayaa ku ciyaaraysa codkaa laxanku saarnaa. Dhego taah iyo hiin-raag daashadeen ayaa dhowr jeer ku ceshaday dhegeysiga waxan ay micnayn kari waayeen wanaaggooda. Iyaga iyo qalbiga ayaa dhowr qurub u kala goostay. Taas ayaan la dhacsanaa markii aan u duubay muuqaal aan wax badan laga arkayn oo cod tacbaan ahina ku ladhan yahay. Marka laga tago sida aan ugu diirsaday codkeeda, arrintani albaabbo kale ayay furtay. Haddii aan guriga lug keli ah kula jirey, imika labaduba gudaha ayay yaallaan.

Weji cusub ayuu yeeshay xidhiidhkii noo dhexeeyey. Waxana mar walba yaab leh; sidii dad weligood aqoon isu lahaa ayaannu u wada jaanqaadaynaa. Cabsida igu jirta marka laga tago, waxa meesha ka maqan is yeelyeel. Dadku inta badan marka ay isku cusub yihiin, wejiyo aan kuwooda ahayn ayay isku la dhaqmaan. Been hadhow marka la is barto soo baxda. Taasi meesha way ka maqnayd, laba sababood awgood. Aniga oo ku jiray xaalad bannaanka soo dhigtay dabeecadahayga oo dhan, iyada oo naxariista iyo qalbiga wanaagsan u dhalatay. Waxa aad ii soo jiitay sida aanay u dhibsanayn marka aan murugadayda kula dul dhaco. Waa abaal aan weligey u hayn doono. Waxa ay

noqotay gacantii i qabatay markii aan u baahnaa. Hal maalin ma ay soo daahin. Maalintii iigu darnayd ayay ahayd markii ay "hey!" ii soo qortay. Aniga oo u qaadan la' iyada ayay ahayd qofkii sida qabow ii weydiisay "miyaad ii cadhoonaysaa?"

Weji furan ayaan qolka kala soo baxayey aniga oo hooyo si fiican u sii salaamaya marka aan Muxiyaddiin suuqa u raacayo. Mid ka sii furan ayaan ku soo dhaafayey marka aan qolkayga ku soo ordayo si aan qofkii wanaagsanayd xogteeda u helo. Qof firfircoon ayaan noqday oo dadka la sheekaysta, carruurta la ciiyaara. Hooyadii qof ka farxiya ayaan noqday. Qof werwerkii ka qaaday ayaan noqday. "Hooyo waa maxay sowdigan qof caadi ah noqday?" ayay si taxaddir ku jiro ii weydiisay maanta. "Dee ma oohin ayuun baan wadaa illaa qiyaamaha?" ayaan si kaftan ku jiro ugu celiyey. Allahayoow yaa u sheega! Haddii ay ogaan lahayd, Indhadeeq ayay madaxa saaran lahayd. Haddii ay mar uun dareemi lahayd in inankeedii wax wanaagsani heleen, inantaa meesheeda ayay ku doonan lahayd. Waa haddii ay og tahay meesha ay joogtee.

Maalintii aannu shirka isugu soo galnay ee ay iga xanaaqday, laba maalmood kaddib ayay waddanka ka dhooftay. Dhul qalaad ayay waxbarasho u joogtaa imika. Nasiibkayga ayaa

iska noocaas ah, waxa uu i siiyo wax u dhigma ayuu iga gooyaa. Indhadeeq ayuu ii soo celiyey, dhul fogna wuu iga geeyey. Haddii ay Dalsan ila joogi lahayd, hawshuba way fududaan lahayd.

Wakhtiga intiisa badan waxa aan ku qaataa weydiinta ah "miyaad riyoonaysaa?". Indhadeeq ayaad la sheekaysataa ayaa iga dhaadhici la' weli. Naftaydu beenta isu ma sheegto, waxa ay og tahay in ay inantani kun jeer iga wanaagsan tahay. Inta badan waxa ay ii sheegtaa in aanan u qalmin iyada. Waan u garaabaa oo ku ma diido, balse nin qalbigu u fikiro ayaan ahay. Isaga ayaa i haga, isaguna Indhadeeq ayuu rabaa. Weligey waxa aan la yaabi jirey dadka daroogooyinka isticmaala, marka lagu yidhaa "iska dhaafa"-na ku jawaaba "ma awoodno". Indhadeeq waa daroogadaydii. Iyada ayaan wax kasta ku iibsana lahaa. Sidaas oo ay tahay, wax ayaa igu leh "suurtogal maaha waxan aad waddaaye jooji". Ma aha cod aan rabo in aan dhegeysto. Marka aan kadar geliyo sawir aniga iyo iyada ah ayay siyaasadda iyo aabbeheed oo wada socdaa iga jiidhaan. Dhisme aan laba ilbidhiqsi ku taagay ayay hawo ku sheegaan. Badweyn aan dhex jiifo ayaa bataax igu noqota. Indhuhu iyada ayay arkaan, dheguhu iyada ayay maqlaan, qalbigana way iga la baxday goor aan soo dhowaan.

Da'dayda marka aad eegto, ma ihi qof uu jacaylku u cusub yahay. Dhallinta maanta joogta

marka aan ka mid ahayna, ma aha iyadu qofkii u horreeyey ee aan xidhiidh la wadaago. Sidaas oo ay tahay, weligeysidan oo kale qof u ma aan dareemin. Ma jirto gabadh sideeda oo kale wadnahayga hab-dhiciisa siday doonto ka yeeshay. Ma jirto gabadh sideeda oo kale aan iska dhoolla-caddeeyo marka ay madaxayga soo gasho. Dadka ayaa ii haysta wax dhiman, nin weyn oo meelahaa keligii iska qoslaya. Sida aan dareemayo haddii ay ila dareemi lahaayeen, way ila qosli lahaayeen. Balse maxay ka og yihiin, Indhadeeq maxay ka yaqaannaan? Waa jowharad aan keligay iska leeyahay.

Dhallinyartu way is xaal og yihiin, suuqooduna waa isku meel. Waxa jirta dhallinyaro badan oo rag ah, si gaar ahna aannu isu la soconno. Tartan hoose ayaa naga dhexeeya. Waayo qof waliba wuu og yahay kuwa uu sida gaarka ah isa ga eego. Aniguna waxa aan leeyahay dhallinyar aan weli guursan, si gaar ahna aan ula tartamo. Waa dhallinyar aan is leeyahay waxa ay heli karaan gabadh kasta oo ay doonaan. Nimankaas oo dhowr ah ayaa dhammaantood dusha ka eegta Indhadeeq. Yaab ma laha oo isku si' ayaannu wax u eegnaa, balse mid ayaan mar walba ku farxaa. Middaas oo ah in aan anigu Indhadeeq hantiyay. Waxa maskaxdayda ka weynaatay in ay Indhadeeq aniga iga dooratay raggaas iyaga ah. Farxad

saa'id ah ayay i gelisaa. Tartan aan la ogeyn goobta uu ka dhacay ayaan dhowr jeer ku guulaystay.

Marka aad qof is baranaysaan, dhowr weji ayay barashadaasi yeelan kartaa. Dhowrkaa weji ayaa dhowr hab u soo kala horreeya. Dhowrkaa hab intooda badan, sheekadu waxa ay ku bilaabantaa barashada iyo su'aala qallafsan ee ah "xaggeed deggan tihiin?", "imisa carruur ah ayaa kula dhashay?" iyo qaar jawaabahoodu "haa" iyo "maya" yihiin. Is-barashada dhexdayada maraysa ayaa si kale u socota. Iyada ayaa na hagaysa. Ma aha mid aannu annagu sii diyaarinno sida ay noqonayso. Waxa ay ku bilaabantay in ay ii noqoto dhakhtarkayga gaarka ah ee dhanka xiska. "Walaal magacaa?" waxa beddeshay "walaal waan ka xumahay waxa ku helay". "Waad shidan tahay" waxa beddeshay "waan kuu ducaynayaa walaal ee iska aamus ha ooyine". Su'aalihii kale ayaa gadaal ka yimid. Imika markii aan degay ayaan bilaabay in aan sidii qof caadi ah wax u weydiiyo. Walow aannu weli marxalad bilow ah maraynay, haddana su'aalahayga ayaa mar walba ku bilaabmi jiray:

- Maxaad ku hawlan tahay imika?

Habkaas oo ahaa habka ugu fudud ee aad hadal ku furi karto marka aad qofka rabto in uu keeno hadal cimri dheer.

- Walaal jaamacaddii ayaan joogaa.
 - Alla, sorry walaal. Maan ku dhibayaa?
 - May may.. talk to me.
 - Haa, ok. Maxaad baranaysaa horto?
 - Bare carruurta ah.
 - Wow.. masha Allah, waad ku soo baxaysaa weliba
 - Lol.
 - Carruurtaasaa nasiib leh aad wax u dhigi doonto.
 - Haha what makes u say that?
 - Waad qalbi wanaagsan tahay.
 - Thanks lol. What r u up to?
 - Gurigaan joogaa, imikaan suuqa ka soo galay
 - Durba?
 - Haa walaal, waan nacay suuqiiba, gurigaan ka jecelahay.
-

Qoraalka ayay wax yar la daahday, garaaca wadnahayga ayaa ii oggolaan waayey in aan sugo. Waxa aan isku qanciyeey in aan wakhti qaldan la xidhiiday.

- Walaal iska shaqayso, yaanan ku dhibine.

Waxa igu jira dareen aan iga dhammaan meel kasta oo aan joogo. Waxa aan cuqdad ka qaaday cadhadii aan ka cadhaysiiyeey berigii iyo ciqaabtii aan u maray, waxa ay igu reebtay cabsidan joogtada ah ee aan iyada u ilaalinayo si xad-dhaaf ah. Waa qof dabeecad furfuran leh sida ay illaa imika ii la muuqato, balse mar walba waxa aan is leeyahay ”malaha hadal aan habboonayn ayaad u dirtay”. Mid kalena way jirtaa, mar kasta oo aan farriin u diro oo jawaab ilbidhiqsiyo gudahood ah aan ku waayo, waan werweraa. Ma sheegi karo sababta aan u werwerayo. Is ma odhanayo qofku waa nafley oo mashquul ayuu ahaan karaa. Waan ogahay in aanay aniga meel iigu xidhnayn amma farriintayda sugayn wakhti kasta. Haddana nafta ku ma qancin karo in ay is dejiso. Walbahaar ayaa i fuulaya, cuntadu igama degayso inta aan jawaab ka helayo. Marka ay ii soo jawaabto iyada oo weliba iga raalli gelinysa, ayaan nafisaa.

- Sorry walaal, xiisad ayaan ku jiray.

Illeyn meel dheer ma jiree waan u celiyaa.

- Dhib ma leh walaal, maanta waad ku habsaantee.
- Walaal haa, xiisad dambe ayaan lahaa.
- Haa, maxaad qaban doontaa markaa?
- Shaqadii ayaa i sugaysaa.
- Miyaad shaqaysaa?
- Haa hhh waa waalli sow maaha?
- Haa wallaahi, qof adag ayaad tahay
- Adiga cid kaa adag ma jirto
- Ma anaa waxba qabta imika
- Wallaahi walaal qof karti badan ayaad tahay.

Waxa ay tani ka mid tahay ammaanta badan ee ay ila soo tiigsato. Meel i daloosha ayaan ku gufeeyaa. Meel i ololaysa ayaan ku bakhtiiyaa.

Muddada maalmaha uun ah iyo qoraallada tirada badan ee annu is dhaafsannay ayaa kala badan. Waxa ay soo gaadhay wakhtigii laga gudbi lahaa habkan, ee cod loo gudbi lahaa. Sidii caadiga ahayd anigu waan baqayay, iyada ayaa ii soo jeedisay.

- Skype ma leedahay?
- Haa, ayaan la soo booday.

Magaceedii ayay ii soo sheegtay, waan ku xidhiidhiyey. Haddaba yaa wacaya? Ninka geesiga ah ee la hadlayaa aniga maaha. "Aan ku soo wacee i sug" ayaan u qoray.

Ilaahayoow naxdin weynaa! In laba boqol oo jeer ka badan ayaan soo qudbadeeyay, odayaal boqollaal ka badan oo mayal adag ayaan la xaajooday, dhammaantood guul ayaan ka soo hooyey. Bal haddaba Indhadeeq la hadal! Inantaa aan iyaduba inta aan ogahay iga baqayn ayaa wax walba ka adkaatay. Bahdii ayaa la iga la baxay. Tilifoonka ayaan ku qallalay. Dhan marka la eegana, ma rabo in aan ka daaho. Indhaha ayaan isku qabtay markii aan gujiyey bartii u baaqaysay. Wuu dhawaaqay. *Dhiidh*, *dhiidh*. Wadnaha ayaa shafka soo garaacay. *Bug*, *bug*, *bug*.

- Ah haloow.

Waaniga dhaqaaqay, qolka aan dhex wareegay. Intii ay i tidhi oo aan lahayn "Ah"-da yar ee wada naqaska ah ayaan ku celiyey.

- Halow!
- Heeey, iska warran?

Ilaahayoow cod kan ka wanaagsan haddaan hore u maqlay i cadaab! Xasilloonidii ayaa iga haadday. Naqaska ayaa isaga oo kiilooyo ah i soo dhaafay.

- Waan fiicanahaye iska warran? ayaan iska soo jaray.
- Good wallaahi, maxaad haysayna?
- Ma anigu? Een.. wallaahi asal, waan iska uun, yaa.. gurigaan joogay.

Qoraalka geesi ayaan ku ahaa, codkii ayaa imikana ii gooyey. Maxaan weydiiyaa? Qof aad isku cusub tihiin maxaad weydiin lahayd? Marka uu fikirkaygu sii bataba aamusnida ayaan ku fogaadaa.

- Adiguna maxaad haysay?
- Waxba, guriga ayaan joogaa.
- Oo iskuulkii mee maanta?
- Maanta fasax ayaan ahay.
- Asal..

Hadalkii ayaa iga go'ay. Mar kasta oo aan ku fikiro in aan hadlo, fikirkaasi fikir ma soo dhaafo. Runta in aan iska sheego ayaan damcay.

- Haha sowka hadalkii ii gooyey.
- Waa caadiye waan is maqli doonnaa insha Allah.
- Haye walaal, bye.
- Bye.

Aniga oo aan rabin in aan dhigo, ayaan ku qasbanaaday. Dhafoorka ayaan qoyaan ka dareemay. Waa dhidid. Nin maxkamad la saaray wax aan ahayn! Tilifoonka oo gacanta ka laallaada ayaan indhaha dhulka ku illoobay, debinta hoosana ilkaha ayaa xuurteeyey. Maxaa i helay? Wax iga weyn! Sideen noqday? Si silloon! Inantu billee neef i mooddaa. Billee is tidhaa "nasakh ayaad nin moodday". Waan is canaantay, nafta ayaan hadal ku gubay. "Adigaa inanta la hadli waayee waxba ha igu kharas bixin" ayay iga hor keentay. Waa runteed. Waa in aan sidan isu dhaammaa. Marka dambe waa in aan caadi ula hadlaa. Waa haddii ay mar labaad jirto.

Sariirta ayaan isku dul tuuray, dhinaca bidix ayaan u jiifsaday, tilifoonka ayaan gacanta midig ku illoobay, lugaha ayaan labadaba soo laabay si ay laabta u dugsadaan. Hadalkii ay i lahayd ayaan dib ugu noqday. Maya, sidii ay hadalka ii

lahayd ayaan dib ugu noqday. Qosolkeedii ayaan dib ugu soo ceshaday. Naqas badan ayuu ku bilaabmayey isaga oo inta dambena ahaa dhawaaq degdeg ah oo isku dhadhow, marba marka ka dambeysana sii gaabanaya illaa ay ka aamusto. Codkeeda ayaan markii u horreysey si fiican uga bogtay. Afsoomaligeeda oo aad u wacan ayaan haddana ka dhadhansaday in uu af-ingiriisidu uga fudud yahay. Taas oo ka dhigan in uu af-ingiriisideedu aad u fiican yahay. Qiyaastii qurbaha ayay yaraan ku tagtay. Naxariista badan iyo qalbigan saafiga ah halkaas ayay ka keentay malaha. Way ila tahay. Si kale ayay u hadli lahayd haddii kale, si sidan ka qallafsan. Ma hubo. Mid kale ayaan se hubaa: in dareenkii aan u qabay uu maanta sii labanlaabmay. Wax ay samayso oo dareenkayga hoos u dhigaaba ma jiro. Ma aniga ayaa jecel oo wax kasta wanaag u arka, mise wanaaggeeda ayaa badan oo jacaylka sii kordhiya? Midda dambe ayay u badan tahay. Dhimbiil yar oo gudahayga iyada darteed uga baxaysay ayaa shan kale dhashay.

Markii u horreysay noloshayda ayaan dareemay in aan noolahay. In aan wax kasta haysto ayaan moodi jirey, been ayaan ku noolaa.

Masraxa siyaasadda dalka ayaan in muddo ah ka muuqday, xeerarkii siyaasadda ayaa is beddelay sidii aan u soo galay. Mustaqbal aad u

wanaagsan oo aan ku riyoon jirey ayaa ii soo socday. Imikana waxa la rabaa in aan xisbiga guddoomiye ka noqdo, xisbiga oo u muuqda mid guulaysan doona. Sidaas oo ay tahay, imika waxaas oo dhan waan ka dhex baxay. Wax kasta oo aan moodayey in ay i raalli gelin jireen ayaan ka tegay. Keli ayaan noqday, Indhadeeq ayaa i labaysa. Markii aan isku miisaamay, kafaddii ay saarnayd ayaa ka hoos martay tii wax kasta oo soo hadhay saarnaayeen. Magaceeda ayaa qalbiga dhaya, wejigeeda ayaa indhaha ii buuxiyey, qosolkeeda bilaa naxliga ah ayaa dhegaha sifeeya. Kaalin kasta oo bannaanayd way buuxisay, baaqina wuu ka soo hadhay. Inta aan ka bartay dabeecaddeeda ayaa igu qasbaysa in aan u sii dhowaado.

Iyadu i ma fageyso, in ay i dareemayso ayaad mooddaa. Sida aan jecelahay in ay ii la hadasho ayay iigu jawaabtaa. In aan sii waraysto ayaan damcay. In aan waco ayaan ka maagay. Qoraal ayaan ka door biday.

- Ii warran?
 - Hey, Im good. Adna?
 - Asal wallaahi, u home?
 - Haa wll. Im tryna in aan somali wax ku qoro maanta.
-

- Lol, soomaaligaagu wuu fiican yahaye.
- Haha maxaad i moodaysay?
- Dee lagu ma moodo in aad qurbaha ku nooshahay. Qurbaha goormaad tagtay?
- Waan ku dhashay ☺
- No way! Waad iska ciyaaraysaa.
- Haha wlhi, halkanaan ku dhashay
- Oo lagu ma moodee.
- Hee, maxaad sugaysay?
- Dee waxaan is lahaa af qoti ayay ku hadli.
- No haha, I was in Dalsan few years dee, thats why. Haddii kale i maad fahanteen.
- Sidanaad u hadli lahayd. Kii aniga Indhadeeq haa, adiga magac maxay way nogonaysaa?
- Hhahaha

Waan jeclaa marka ay hadalkayga ku qososho, waan sii wadey.

- Kii afkii soomaali garasho jir haa, wax
-

badan.

- Looool Im not that bad.
- I know, wallaahi lkn la ma moodo inaad qurbaha ku dhalatay.
- Thanks 😊
- Qaar badan oo beri dhoweyd tegay ayaad ka afsoomaali fiican tahay.
- Aw thanks, qofka ayay ku xidhan tahay tho.
- Waa run, Cali wuu dedaalay.
- Yh, hes the best.

Halkaana in ay odayga aad u jeceshahay ayaan ka ogaaday, waa mid sii fogeyneysa riyada mustaqbal aannu wadaagi lahayn. Haddaa miyay caayi lahayd odayga?

- Waa geesi, ayaan ugu sii daray.
- Hes my best friend wlihi, si kale ayaan noqon lahaa haddii ay wax ku dhici lahaayeen.

Aabbahay macaan ayaan soo xasuustay, faraha ayaa diiday in ay wax qoraan. "Aniguba aabbahay saaxiib u dhow ayaan u ahaa" ayaan hoos u idhi. Qoraalka aan hakiyey ayay fahamtay in hadalkeedu qiiro kale i geliyey.

- Sorry wll, adiguba aabbahaa waad jeclayd. Ilaahay ha u naxariisto.

Waa duco aan khaatiyaan ka joogo. Waxa aan ku jiraa inkiraad, ducadanina runta ayay ii sheegtaa, anna ma jecli.

- Its ok wll, aamiin. So, ka warran Dalsan iyo markii kuugu horreysey.
- Omg, iga daa ha i xasuusine.
- Haha hee?
- Wallaahi Faysaloow haddaad ogaan lahayd wixii igu dhacay. Waxaan ahaa qotiyad yar baan ku idhi. Marka aan hadlayo la'ima fahmi jirin.

Jecliyaa markay magacayga iigu yeedho.

- Hahah wish I was there berigaa.
- Lool iga daa ha i xasuusine. Dadka oo dhan ayaa iga riwaayadsan jiray.

- Haye?

- Dee qasab ayaan ku bartay markii dambe.

Qofka aad isku cusub tihiin, waxa jirta wakhti la gaadho oo ah wakhtigii la is tohoyanayey. Waa in aad ogaataa qofka kale iyo qabiilkiisa guud. Aniga oo og reerka ay tahay, ayaan ogaan u weydiiyey. Si macquul ah ayaan ugu dhigay.

- Horto Dalsan ma xaafadda Bilan ayaan ka degganayd?

- Haa anigu xaafadda Bilan ayaan ku noolaa berigaa.

Halkaa wax aan ogaa ayaa iiga muuqday. Waan sii weydiiyey.

- Ma reer Dalsan ayaad tahay markaa?

- Looool

Way igu fahamtay, anna waxa aan moodayey in aan xariif ahay. Iyada oo og in aan ka dheregsanahay haybteeda, ayay haddana ii sharraxday.

- Hooyadey ayaa reer Dalsan ah, aabbahayna waa reer Goble.

Waar wanaagsanaa yartu!

- Masha Allah, gobtii dalka ayaad tahay show. The best of two worlds. Markaa aabbahaa dee waa reer Misgo-weyne, Cali waa la wada garanayaa.
- Haha thanks. Adna?
- Anigu Dalsan ayaan ku dhashay oo aan ku barbaaray.
- Nice.
- Markaa haddii aan isku kaa sheego reer Cusbo ayaan ahay.
- Omg thats my mums qabiil.
- Haha! Reer Cusbo yay ka tahay?

Sheekadii qabiilka ayaa sii socotay. Si aad qofka ugu dhowaato, wax kasta oo suurtoagal ah waad adeegsanaysaa. In aannu hooyadeed isku reer nahay ayaa farxad weyn ii noqotay. Jilibka hooyadeed iyo jilibkaya aan ahay ayaan uga sheekeeyey xidhiidhka ka dhexeeya. Way ku diirsatay. Dad is oggolaa marka hore, imikana isku soo dhowaaday ayaannu noqonnay.

Mawduucyada aannu ka wada hadalno ayaa sii kordhay. Si fudud ayaan ula jaanqaaday nolol-maalmeedkeeda. Waxa aan bartay

wakhtiyada kala duwan ee iskuulkeeda iyo shaqadeedaba. Sidaas si la mid ah ayay iyaduna ii baratay.

Saacado kooban ayaan subixii u baxaa dhanka suuqa si aan wakhti ula soo qaato saaxiibkay Muxiyaddiin. Marka laga tago sheekada maalinlaha ah ee aannu wadaagno, waxa aan ka waraystaa xisbigii iyo halka uu marayo.

- Dee xisbiga sowdigii ka tegay maxaad ku falaysaa warkiisa?
 - Aar haaye dee wax ii sheeg!
 - Wallaahi waa iska sidiisii uun.
 - Hee?
 - Sidii aad maalintii uga dhaqaaqday wax shir ah oo dambe la ma qaban, inta aan ogahay.
 - Haye?
 - In ay hoos u shiraanna waa suurtoagal.
 - Dadkii maxay leeyihiin? Sidee shicibku wax u arkaan?
 - Dee saaxiib haddaad sidan u xiiseyneyso
-

soo noqo!

- Adna mid ma tihide, wax noo sheeg.
- Wax hee?
- Waxaan ku idhi baddaa ka baxoo, illeyn haddaan xilka diiday xisbiga maan tuurine, wax ii sheegoo dadku sidey wax u arkaan?
- Dadku dee xisbiga ayay ka war sugayaan, in adiga lagu dooranayo ayay moodayaan. Haddaad ogaan lahayd sida lagu jecel yahay Faysaloow, wallaahi waad..
- Waar waan carraabayaaye nabadeey, hadal baa ku dhacee.
- Ma durba? Wakhtigan maxaad gurigii ka doonaysaa?

Miskiin! Muxuu og yahay. Jannadii ifka ayaa qolkayga ka dillaacdaye, sideen ugu sheegaa? Maxaa igu wata? Xummad i haysa in aan iska soo jebinayo ayaanu ogeyn. Wejigeygan caafimaadka qaba, farxaddan iga muuqata iyo hadalkan cusub ee aan bilaabay, qofka ka dambeeya in Indhadeeq la yidhaa ma oga.

Mararka qaar ayaan is weydiiyaa, "haddii aanan maalintaa qoraalkeeda heli lahayn, sideen imika ahaan lahaa?". Guri laga guuray. Dambas qaabkii Faysal leh. Waa la ii soo diray inantan. Nolol uu Ilaahay siiyo qof uu jecel yahay may ahayn tii aan sii gelayey. Haddii aanay ahayn qof aan aabbahay kaga maarmo, waa qof i tustay in nolosha la qurxin karo si kasta oo ay u foolxun tahay. Taasna weligeey abaal ayaan ugu hayn doonaa.

Godkaygii ayaan hoosta ka soo xidhaa si aan gacanta iyo wejiga isugu hagaajiyo oo aan u arko shaashadda telefoonka iyo waxa ay yartii ehlu jannada ahayd qabanayso.

- Indodeeq yaa arkay?

Qof shaqo ku jirta ayaan jawaab ka sugayaa. Aniga oo taas og ayaan haddana sidaydii werwer bilaabay. Saacadihii u dambeysey wixii ay qabanaysay ayaan dib u eegay. Waan xaqiijiyey in ay shaqo ku jirto. Waan fahmay in aanay ii jawaabi karin. Qalbiga sideen ugu sheegaa? Haddii aan wax u sheegi lahaa, qalbigaygu iyada oo keliya ayuu maqlaa. Waa xubin iga mid ah, maammulkeedana qof kale haysto.

Waxa aan u fiirsaday da'deeda, waxa aan dhab u eegay qurbaha ay illaa dhalashadeedii ku noolayd, waxa aan si gaar ah uga bogtay da'yarta maanta joogta, waxa ii soo baxay wax cajiib ah.

Hablaha qayrkeeda ah, iska dhaaf kuwa qurbaha joogee kuwa dalka ku nool, ayay fikir ahaan ka horreysaa. Wax kasta oo ku wareegsan ayay sabab ka dhigan kartaa haddii ay sidii ilmo yar u dhaqanto, looguna garaabi lahaa. Laakiin maya. Markii hore waxa aan moodayey in muuqeeda oo keli ahi uu muujinayey marwonimo, qofnimadeeduna arrinkaas isaga ah hoosta ayay ka xarriiqday. Kartideeda ayaa ah mid magaceeda far waaweyn ku qoraysa. Jaamacad ayay ku dhex waddaa shaqo ay iyadu u sarrayso. Caqligeeda dhammayska tiran ayaa faray in ay dadka ka waaweyn la rafiiqdo. Nasiibka wacan ayaa i tusay in ay taydii tahay. Aabbeheedka fariidka ah ayaa ah nin aan magacayga maqli karin. Buur ayaa ku gudban. Mar kasta oo aan ku sii dhowaado, waxa igu sii badanaysa sida aan u kala fogaan karno. Ma aha dareen aan maanta dheg jalaq u siinayo. In dhadhankan la'iga qalindaaro u ma baahni maanta.

Waxa aan go'aansaday in aanan iska kala tuurin waxan aan maanta haysto. Waxa uu doono ha ahaadee, waa wax aan weligey hore iigu dhicin. Waa dareen aanan weligey qof la wadaagin. Sida ay Indhadeeq noloshaydii habeenka ahayd dharaar uga dhigtay, ayaan rabaa in ay ii ahaato. In aan ka fikiro waxyaabaha na kala geynaya ayaa ah wax aanan rabin soo-dhoweyntooda. Fikir kasta oo caqabad

ku noqon kara noloshan dhadhanka leh ee ay iyadu i siisay, in aan aaso ayaan diyaar u ahay. Sidaas ayaanan yeelay.

Laba toddobaad oo imika laga joogo bilowgii xidhiidhkayaga, ayaa barasho noogu filnaa. Maalintii dhowr jeer ayaannu soo wada xidhiidhnaa. Markaana dhowr saacadood oo xidhiidh ah ayaannu wada qaadannaa.

Oday Cumar oo hooyo xoogga soo saaray maalmihii u dambeysay, ayaa igu qasbay in aan xafiiska xisbiga soo joogo maalintii dhowr saacadood. Xisbiga oo weli bilaa guddoomiye ah ayaa dhib ku haysa isaga. Indhadeeq oo aan rabo in aan mar kasta dhegtu codkeeda maasho ayaa ii daran aniga. Mar ay xiisad ku jirto amma shaqaynayso ayaannu kala maqan nahay. Inta kale waxa aannu u wada hadalnaa sidii laba is leh. Midda cajiibka ah ayaa ah, weli dareenkayga u ma aan sheegin, iyadana hadalkeedaba daa. Walow aan u dhaqmayo sidii qof aan ka maarmi karin, haddana waxa aan isku qanciyeey in xitaa haddii aan u sheego, aanu aabbeheed oggolaanayn. Sidaa darteed waxa ay dantu igu qasabtay in aan xidhiidhkan bilaa summadda ah kula socdo. Waxa aan fahmay in ay rejo ka qabto xidhiidhkan naga dhexeeya haddii aan siyaasadda sidaa ku dhaafo. Halkaa waannu ku kala duwan nahay. Xidhiidhka dheer ee reerkayaga iyo Cali Shaandho soo dhex maray

ayaa ah mid aan weligii oggolaanayn in aan inantiisa guursado. Taas ayaan ogahay. Sidaas oo ay tahay, ma dayn karo Indhadeeq. Ilaahay ayaan ku dhaartee ma dayn karo. Weligey waxa aan ahaa qof calool-adayga aabbihii oo kale leh, markii aan weynaadeyna waxa aan soo bartay cilmiga bulshada. Taasi waxa ay keentay in aan si fudud u fahmo wixii aan macquul ahayn, dabeedna ka gudbo. Indhadeeq ayaa waxaas oo dhan ka xoog weynaatay. Si kasta oo aan ugu arko in aanu guur na dhex mari karin, haddana in aan daqiiqad ka fogaado ma rabo. Inta ay huruddo ayaan dhibsadaa.

Xarfaha ammaanteeda aan ku tilmaamayo ayuu carrabkaygu diiday in uu joojiyo. Waan u garaabay. Wax aanay ahayn kolleyba ku ma sheegayo. Indhaheedan kuwii deerada ah ayaan u tilmaamaa. Wejigeedan kala shuban ayaan farta ugu fiqaa, aniga oo illoobaya in ay iyadu iga taqaanno. Sida ay nafteeda moodayso, in ay mar walba si ka sii fiican tahay ayaan u sheegaa. Way ku faraxdaa. Waxa ay iga codsataa in aan ka daayo waxaas oo ammaan ah, laba ilbidhiqsi ayaan ka joojiyaa. Afka ayaa ballantii jebiya. "Wax aanan ahayn ayaad iga dhigtay" ayay igu tidhaahdaa. "Waxa aad tahay ayaan badh ka tegay" ayaan u celiyaa. Inta aan ku sheegay in ka badan ayay ii soo tebisaa. Qalbi wanaagsan, dabeecad aan la dhibsan iyo karti badan in aan

leeyahay ayay ii subcisaa. Marka la eego inta jeer ee ay saddexdaa tilmaamood igu sheegtay, waan ku qasbanaaday in aan rumaysto. Muhiimaddu waa in ay iyadu ka heshay qofnimadayda, taas ayaa aniga agtayda qaali ka ah.

Laba aan kala maarmin ayaannu noqonnay. Wakhtiga ayaa isaguna shaqadiisa watey. Laba toddobaad oo kale ayaa sidaa ku tegay. Haddii la eego saacadaha aannu wada xidhiidhaynay, waxa aannu u dhigannaa dad uu xidhiidh ka dhexeeyey sannaddo.

Oday Cumar ayaa wakhtigu ku qasbay in uu tallaabbo qaado. Xisbiga muddada labada bilood ku dhow bilaa guddoomiyaha ahaa ayaa dadkii hadal ka dhex abuuray. Olole hor leh ayuu soo qaaday isaga oo adeegsanaya adeerraday, abbaarayana hooyaday. Waan ogaa in aanu jawaabtaydii ku qancin, balse waxa uu wado weli maan fahmin. Qofka keliya ee aan xog ka heli karo ayaan wacay. Isaga oo xiiqsan ayuu ii jawaabay.

- Waar xaggeed ku ordaysaa? ayaan weydiiyey.
 - Dee imika salaaddiina waad illowday.
 - Maxay?
 - Waar maqrib ayaan ku sii ordayaa.
-

Show maqrib ayaa la eedaamay, ma aan maqlinba.

- Waa saxe waxaan ku weydiiyey, dhaqdhaqaaq ayaan dareemee, maxaa socda?
- Waar waa lagugu soo socdaa niyow.
- Yaa igu soo socda?
- Aan kugu soo celiyo.

Wuu jaray. Wixii aan filayey ayaa dhici raba. In aanu odaygaasi sidaa igu dhaafayn waan ogaa. Salaad aanan hubin in la aqbalay ayaan ka gaadhsiiyey. Wuu igu soo celiyey.

- Maxaad tidhi?
 - Waar waa lagugu soo socdaa, kow dheh!
 - Maxaa baas ee soo socda?
 - Anigu shalay magaalada waan ka maqnaa, laakiin sida la ii sheegey, shir saacado qaatay ayaa xarunta ka dhacay.
 - Waan gartay.
 - Go'aanka ka soo baxay waxa uu noqday in aad adigu guddoomiye noqoto, amma
-

oggolow amma diid.

- Yaa? Haye!
- Waxa meesha marayey golihii dhexe ee xisbiga oo dhan.
- Waar Ilaahay ka yaab!
- Waa sida la ii sheegaye dhegeysoo.
- Yaa kuu sheegay?
- Naw! Walaalow maad i dhegeysani, taasi muhiim maahee.
- Hayee raalli ahow oo ii wad bal.
- In aanu xisbigu kaa maarmayn ayaa la isla gartay. Wax kasta oo ay qaadanaysana, waa in aad xilkaa qabato.

Waan iska dhigay telefoonkii. Xaaladda iyo kulaylkeeda ayaan dareemay. In ay noqonayso sida uu Oday Cumar rabo ayaan ogahay. Gartayda ayaan sii akhristay, in la iga helayo ayaan xaqiiqsaday. Taasi waxa ay duullaan toos ah ku tahay rejadii ay Indhadeeq qabtay. Anigu kolleyba rejo maan qabin, aabbeheed ayaan ogaa in aanu marnaba oggolaanayn in uu inantiisa

siiyo Faysal Keynaan. Laakiin in arrintani culays ku noqon doonto inantaa qalbigayga degtay ayaan ogahay.

Waxa aan go'aansaday in aan is gaabiyo inta la'ii yeedhayo amma tunka la i soo qabanayo. Sidii nin aan waxba ogeyn ayaan u dhaqmayey maalmihii la soo dhaafay. Waa markii u horreysey noloshayda ee aan sidan oo kale u naco siyaasadda. Waxa ay noqotay wax i horkeenta aabbahay, murugo badanna igu abuurta. Iyada lafteeda ayaan u arkaa in ay aabbahay iga kaxaysay. Waa run oo way jirtaa geeridu, qaddarkuna waa dhankiisa, balse haddii uu aabbo ka nasan lahaa shaqada badan oo uu caafimaadkiisa ka fikiri lahaa, waxa aan hubaa in wax laga qaban lahaa xanuunka uu u dhintay. Markii hore ee aan xilka ku diiday odayaasha, si niyad ah iga ma ay ahayn, xaaladda aan ku jirey ayaa igu qasbaysay. Maanta se, waa markii u horreysey ee aan si niyad ah u naco. Markii aan maqlay in uu socdo dedaal xilka la igu la raadinayo, beerka ayaan ka naxay. Sababtana waxa loogu yeedhaa Indhadeeq. Waxa aan is leeyahay "rejo oo dhan ha aasin". Wax kasta ayaa dhici kara, haddii se aan xilkaa qabto, rejo way dhimatay. Sheeko iyo jacayl aan guur ku dhammaanayn, waa laga fiican yahay.

Dhanka kale marka la eego, heerka uu xidhiidhkayagu marayo ayaa ah mid malabka ka

macaan. Weli dareenkayga u ma aan sheegin iyada, iyaduna sidoo kale, haddana si gaar ah ayaannu u dareemaynaa. Waannu is famahsan nahay ayaan filayaa. Geesinimadii aan ugu bandhigi lahaa, waa la'iga saaray. Waxa aan is leeyahay "haddii aad u sheegto, billee kaa oroddaa". Ma rabo in uu xidhiidhkeedu iga go'o sidii berigii oo kale. Ma rabo in aan maalmo madow galo. In aan iska eryo, anigu ma rabo. Cabsida halkaa ka imanaysa ayaa noqon doonta mid aan wax weyn ku waayi doono. Hadda se ma dareensani.

Maaddaama oo aanan jacaylkayga u sheegan karin, waxa qasab noqotay in aan ladh kale u raadiyo xidhiidhka naga dhexeeya. Waxa ay noqotay in aan raadiyo hab kale oo aan ugu sheego darajada ay agtayda ku leedahay. Maxaan ku idhaahdaa? Aniga oo aan jacayl soo hadal qaadin, sideen ugu sheegi karaa sida ay iigu dhowdahay? Aniga oo nax-naxsan ayaan u qoray.

- Saaxiibkayga koowaad ayaad tahay.

Si ay u fahamto ayaan ka daba geeyey:

- Rag iyo dumarba, u my best friend.

Walow ay ka saamayn yar tahay "waan ku jecelahay", haddana waxa ay noqotay odhaahda ku xigta ee aan ugu gudbin karo sida aan u

dareemayo. Ma jirto si kale oo aan ku macnayn karo xidhiidhka joogtada ah ee naga dhexeeya, sida naxariista leh ee ay ii la hadasho, ammaanta badan iyo raganimada ay igu sheegto mar kasta, "subax wanaagsan"-ta aannu subixii isu soo dirno iyo "hurdo wacan"-ta habeenkii. Waxa aan maqlay, qofka ugu dambeeya ee maskaxdaada ku jira habeenkii inta aanad seexan kahor, qofkaas ayaa qalbigaaga leh. Madaxa ayaa magaceeda subciya, qalbiga ayaa qosolkeeda la ciyaara, afkana dhoolla-caddayn weyn ayaa ku dhigan habeen kasta marka aan sii seexanayo. Inta aan hurdo, ma ogi in ay igu dhex wareegayso, balse marka aan soo tooso sidii xalay aan ku seexday ayaan ahay. Farriintii ayay farxad ku qaabbishay.

- Wlhi u my best friend anigaba, ma jiro qof aan sidan oo dhan ula hadlo.
- Waad qalbi wanaagsan tahay walaal.
- Thank you so much Faysal walaal, adiga yaa kaa qalbi wanaagsan?
- Ninka ku helaa nasiib leh.

Madfac! Naxdin ayuu wadnuhu hoos ii go'ay. Ilaahayoow ay ammaan u aragtaa. Balse waa Indhadeeq, way fahamtay.

- Aww thank you Faysal, u're great guy

wallaahi.

Waanu kala baqaynay, intaa isu ma annu dhaafin. Maanta. Maalin kale in uu hadalkaasi soo noqon doono, waa hubaal. Odhaahda waxa aan ugu diray si aan u sharraxo heerka ay agtayda ka joogto, sidoo kale tijaabana way ahayd. Haddii uu hadal ka soo noqon waayo, hore ayaa loo sii socon karaa. Waxa aan ogaaday in marka dambe aan kordhin doono, fulaynimadana aan la dagaallami doono. Waa ballan in aan sii kordhin doono. Waa haddii Ilaahay uu iga nabad geliyo Oday Cumar. Laakiin maya, isaga ayaa ah cadowga koowaad ee farxaddayda. Riyo aan xuub caaro ka dhisay ayuu duullaan ku yahay.

Galab fallaadhaha qorraxda loo diiday in ay dhulka gaadhaan, daruurtuna dhibiceeda kala bakhayshay dhulka ayay ahayd. Xariirtii aan u dhimanayey oo aan saddexdii saacadood ee u dambeeyeyba la qoslayey ayaan qoraal kula sheekeysanayey.

- Kkkkkk wallaahi waad iga qoslisay, huuno aan casar soo tukadee maad i sugi?

Jawaab ay iyada uuni i odhan karto ayay ii soo qortay.

- Ofc walaal, orod soo tuko. Markaad soo
-

noqotana waan joogaa.

Dacaskaygii naylooga ahaa ayaan cagaha sii sudhay aniga oo dhanka masaajidka u sii jeeda. Hadalkeedii ayuu madaxaygu midabaynayey markii dhawaaqa telefoonku ka toosiyeey faro-ka-ciyaarka uu dareenkayga ku xanxantaynayoo. Waa hooyo.

- Haloow hooyo!
- Waar hooyo xaggeed tagtay?
- Waan soo tukanayaa hooyo, maxaa dhacayna?
- Hoo adeerkaa la hadal, adeerkaa ayaa ku doonayee.

Ma isagaa la ii soo diray? Toddobada walaalaha ay ahaayeen aabbahay, saddex ayaa wiilal ahaa. Saddexdaasi laba ka mid ah wax xidhiidh ah reerka la ma laha. Cismaan waxa uu joogaa qurbaha oo uu muddo dheer ku noolaa, Khadarna suuqa ayuu dillaalnimo ku xoogsadaa. Waxa soo hadhay adeero Siciid. Waa oday aad looga tixgeliyo waddanka, aadna ay isugu dhowaayeen aabbo. Marka ay hooyo igu tidhi "adeerkaa la hadal", waan gartay in uu yahay adeero Siciid. Isaguna ma aha qof hadal lagu celiyo. Aabbahay oo aad u ad-adkaa dhanka

go'aanka, ayaa soo joogsan jirey marka uu adeero Siciid fikir kale keeno. Aniga oo inankiisii ahna, hadal ii ma bannaana.

- Assalaamu calaykum waryaa Faysal.
- Adeero, calaykuma salaam adeero macaan. Ii warran?
- Xaggeed joogtaa?
- Salaaddaan tegay adeero, waan soo noqonayaaye..
- I dhegeyso Faysaloow, Oday Cumar iyo golihiisii dhexe ayaan hadda ka socdaa. Arrin gar ahna way i tuseen, hadda sow wax aad garatay maaha?
- Waan g..
- Warwareeg iyo "waxaa ma rabo"-na inna ga ma soconayso, kow dheh!
- Haye.
- Raggu waxa la yidhi waa nin himiladii aabbihii hagardaamo u diida iyo nin qabyadii aabbihii dhammaystira.

- Waan gartay.
- Adiga maanta waxa lagaaga fadhiyaa in aad qabyadii aabbahaa ka tegay, riyadii aabbahaa lahaa, waar ma hadda ma i maqlaysaa?
- Adeero si fiican.
- Riyadii aabbahaa lahaa ayaa la rabaa in aad rumayso, maanta adiga ayaa la rabaa inaad Keynaan noqoto adeer.
- Waan gartay.
- Doqonniimo kugu ma ogi adeero ee ha igu nacasoobin bi'i waaye.
- Kugu nacasoobi maayo adeero.
- Soo tuko oo guriga ha innoo ahaato.

Waan xasuustaa dareenkii jidhkayga saaqay. Waan ogaa in arrintan la wado, haddana markii ay dhab ii soo gaadhay saamayn kale ayay igu yeelatay. Wax aan sameeyo ayaan garan waayey. In la'iga gar hayo ayaan qiray. Masaajidka ayaan ku hagaagi kari waayey illaa aan Indhadeeq ogeysiyo.

- Omg, waxa dhacay haddaad og tahay!
-

- What? Maxaa dhacay?
- Aan tukadee i sug anaa kuu sheegiye.
- No pls tell me, I can't wait, I'll go crazy haddii kale.
- Xisbigii ayaa la rabaa in aan guddoomiye ka noqdo.
- No way! Dee in aad qof fiican tahay ayay ogaadeen oo aanay kaa maarmayn.

Waa odhaah si gaar ah ii taabatay maalintaa oo illaa maanta aan madaxayga ka dhammaan.

- Marka aan tukado ayaan u tegayaa adeero, anaa kuu soo sheegi halka ay ku dambeyso.

Salaad kala dhantaallan ayaan ku yaaciyey. Dhankii guriga ayaan u soo orday. Ganjeelkii weynaa ayaan sida laydha uga soo dhex dusay. Wajahaddayda ayuu kursi caag ah si waafi ah isugu kala bixinayaa isaga oo gacanta midigna bakooraad guduudan dhulka ku xarriiqaya. Hooyo oo jiipta u qaabbilsan ayaa dhankiisa bidix in door ah u jirta. Indhahayga ayaa doontay kuwiisa, kuwiisa ayaa doontay kuwa hooyo si ay sheekada ay ku jiraan u sii

dhammaystiraan. Anigu qorshe aan qorshe ahayn ayaan soo degay. In aan dhulka is dhigo, in aanan noqon kii ku gacan-saydha hooyadii iyo adeerkii, wixii aabbihii bilaabayna aan dhammaystirin ayaan ku tashaday. Kursigiisa ayaan ku doontay si aan salaanta u deeqsiyo. Mid agtiisa yaallay ayaan salka ku hagaajiyey. Araar dheer ayuu dabada ka galay. Intii aanu gunta hadalka u soo dhaadhicin ayuu ardaaga ku meeraystay. Qiimaha uu xisbigani aabbahay u lahaa ayuu ku dheeraaday. Waxyaabbo badan oo aanan u baahnayn in la ii sheego ayuu wakhti dheer ku bixiyey. Waxa aan u oggolaaday in uu wakhtigiisa qaato. Taas markii uu ka gudbay ayuu u galay dalkan iyo baahida uu u qabo in qabyaaladda laga badbaadiyo. Waxa uu farta iigu fiiqay in dalkani aniga ii baahan yahay, la'aantayna uu dowlado shisheeye gacanta u gelayo. Xisbiga Bulsho in uu yahay daawada keliya ee dal bukooday bogsiisa ayuu ku nuux-nuuxsaday. Naf nacday waxan uu ka sheekeynayo ayaa igu jirta. Waan dhugtay, wax walbana "waa runtaa" ayaan joogsi uga dhigayey. Halka ay ku socoto ayaan arkaa, waxa ku habboonna waan aqaannaa. Wuu sii watey.

- Markaa maanta waxa lagaaga baahan yahay in aad seefta galka kala baxdo, in aad ereyadii dadka ka qiiraysiin jiray soo tufto. Taxliil in aad dadkan u tufto ayaa
-

lagaaga fadhiyaa adeer. Miyaad i fahamtay?

- Nacam! Si wanaagsan adeero, diyaar ayaan ahay.
- Wakaa! Jiljileeca innaga ilaali adeer, nin adag ayaad tahee boodhka iska tun. Berri tobanka iyo xarunta ha innoo ahaato, adiga oo Faysalkii la yaqaanay ah.
- Haye adeero, inta aan idhi ayaan qolkaygii galay.

Haddii in uun ay rejo igu hadhsanayd, faro-madhnaan ayaan ka taaganahay galabta. Mustaqbal aan la wadaago indhahaygii i deeqay, galabta ayaan fogeeyey. Fikir dheer ayaan sariirta la dul tegay. Tilifoonka ayaan la soo baxay si aan sawirradeeda u fiirsado. Indhaha aan waxba ogeyn ee daacadda ah ayaan ku dheeraaday. Ilkaha marka ay qoslayso qalbigayga qaada ayaan meel i ololaysa ku qaboojinayey. Debnahan qaansada u eeg ayaa kuwayga u sanqanayey. "Ma joogtaa?" ayaan u qoray.

Waa wax noole degdeg ayay hadal iiga hor keentay.

- Haa walaal Faysal, ii warran? Sidey wax u
-

dhaceen.

- Adeero ayaa igu soo goostay walaal Indhadeeqeey.
- Haye?
- Wuxuu u socday in uu xilka igu qalqaalliyo.
- Haye?
- Waan ka yeelay, "haye" ayaan ku idhi.

Qoraalkii ayay hakisay.

- Masha Allah, hambalyo Faysal. Imika waa in aad madaxweyne noqotaa.

Waan ogahay in aan aabbeheed la tartamayo, haddana in ay sidan igu tidhaahdo ayaa wax weyn ah. Runta marka la sheego, xanuun ayay dareemaysaa. Waxa aan garan karaa in ay aad uga naxday arrinkan, balse wanaag qalbigeeda buushka ah ka da'aya ayaa hadalkan ka yeedhsiiyaya. Dhinacayga ayaan u qiiraysnaa, yabaalka ayaa iyada la degay. Walow aannaan si toos ah isugu odhannin, haddana labadayaduba waxa aannu fahamsanayn in uu go'aankani noqon doono mid soo afmeeri doona wax kasta oo naga dhexeeya. Imikana haddii uu

jiro qof aanan la'aantii faraxsanaan doonin, waa Indhadeeq. Inantii maalintii noloshayda ugu xumeyd cadceed ii soo baxday ka dhignayd. Inantii mugdiga iga badbaadisay in aan maanta aabbeheed la tartamo, taasina kala fogaansho keento, waa mid dhici doonta balse i xanuujin doonta.

Sidii la'iiga bartay ayaan ballantii ka soo daahay. Qolka oo cammiran ayaan kursiga guddoomiyaha oo bannaan dhankiisa u dhaqaaqay. Waxa fadhiya adeero Siciid, Oday Cumar, Mustafe iyo Maxamed Gaab. Waxa aan u sheegay in aanu adeero wada hadalnay shalay, arrinkii uu ii la yimidna aan sidiisa ku qaatay. Waxa kale oo aan u sheegay in ay golaha dhexe oo dhanna gaadhsiiyaan go'aankayga, shir degdeg ahna la'isugu yimaaddo. Saacado gudahood ayaan amray in shir-jaraa'id lagu qabto. Taas kaddibna waxa aan soo dhisi doonaa dhowr qof oo xul ah, dadkaas oo noqon doona dadka iigu dhow. Muxiyaddiin ayaa ka mid noqon doona. Duco badan oo meesha laga jeediyey ayaan dhabarka u ritay. Saacad kaddib ayaan shir aan dheereyn la qaatay golaha dhexe oo ay intiisii badnayn joogaan. Waxa aan u sheegay in aan maanta laga bilaabbo ahay guddoomiyaha xisbiga Bulsho, higsiguna yahay in doorashada soddonka maalmood innaga xigaan aynu ku guulaysanno. Garabkayga in ay

taagan yihiin ayay ii sheegeen. Warbaahinta oo maalmahaaba dhegta taagaysay ayaa soo buuxisay xaruntii dhexe ee xisbiga. Qudbad aan daqiiqado ku qoray ayaan sii diyaarsaday.

”Bismillaahi Raxmaani Raxiim, Ilaahay ayaa mahad leh, wa salaatu wa salaamu calaa xabiibunaa Muxammed, calayhi salaatu wa salaam. Sida aad og tihiin, xisbiga Bulsho waxa soo waajahay dharaaro madow. Guddoomiyihii xisbiga, saaxiib aad loo jeclaa, say laga dambeyn jirey, aabbo naxariis badan iyo guddoomiye karti badan ayaa xaqii u yimid. Ummadda oo dhan ayuu ka baxay, gaar ahaanna xisbi lagu la yaabbanaa aasaaskiisii ayuu ka tegay. Waynu is og nahay oo hadal ayaad iga rabteen markii aan ugu jilicsanaa. Maanta ayaan idin odhanayaa ereyadii aad iga doonayseen, weedho uu odhan doono wiil aabbihii waayey. Aabbo waxa uu ahaa hagahayga, xiddigta aan eegto. Waalidnimada marka laga tago, saaxiib igu qaali ah ayuu ahaa. Waxa uu ahaa qof aan u noolayn naftiisa oo keli ah. Goor aanu isagu u baahnayn maal iyo mansab, isaga ayuu ahaa kii bulshadiisa u kacay. Jacaylka uu dadkiisa u qabo

ayaa ku qasbay in uu hadhka macaan ka soo baxo. In uu daawado bulsho kun qurub loo kala qaaday, in uu ka raalli noqdo reernimada aqoonyahanka lagu duudsiyo iyo in uu fiirsado bulsho dil ku xukuman, waxa uu ka door biday in uu isagu noqdo is-beddelka uu raadinayo. Fikir lagu la yaabbo, iska daa cid kale oo, fikir aan anigu kula yaabay ayuu hirgelintiisa bilaabay. In aan garabkiisa istaago ayaa ahayd jidka keliya ee ii bannaan, waayo waxa aan ogaa in uu xaq ku taagan yahay. Taariikhda uu qori doono ayaan doonayey in aan la wadaago. Waad ogeydeen wixii hadal iyo deelqaaf ka soo gaadhay markii aannu xisbiga ku dhawaaqnay. Waxa aad ogeydeen inta la eryadey isaga oo xisbiyadii taabba-galay u arkayeen khatar kursigooda ku socota. Dhabar-adayg lagu yaqaannay ayuu arrintaas kaga soo gudbay. Dhowrkii bilood ee u dambeeyey, xisbigu waxa uu gaadhay degmo kasta oo dalka ku taalla, reer kasta oo waddanka deggan iyo shakhsi kasta oo dalkiisa lexejeclaynaya. Geedkii uu beeray dhowr sanno kahor, midhihiisii ayaa soo bislaanayey markii Eebbe oofsaday. Xiddigtii ii baxaysay

ayaa gabbalkeed dhacay. Riyo uu lahaa ayuu ka tegay iyada oo qabyo ah, fikir uu dhidibbada u taagay ayuu dhammaystirkiisa ka hoyday. Halkaas marka ay marayso, aniga ayay talo i joogtaa. Aniguna su'aalo dhowr ah ayaan is weydiiyey. Aabbahaa haddii uu farriin kuu soo diri lahaa, maxay noqon lahayd? In badan ayuu adiga ku soo hoggaaminayey, maanta haddii uu noolaan lahaa, muxuu jeclaan lahaa in uu qabto? Farxaddiisu xaggee ayay ku jiri lahayd? Dhamaan su'aalahaan aan is weydiiyey, hooseeye ay wadaagaan ayaa jirey: rumaynta riyadii aabbahay. In anigu aan noqdo xiddigta aan tebayo. Taas oo isugu soo ururaysa ujeeddada aan maanta idiinku yeedhay. Maanta waxa si buuxda la'iigu doortay in aan noqdo guddoomiyaha cusub ee xisbiga Bulsho. Haddii aan ahay ilmo baarri ah, waxa igu qasab ah in aan fikirkiisii aabbahay meelmariyo. Bulshada aan jecelahay ee codkaygu gaadhayo mid ayaan leeyahay: guddoomiyihiinnii wuu dhintay, balse fikirkiisii ma dhiman. Jidka keliya ee aynu dalkan kala jabay u kabi lahayn ayaa ah in aynu gacmaha is

qabsanno. Ka codee qabyaalad, u codee Bulsho. Wasalaamu calaykum.”

Warbaahin warmo sidan jirtey ayaa warkii meel walba ka riddey. Shacab oommanaa ayaa warkii ku harraad-baxay. Bulsho dhan oo i sugaysay ayaan hantay, qofkii ugu weynaa ee aan weligeys hanto ayaan sii fogeeyey. Toddobadii cisho ee xigay, dalka wax aan Bulsho ahayn laga ma hadal hayn. Cali Shaandho iyo xisbigiisii, gurigooda ayay biyo ugu galeen. Intii ay ka baqayeen ayaa dhacday. In guddoomiyenimo la ii doorto ayaa ahayd gantaal ku soo aaddanaa oo maanta haleelay. Weliba marka la eego Cali iyo sida uu u qirsanaa waxqabadkayga, maanta hadal waa laga waayey. Bil wax dhiman ayaa ka dhiman doorashada, in uu guusha ka sii durkayna way u eeg tahay. Aniga iyo Cali Shaandho waxyaabaha na kala geeya ayaa ka badan kuwa na mideeya. Da’ haddii ay noqoto isu ma dhowin, siyaasad haddii ay noqoto ka daran, dabeecadna Ilaahay dhankiisa waxba u ma fidin. Sidaas oo ay tahay haddana hal shay ayaannu ka siman nahay. Xawaaraha uu kaga sii durkayo guusha madaxweynenimo ayaa la mid ah midka aan kaga sii durkayo inantiisa Indhadeeq.

Iyada iyo aniga ayaa haatan isku soo dhowaannay, dareen ahaan. Mar kasta oo aannu iska waraysanno dadka aannu jeclaan lahayn in aannu la midowno, sifooyinku waxa ay ku soo dhammaadaan kuwo ay iyadu leedahay. Iyaduna aniga ayay igu sar jartaa. Maalintii dambe ayaan bilaabay in aan isticmaalo ereyga "huuno". Farriimo aan u qorayey ayaan u dhex raaciyey. "Hee, huuno", "may, huuno", "haye, huuno". Waxa aan u malaynayaa in aan ku badiyey ereyga, waayo waxa aan helay su'aal odhanaysa "what is this with huuno thing?". Indhadeeq ma aha qof hadalka la gabbata, waana mid ka mid ah dabeecadaheeda boqolka nooc ah ee aan ku jeclaaday. Qof kale haddii ay ahaan lahayd, waxa laga yaabaa in ay iigu jawaabi lahayd "iska warran, huuno?". Laakiin maya, way iska hubisaa. Qosol ayaan su'aasheeda kaga jawaabay. Waan isku yara dhex yaacay, runtaa wacane.

- Waan iska uun.. waan iska idhaahdaa huuno.
- Lol, maanta ayaad bilowdoo waan is weydiiyey.

Waxa aan ogaaday in qofka aad la sheekeysan karto maalinta oo dhan, laakiin aanad sirahaaga uga sheekeyn karin, balse

habeenkii marka la kala seexdo haddii aad isku gaadhaan, wax walba waad u sheegeysaa. Waa cilmi aan fahmi waayey. Caawana taas oo kale ayaa igu dhacday. Qofkii u dambeeyey ee xaafadda ayaa seexday, ugu yaraan saddex saacadood kahor. Codkayga sidii aan hoos ugu dhigayey ayuu guux iyo gariir noqday. Waxa aan u sheegay sida ay u dabeecad wanaagsan tahay, in ay tahay qof qalbi nadiif ah leh. Si kaftan ah ayay iigu tidhi:

- Intaa waan ogahee, wax kale ii sheeg.

Aad ayaan u qoslay. Odhaah kasta oo ay igu tidhaahdo ayaa ah mid dhankeeda ii jiidaysa, tanina wixii dareen gunta ii fadhiyey oo dhan ayay soo dhaqdhaqday. Geesinnimo aan adeegsado tii ugu weyneyd ayaan la soo baxay. Hadal aanan weligey idhaahdeen qorraxda oo soo jeedda ayaan isugu hagaajiyey.

- Ok, haddii aanan siyaasadda ku jirin oo aannan aabbahaa la tartamayn, haddii aan qof caadi ah iska ahaan lahaa, wallaahi ku ma daayeen oo ku ma dhaafeen.

Waan u diray. Waxa aan filayaa in uu ahaa hadal aanay sugaynin, walow aniga laftaydu aanan sii diyaarsan. Muddo kooban ayay ku

maqnaayd akhrinta qoraalka si ay jawaab iga farxisa iigu soo dirto.

- Awww Faysaloow walaal wallaahi qof aad u fiican ayaad adiguba tahay.

Halkaa marka ay marayso ayaan damcay in aan anna ka faa'iideysto xaaladda oo aan hadalkeedii hore oo kale u qoro.

- Intaa waan ogahee, wax kale ii sheeg.

Muddo ayay iga daahday. Waxa aan is idhi qoraal dheer ayay soo qoraysaa amma qoraalka ay soo waddo ayay kolba masaxaysaa dibna u qoraysaa.

- Faysal walaal waxa aad tahay qof aad u wanaagsan, qof karti leh oo mar walbana weji furan leh. Muddo yar ayaynu is naqaannay imika, waxana aad mooddaa in aad qayb iga mid ah noqotay. Waan ku soo jeclaanayaa.

6 WAAN KU JECELAHAY

Qoraalkaas isaga ah ayaa laabtaydii ku kiciyey mowjad gidaar kasta dhirbaaxday. Dhulgariir ayaa gudahayga ka bilaabmay. Xaraf kasta oo qoraalkan ku jira ayaa ah mid macno gaar ah keligii ii samaynayey. Miisaanka uu lahaa qoraalku, waxa uu qasbayey in aan duuduub lagu liqin. Markii u horreysey ee noloshayda ayaan dareemay in qof kale iigu dhowaaqay hadal aan odhan kari waayey, balse aan u baahnaa in aan idhaahdo. Is ma ogiye show waxa aan ku raagey qiirada iyo kunka dareen ee jidhkayga ku kulmay.

- Pls hadal, say something.

Waxa aan qiyaasi karaa in faro gariirayaa codsigaa ii soo qoreen. Illeyn fulay loo hadlay ayaan ahaye, wixii aan ka qarsan jirey ayaan daaha uga qaaday.

- Indhadeeqeey wallaahi sidaas oo kale ayaan dareemayaa. Dabeecaddaada ayaa naftayda ka dhigtay mid aan kaa maarmin. Dareen ayaad igu abuurtay, qalbigaygana waad xadday.

Wax aad ciil u qabto dhihiddiisa, marka lagu fasaxo, maxaad samaysaa? Haaheey, waan ku wada idhi. Waxba u ma aan reebin. Iyaduna

waxa ay moodday in ay qoraalka u soo qortay qof aan sideeda oo kale dareemayn, werwer ayay muddo kooban gashay iyo "maxaa kugu watey?". Waxyaabaha aan nolosha ugu necebahay waxa ka mid ah, in dareenkeedu is beddelo. In ay murugooto, cadhooto amma farxadda gaadhi weydo. Qosolkeeda iyada u gaarka ah ayay naftu quudataa. Sidaas darteed, waxa aan dareensiyeey in aan anigu la baqayey hadalkan, ayna ku mahadsan tahay in ay ii tidhi.

Wanaagsanaa marka laguu xalaaleeyo waxaad tuugo ku xadaysay.

- Maxaad iigu sheegi weydey mar hore?

Waa su'aal aan ka jawaabi kari waayey. Inaan fulay ahay ayuun baan u sheegay. Waayo sabab kale ma jirto. Haddii aan ogaan lahaa in ay sidan ii dareemayso, maalin hore ayaan soo wada bixi lahaa. Waan u warramay, kun jeerna waan u mahad celiyey. Laba kala gabbanayey oo isku soo baxsaday ayaannu noqonnay. Darka jacaylka ayaannu ka wada cabnay. Waannu isla jaanqaadnay. Ereygii aan ku degdegay ee "huuno" ayaan imika isticmaalkiisa sidaan doono ka yeelay. Jacaylku haddii uu geed yahay, hadalka wanaagsanna waa biyaha lagu waraabiyo. Sida ay iigu weyn tahay, ayaan habeenkaas oo dhan u subcinayey. Halkaa aan u joogo ayay in badan dul joogsatay. Waan u

qaadan waayey. Waxa maskaxdayda ka dhaadhici la', in aan qalbiga Indhadeeq keligey leeyahay. Ma inantii quruxda iyo dabeecaddaba lahayd, rag badanna wax badan u samayn lahaayeen helisteeda, ayaa aniga i jecel? Anigu waan jeclaan karaa iyada, balse in ay iyaduna sidaas oo kale ii jeceshahay ayaa iga degi weydey. Weligey meesha ma aan soo dhigan tan oo kale. Habeenkaa waxa aan noqday qofka dunida ugu farxadda badan.

Waxa aan soo xasuustay sidii aan sawirradeeda u daawan jirey, intii aannaan is baran kahor. Waxa jirtey mar ay aad iiga dheerayd, mar aanay iiga dhoweyn cidnaba. Riyo iyo dareen maalintaa i galay, boholyow iga soo raacay afkeedii farxaddu ku dhignayd ayaa caawa ii rumoobay oo ay daawo u noqotay. Waannu sheekaysannay, hadal ma dhammaado, gaar ahaan marka aad xiddigtaada la caweyneyso. Su'aaluhu way badnaayeen, jawaabaha waafiga ah ayaa ka sii darnaa.

- Sideed igu soo heshay horto? ayay i weydiisey.
 - Sawirkaaga ayaa i soo jiitay, markii u horreysey ee aan ku arko ayaan hawada kaa yeeshay.
 - Hahahaha
-

- Waan ku daawan jirey, sawirradaada ayaan midba saacad sii eegi jiey inta uu qalbigu sawir ka qaadanayo. Waxaan ugu jeclaa sawirka aad xafladda joogto ee aad qoslayso.
- Hahahaha wallaahi waad iga qoslisay.
- Wejigaaga ayaa i soo jiitay, qosolkaaga yar, waxa aad u eekayd qof waayeel ah.
- Lool ma qof weyn ayaan u eekahay?
- Yacnii sidaa u ma jeedo, waa la gartaa in aad qof mudakar ah tahay, weynidii da'da ahayd maaha. Waad i soo xasuusisaybee, ma xasuusataa sawirka aad ilmaha yar sidato, waxa aan moodayey in aad adigu dhashay kkkkkk
- Hahaha waadigii i weydiiyey.
- Haa, adna "anaa dhalay" ayaad igu tidhi, ma naxayside.
- Haha lkn markii dambe waan kuu sheegay in aanan dhalin dee.
- Sawirradaadu haddii ay hadli karaan, way

iga caban lahaayeen. Nasasho ayaan u diidey.

- Aww lkn ma illaa markaa ayaad sidan dareemaysay.
- Haa wallaahi, waan kaa baqayey. Qof aad imika uun is barateen ku ma odhan kartid "waan kaa helay".
- Haha true. Aniguba sidaasaan ahaa.
- No way! Waad iska ciyaaraysaa.
- Sawirradaada ayaan daawan jirey.
- Waad iska ciyaaraysaa Indhadeeqeey.
- Wlhi waa iga dhab, waxaan is odhan jirey muxuu ahaa inankan lebbiska wacani.
- Hahaha
- Waxaan jeclaa weliba sawirka aad suudhka xidhan tahay. U know what?
- Hee.
- Naftayda ayaan maalintaa wax ku idhi.

- What?
- Waxaan ku idhi "waa in aan inankaa soo qabtaa"
- Hahahahaha
- Hadda ku maan aqoonba. Wallaahi waan xasuustaa, galab ayay ahayd, sawirradaada ayaan daawanayey markaasaan sidaa idhi. Hadda kaftan ayay iga ahayd markaa.
- Imikana waadigaa ku guuleystey haddaba.
- Wlhi its funny, way rumowday.
- Did I tell u?
- Maxay?
- Qof fiican ayaad tahay.
- Yh waad ii sheegtay Faysaloow, and thank u so much huuno.

Haddii la'isku deyi lahaa in la eego heerka farxaddayda caawa, waxa la waayi lahaa halbeeg lagu cabbiro. Wax aan si ba'an u doonayey ayaa

kaygii noqday. Dhulka ayaan joogay markii xiddig samada ka dhalaalaysa aan higsaday. In ay caawa garabkayga ka iftiimayso, ma hayo ereyo aan ku cabbiro. Qof jannada aakhiro galay oo ka soo warramay weli ma aan maqal, laakiin jannada dunida iyo dhadhankeeda aniga ayaa la'iga waraysan karaa. Iyada ayaan dhex hurdaa. Wax iga maqan ayaan jirin. Dunida weyn ee dhowrka bilyan ee qof kor u dhaaftay, ayaan ka helay qofkii la'iigu talo galay. Nasiibkaygu weynaa! Ilaahayoow iigu wad!

Indhadeeq waa qof aannu isu fahamnay si aanan sharrixi karin. Marka aan la hadlayo, u ma baahni in aan iska dhigo qof aanan ahayn. Sida aan ahay ayay igu aqbashay. Wax kasta oo cirka iyo dhulka u dhexeeya ayaannu ka wada hadalnaa annaga oo aan kala qaloonayn. Waxyaabbo aanay dadka kale ku qoslin ayuu beerku na la casaadaa. La'aanteed waxa aan ahaa naafo aan ogeyn in ay wax ka maqan yihiin. Haddii aan sagaal ahaa, toban ayay iga dhigtay. Balse waxa aan ogahay, in aan anigu hal ahaa, iyaduna sagaalka. Duni aanan hore u aqoon ayaan dhex galay. Qof wax jecel ayaan noqday. Waxa ka sii daran, qof la jecel yahay ayaan noqday. Taas ayaa macno weyn ii samaynaysay. In la'i jeclaado, in la'i tuso in aan ahay qof aan la'aantii la noolaan karin, in la'igu yidhaahdo "aniga ayaa ku jecel adiga". In aan dareemo in

la'ii baahan yahay, in la'ii sheego in naftaydan xumi ay qof kale macno weyn ugu fadhido. Qof naxariistu ka guurtay ayaan ahaa oo yaqaanna sida wax loo saadaaliyo iyo sida dadka loo la hadlo. Mishiin oo kale ayaan ahaa. Qolof bilaa ruux ah oo laydhu wadato ayaan ahaa. Cago dhulka si qumman u haysta ayaan yeeshay, qalbi faaruq ahaa ayaa kalgacayl la'iiga buuxiyey. Waxa aan noqday qof u tirsan qof kale. Macaanaa marka lagu jecel yahay. Macaanaa marka aad hesho qof aad is jeceshihiin. Allahayoow wacanaa marka Indhadeeq ay ku jeclaato!

Aad ayay iiga fog tahay, haddana waxa ay noqotay hadhkayga. Hal shay ayay hadhkayga kaga duwanayd, mugdiga iga ma ay hadhi jirin. Meel kasta way ii raacdaa. Mar kasta way og tahay goobta iyo xaaladda aan ku jiro, anna sidoo kale waan la socdaa. Muuqaal ahaan ayuu xidhiidhkayagu isu beddelay. Shaashadda ayaan ka daawadaa marka ay ii sheekeynayso. Faraha korkooda laga dhaashanayo ayay kolba mid qaaddaa. Indhaheeda ayaa la shaqaynaya afkeeda, xaraf kasta oo soo dhaafa ayaa raad kaga tegaya wejigeeda. Way i deeqday.

Markii u horreysey ee aan ku idhaahdo erey ka xiiso badan "huuno" ayaa la gaadhay. Ma xasuusto markii aan ku idhi, waxa se aan xasuustaa in jidhka la'i saaqay markii aan u diray

saddexda erey ee mucjisada ah: "waan ku jecelahay". In badan oo noloshayda ka mid ah waxa ay ii la muuqdeen waxa ay yihiin, saddex erey. Bes. Markii ugu horreysey ayaan dhadhamiyey macnahooda. Waxa aan dareemay in ay jidhkayga xubin ka mid ah ka soo go'ayaan marka aan ku dhawaaqayo. Waan ku nafisayey. Wax kasta oo aan iyada u dareemayo ayay tebintooda koobsanayeen. Dareenka aan dhex mushaaxayo, waa mid ay tahay in qof kastaa xaq u yeesho in uu dareemo. Qofka aan noloshiisa oo dhan marnaba sidayda oo kale dareemin, qofkaasi nolosha waxba ka ma uu arag. Nolosha ma uu dhadhamin. Ilaahay ayaan ku dhaartee wax weyn ayuu qofkaasi seegay. Naxariis iyo qabow gaar ah ayuu baal maray.

Marka aan keligay noqdo ayaan is waraystaa. Xaggay ku maqnayd inantani? Maxay beri hore iigu iman weydey? Sidan ayaa qornayd. Imikaba nimco ayaan jaqayaa. Hawo aanay cid kale qaadan ayaan keligay nuugayaa. Weli cid kale oo og xidhiidhkayaga ma jirto. Mid aan cid u sheegi karana ma aha. Ma odhan karo "Cali inantiisa ayaan is jecel nahay." Cali ma aha qof la odhan karo "xaajoow yarta noo guuri!". haddii uu arrinkaasi bannaanka u soo baxana, kala-guur ayaa dhacaya. Dhacdadii u weyneyd ee nooceeda ah ee dhul Soomaali degto soo fool saarta ayay noqonaysaa. Taas, Indhadeeqna way

og tahay. Caqli ku ma yara. Sidaas oo ay tahay, waxa iga yaabiyey awoodda jacaylka. Si kasta oo ay wax kastaaba nooga soo hor jeedaan, haddana taasi ma joojiso dareenka aannu isu qabno.

7 MUDANE MADAXWEYNE!

Galabtaa aannu isu sheegnay sida aannu isu dareemayno, waxa ay ahayd galab aan markaas uun maqlay arrintii na kala geyn lahayd. Wakhti xasaasi ah, xilli aan markaas uun dib u galay siyaasadda. Waa markii aan maalmahaas uun si dardar leh u soo istaagay garoonka siyaasadda lagaga ciyaaro. Mawjad rejo ah ayaa dalka dhan dhex qaadday. Markii u horreysey ayay dadku dareemeen in ay jiraan siyaasiyiin aan iimaanka la'ayn. Gabadha meydaxda ka diiranaysa miyi guntii iyo inanta faras-magaalaha ka shaahaynaysa ayaa warka si siman u wada helay. Dareen dhiirrigelin iigu filan ayaa iga soo gaadhay qaybaha kala duwan ee bulshada.

Si kasta oo aan xisbiga shaqooyin muhiim ah uga soo qabtay, haddana mar kasta waxa uu xisbigu lahaa madax u sarreeya oo la eego. Waxa aan ahaa qof daaha dhabarkiisa taagan. Maanta waannu isku soo baxsannay. Aniga iyo kursigii kor loo eegi jirey ayaa hal noqonnay. Waxa aan ogsoonahay xilka aan qaaday iyo miisaanka uu leeyahay. Waxa aan dareensanahay xilliga lagu jiro, wakhtiga doorashada ka hadhay iyo kaalinta iiga bannaan.

Waxa aan shaqada ka bilaabay shir degdeg ah oo berri ah in aan qabto. Shirkaas oo aan la

yeelan doono golaha dhexe ee xisbiga. Halkaas waxa aan ka soo jeedin doonaa qorshahayga ku salaysan sidii doorashada loogu guulaysan lahaa. Wakhtiga oo igu yar awgii ayaan habeenkii shaqo dheer galay. Miis iyo kursi ay beri hore iigu dambeysey ayaan dul fadhiistay. Darraasadihii hore ee aan dadka gobollada ku sameeyey ayaan dib u soo nooleeyey. Maalmaha soddonka ka yar ee iiga dhiman doorashada iyo qalabka aan u baahanahay in aan adeegsado ayaan isku eegay. Waxa ii soo baxday in aan adeegsado darajada saddexaad ee qalabka xidhiidhka bulshada. Weligey ma aan adeegsan tan. Darajada koowaad ayaan ku shaqaynayey muddadii aan darraasadda wadey. Macallinkayga ayaa mar uu noo sharraxayey darajada saddexaad iyo adeegsigeeda, waxa uu noogu sifeeyey sidan:

Arday kasta warqad ayuu u dhiibay, warqadda ayuu yidhi isku duuba oo wax kubbad oo kale ah ka dhiga. Samuuradda hoosteeda ayaa waxa uu dhigay baaldi yar oo ah midka xashiishka lagu uruuriyo. Warqaddii oo duuban ayuu yidhi "qof kasta waa in uu warqaddiisa ku soo hagaajiyo baaldigaa yar, weliba isaga oo meeshiisa fadhiya". Ardaydii dhabarkayga fadhiday ayaa ku dhawaaqday in ay caddaalad-darro tahay, maaddaama oo ay iyagu ka fog yihiin. Ma uu dhegeysan. "Ku soo tuura" ayuu

ugu halceliyey. Ardaydii safka hore fadhiday ayaa bilowday, boqolkiiba sagaashan ayaa ku riday. Safba safka uu ka dambeeyo ayay tiradaasi sii yaraanaysay. Ardaydii ugu dambeysey ayaa soo tuurtay, boqolkiiba toban keliya ayaa la helay. Waxa uu yidhi "ardaydan safka hore fadhidaa waa kuwa bulshad ugu ladan, dhanka ay doonto ha ahaatee. Waa kuwa sida fudud rabitaankooda u hela, heerka ay nolosha siyaabbo kala duwan uga gaadheen awgeed. Safka u dambeeya waxa uu ka dhigan yahay kuwan safka hore cakiskooda. Tallaabbo kasta oo ay dowladdu qaaddo, iyaga wax faa'iido ahi ugu ma jirto. Waa dad aan lahayn cid u hadasha sababo kala duwan awgeed. Haddaba darajada saddexaad ee xidhiidhka bulshada ayaa ah, in aad dadka aad la hadlayso aad ka dhaadhiciso in ay yihiin kuwa safka dambe, walow aanay qasab ahayn in ay yihiinba. Waa in aad ku qancin kartaa in ay yihiin kuwo aanay dowladdu danaynin adiga oo adeegsanaya xirfadaha kala duwan ee aynu hore u soo dhigannay."

Waxa aan bilaabay in aan dib u raaco warbaahinta kuwooda ugu kharriban iyo maqaalladii ay ka qoreen reeraha kala duwan iyo salaadiinta cadhaysan. Waxa aan soo helay muuqaallo iyo qoraallo wixii aan helayeyba, waxa aan darsay habdhaca hadalkooda. Way fududahay in la garto cabashada meesha taalla,

waxa se inta badan adag in la ogaado xalka ay doonayaan dadkaasi. Waayo xalka ay soo bandhigaan waa mid inta badan aan ahayn midka ay ku farxi lahaayeen, balse waa mid arrinta markaa joogta uun qaboojiya.

Indhaha oo dhiigga ka cas ayaan macluumaadkii la hor tegay odayaal islaamahoodii ka soo ag toosay. Hadallo gaagaaban ayaa i soo gaadhaya. "Adeer miyaad xanuunsanaysaa?", "oo adeer ma qaadkii ayaad adna bilowday?". Waxa aan dareemayaa in su'aalahooda naxariisi ka dambeyso, ma rabaan in ay waayaan rejada keli ah ee ay maanta haystaan. Si kooban ayaan su'aalaha uga jawaabay. Degdeg ayaan shirkii u furay aniga oo ku bilaabaya:

- Sida aad og tihiinba waxa innoo dhiman wax aan soddon maalmood gaadhayn. Sidaas oo ay tahay weliba toddobaadka u dambeeya wax olole ah la ma samayn karo, markaa waa saddex toddobaad uun waxa aynu haysannaa. Qorshe aynu dadka ku hananayno ayaan soo diyaariyey.
 - Wallee iyo billee wax nool, maxaan idin lahaa, ka soco adeer.
-

Waa Oday Cumar oo sii jibbooday. Waan sii watey.

- Waxa aan bilaabayaa qorshe aanan jeclayn ku dhaqaaqistiisa, balse dantu qasbayso.
- Waar kani waa wax nool!

Waa Maxamed Gaab, ninka lacagta u badan geliyey xisbiga.

- Waxa aan abbaarayaa koox kasta nabarkeeda, waan fadhayaa inta uu ka dhiigayo, goorta ay ciil gawsaha is dhaafsadaan ayaan daawada farta ugu fiiqayaa.

Sacab ayaa aguugay. Naf caajis ku jirey ayay wahaabka ka duuliyeen. Si fiican ayaan u toosay. Waan u sii wadey. Waxa aan u sheegay magaalada aan ka bilaabay, aniga oo ku dambayn doona caasimaddan Dalsan ee qabyaaladdu daxalka u yeeshay. Halkaas oo aan maalinta u dambeysa ee ololaha aan dadka magaalada iyo dalka oo dhanba uga gudbin doono sababta ay Bulsho ugu codeyn lahaayeen.

Qaybaha kala duwan ee golaha dhexe, sida odayaasha, dhallinyarada iyo haweenka, waxa aan koox kasta si gaar ah ugu dhiibay hawsha iyaga ku aaddan. Waxa ay koox waliba hal

maalin kulammo la qaadan doontaa qaybaha bulshada ee khuseeya kooxdaas. Haweenku waxa ay si toos ah ula hadli doonaan haweenka, dhallinyartuna dhallinyarta, odayaashuna odayaasha. Iyaga oo magaalada sii qaboojiyey ayaan maalinta afaraad anigu imanayaa si aan uga dhigo safka u dambeeya ee qolka.

Marka aad siyaasadda ku jirto, kun shay ayaad dadka ka baranaysaa. Waxa ka mid ah in aanad cid kasta aammini karin. Si kasta oo ay daacad isa ga dhigaan, haddana in aanay dadka qaar Ilaahay aqoon ayaad ogaanaysaa. Waxa aan taas uga socdaa, shirkii aan qorshaha ololaha ku sharraxayey iyo qorshaha laftiisii ayaa gaadhay xisbigii Cali Shaandho ee Aqbal. Xubin amma xubno ka tirsan golaha dhexe ayaa sirta faafiyey. Taasi waxa ay igu keentay dib-u-dhac weyn. Haddii uu Cali Shaandho qof cilmi leh ahaan lahaana, xisbiga wuu la degi lahaa. Nasiib-wanaag, waxa uu og yahay oo keli ah wixii loo sheegay, ma laha cid u qaabbilsan cilmiga bulshada amma aqoonteeda leh. Waa sidii boqorkii shinnida oo ay hareerahiisa ku xoonsan yihiin odayaal qabyaaladda ka shaqeeyaa. Hadallo ka soo yeedhay oo uu kaga sii hordhacayo hawsha aannu u dhaqaaqnay ayuu warbaahinta siiyey. Isaga oo aan odhan karin amma aan wax ka sheegi karin habka aannu dadka ula hadli doonno, ayuu haddana carrabka

ku dhejiyey in aanu nahay "beenaaleyaal bulshada u sheegaya wax aan jirin". Doorashada oo soo dhow awgeed, hadallada noocan ahi waa wax iska yimaadda. Hubka ugu wanaagsan ee lagaga hortago ayaa ah in aan loo jawaabin. Taas waxa hore ii faray barehaygii dugsiga cilmiga bulshada. Imikana taas waxa ii sheegaya qalbiga inantiisa jecel. Nin aad inantiisa naftaada ka jeceshahay ma u jawaabi kartaa? Anigu maya. Warbaahinta oo madaddaalo ka dhigata weedhaha ay siyaasiyuuntu isku ganaan ayaa damacday in ay erey iga qaadaan. Waxa aan dhowr jeer oo kala duwan oo ay telefoon ila soo tiigsadeen ugu jawaabay "in aanay aniga shaqadayda ahayn in aan ka jawaabbo ereyo si laga qurux badan yahay uga soo baxay qof aan ixtiraam u hayo oo ay aabbahay isku da' ahaayeen". Maalmaha qaar hadal intaa ka kulul ayaan ugu jawaabi lahaa. Keligey ayaa hoos isugu qoslay. Weriyihii oo la yaabban jawaabta diblomaasiyadeed ee aan bixiyey ayaa hadal kale iga raajiciyey. Dabcan wuu ku hungoobay. Waxaan is weydiiyey "toloow haddii uu ogaan lahaa in aan Cali inantiisa is jecel nahay, muxuu samayn lahaa? Miyuu fahmi lahaa jawaabta aan bixiyey iyo sababta igu kalliftay?". Waa weydiimo aanan jawaabtooda cidna ka sugayn.

Sidii qorshuhu ahaa ayaan ka bilaabay magaalada galbeed ugu xigta dalka. Qorraxda

ayaan ka hor toosaa, iyada oo saacado sii maqnaydna waan duma. Nafta ayaan caddibay, afka ayaan hadal ku kallifay, dhegaha ayaa codkii aabbo u darsaday. Mar kasta oo aan sidan oo kale cid gaar ah ula kulmo amma aan hadal jeediyo, isaga ayaannu isla eegi jirnay sida ay dadka u gaadhay iyo falcelinteeda. Ma aha wakhti ay maskaxdu olole siyaasadeed iyo murugo kale wada qaadi karto. Qof tebaya qof uu eegan jirey ayaan ahay, waa qasab in aan mararka qaar keligey hoos u ilmeeyo, balse mar kasta oo aan xaaladda noocaas ah galo, nafta ayaan xasuusiya in uu aabbo ku farxi lahaa shaqada aan hayo haddii uu noolaan lahaa. Taas ayaa shidaalkayga noqotay. Nafta ayaan laba u qaybiyey, qayb aniga ah iyo qayb aabbo iska dhigta. Mar kasta oo aan magaalo ka gudbaba, aniga ayaa isu sacabbiya. "Shaqo wacan!" ayaan hoos isugu idhaahdaa. Maskaxda iyo jidhka ayaan mideeyey, hore ayaan hayaanka u sii wadey.

Qorshihii ayaa si qumman u shaqaynaya. Magaalaba magaalo ayay noo dhiibtaa. Mid ayaan kaga tagaa indho ii ducaynaya, mid kale ayaan ugu tagaa gacmo i soo dhoweynaya. Rejo ay qabaan ayaan hoosta uga xarriiqaa rumaynteedu in ay ku xidhan tahay xisbiga Bulsho oo ay u codeeyaan. Waxa aan u sheegaa "in cod ay maalin keli ah xisbiga siiyaan uu ka

dhignaan doono gacan dufan leh oo duugta iyaga iyo kuwa dhabarkooda ku jiraba”.

Warka dalka waxa xuurto ku qabsaday xisbiga Bulsho. Warbaahinta kala duwan oo ay ku ladhan yihiin kuwa xisbiga ee sida gaarka ah ii la socda ayaa maalin kasta ka hadlaya tallaabbooyinka guusha ah ee annu qaadayno. Xisbiga Aqbal ayaa noqday mid aan helin shantiisii daqiiqo ee shaashadda. Kolley sababta iyaguba way og yihiin.

Qofka laga badiyey waxa aad ku garataa, waxa uu bilaabaa aflagaaddo iyo shakhsi-weerar. Xubnihii ugu dhowaa odayga Cali, waxa ay ka dhaadhiciyeen in aanu isagu hadalka kiisa qallafsan odhannin. Taas beddelkeedii waxa qaatay ku-xigeenkiisa. Si dadban ayuu Cali ereyada u soo taraarixiyaa si uu saaxiibkii dubbaha ugu dhufte. Waxa aan halkaa ka ogaaday in uu xisbiga Bulsho guulaystay. Si kasta oo ay tahay, bahashu waa siyaasad. Ma aha mid aad cid kale ka sugayso in ay kuu dhigto salliga. Waxa aan sii kordhiyey dhawaaqa dheer ee shimbiraha dhirta dhakadooda ka erya, iyo dhawaaqa kiisa gaaban ee ilmo sii gam'aya aan kicin. Qalab kala duwan oo aan siyaasiyiinta looga baran ayaan adeegsanayey.

Gebagebadii waxa aan soo gaadhay maalintii u dambaysay ee ololaha. Waa maanta iyo baabah. Dalsan oo la sii rusheeyey ayaan soo

gaadhay. Waxa inta badan la yidhaa, "ninka Dalsan codkeeda hela ayaa dalkana codkiisa hela". Aniga oo guulo ka soo hooyey gobollada, ma aha in aan ku guuldarraysto caasimadda.

Fagaaraha laga hadlo waxa subaxnimada iska leh Aqbal, galabtana Bulsho. Si dadka loo kala duwo, loogana hor tago isku-dhac taageerayaasha ah, dhowr saacadood ayaa u dhexeeya hadalkiisa iyo kayga. Sidaas oo ay tahay, waxa meel kasta taagan koox ciidanka nabadgelyada ah.

Wakhtigii Bulsho ayaa la soo gaadhay. Dhismaha dambe ee goobta ayaan fadhiya marka ay fannaaniintu dareenka dadka sii walaqaayaan. Inyar kaddibna waxa aan maqlay dadka u sacabbinaya hadalka uu yidhi Oday Cumar ee ahaa "imikana soo dhoweeya madaxweyneheenna, Faysal Keynaan!"

Hadal aan xalay oo dhan habaynayey, intiisa badanna hore u qornayd, oo goobta aan istaagi doono igu sugaya ayaan dhankiisa ugu soo dhaqaaqay tallaabbooyin cul-culus. Muddo ayaan ku qasbanaa in aan gacanta hawada wadhfiyo markii ay dadku joojin waayeen sacabka iyo soo-dhoweynta diirran ee ay igu qaabbileen.

Waad mahadsan tihiin, waad mahadsan tihiin.

Markii ay aammuseen ayaan ka bilaabay hadalkayga in aan dul maro waxyaabaha na mideeya bulsho ahaan.

In badan ayaad maqasheen siyaasi hadlaya. In badan ayaad soo dhegeysateen wax aan goobtii laga yidhi dhanna u dhaafin. In badanna hadal ayaa haammo la idiinka buuxshay. Maanta intaa midna u ma socdo. Ilaahay ayaan ku dhaartee xiiso u ma qabo. Macbuudkow markhaati ahow! Indhihiinnow qaaddi ahaada! Dhegihiinnow i maqla! Galabtan Khamiiseed, qalbigayga ayaan idiin furayaa. Idiin la hadli maayo sidii siyaasi cod-doon ah, inankiinnii ayaan ahaan doonaa. Idinka ayaa i dhalay, qof ku dhalayna tunkaa la saartaa. In hore oo idin ka dhalatay ayaad ku hungowdeen, billaahi caleek gar ayaad u leedihiin inaad niyad-jabtaan. Macbuudkow markhaati ahow!

27 daqiiqo ayaan taagnaa, toban ka mid ah sacab ayay ahaayeen. Aas-aaskii xisbiga, fikirkii aabbo iyo himilada mustaqbalka ayaan dhankayga ka tusay. Aniga, Faysal ahaan, ayaa si shakhsi ahaan ah oo qoto dheer ugu warramayey. Laba is dhalay oo kale ayaannu ahayn aniga iyo shicibku. Waxa aan

maammulayey dareenka ay dareemi doonaan iyo midka ay xasuusan doonaan marka ay goobta ka tagaan galabta. Qalbiga ayaan ugu qufulay odhaahyo ay goobta cod-bixinta la tegi doonaan, furihiina waan tuuray.

Khudbaddii oo loo bixiyey "Macbuudkow markhaati ahow" ayaa shanta qaaradood laga tuuray. Baraha bulshada oo dhan ayaa lagu wadaagay. Faalladeeda ayaa noqotay mid aan laga dhammaan. Cinwaankii iigu saamaynta badnaa ee aan joornaal ku arko ayaa u dhignaa sidan: FAYSAL KEYNAAN OO KUMANNAAN QOF HADAL KU SAKHRAAMIYEY. In ay sakhraameen, aniga ayaa huba.

Lixda maalmood ee soo socda, nasasho ayaan geli doonaa. Waa dhowrka maalmood ee aan la oggolayn in olole siyaasadeed la sameeyo, sida sharciga doorashooyinku dhigayo. Taasi ka ma dhigna in aan hawshii xisbiga joojinayo. Si xoog ah ayay albaabbo xidhan gadaashooda uga socotaa. Maalin kasta waxa aan ku kallahaa xafiiska, xog wixii jira ayaannu kala qaadannaa, xan wixii aannu ka hayno xisbiga Aqbalna waannu wadaagnaa. Shaki ku ma jiro in ay dadku Bulsho la jiraan, waxa se shaki ku jiraa in ay sidaa sii ahaan doonaan iyo in kale. Si aanay wax isu beddelin, waxa aannu bilownay olole qabow. Xeerka doorashooyinka ma rabo in aan jabiyo, in aan qalloociyo se diyaar ayaan u ahay.

Muuqaalladii gaarka ahaa ee sida joogtada ah la iiga duubi jirey intii aan ololaha gobollada ka wadnay ayaa ah hubka keliya ee aannu adeegsan karno imika. Maalinba mid ayaannu dhignay baraha bulshada ee internet-ka. Taas oo aannu xasuusin uga dhigaynay dadka.

Dhanka kale waxa isa soo taraya xidhiidhka caalamiga ah ee sida tooska ah telefoonkayga ugu soo dhacaya. Mar kasta oo aan u garto in uu yahay xubin diblomaasiyadeed oo dal shisheeye ka socota, si toos ah ayaan ugu tilmaamaa lambarka xisbiga, aniga oo u sheega in ay ballan qabsadaan marka hore. Dabcan ma aha in aan wakhti u waayey, keliya waa isbarasho aan rabo in aan dareensiyo hannaanka dowladeed ee aan hoggaanka u noqon doono. Jiljileeca badan ee looga bartay hoggaamiyeyaashii hore, ma aha mid aan rabo in aan anna ku sifoobo. Haddii si' loo eego, waa rejo aad u wanaagsan in dowladaha shisheeye xidhiidh noocan ah ila soo sameeyaan. Sababta oo ah, xukuumadda hadda sii dhacaysa ayaa ah mid ka gaabisay xidhiidhka caalamiga ah, fursado badanna dayacday. Tani waxa ay inna tusinaysaa in dowladaha shisheeye dano gaar ah dalka ku qabaan, baahidaas oo looga faa'iideysan karo rabitaankaaga gaarka ah. Waxa ay rabaan haddii uu yahay mid qiimo ahaan u dhigma waxa aad adigu rabto amma kaba sii qiimo badan, markaas ayaad

oggolaanaysaa. Haddii kalena ma diidaysid ee waad xannibaysaa uun.

Hadii aan xilka ku guuleysto, waxa aan mas'uul ka noqon doonaa dal gudo iyo dibadba daxalaystay. Kor iyo hoosba mirdhay. Dad la kala qalay oo kala bogsaday ayaa sugaya in aan dhayo. Shicib dhexdooda la kala qaybiyey si dano gaar ah looga fushado, laba walaal ah oo la isu tilmaamay iyo dad la kala geeyey. Deegaan kasta gaar ayaa loo la shiray, waxaana la tusay in deegaanka ku xigaa yahay cadowgiisa. Waa la isku jeediyey. Dowladaha jaarka ah ayaa cadow laga dhigtay. Xukuumad aan dalkan u naxayn ayaa muddo dheer soo ragaadisay. Ma fududa hawsha i sugaysaa, waa se mid aan diyaar u ahay waajihiddeeda.

Koob shaah ah oo aan laba jeer uun afka saaray ayaa kor iiga soo eegaya miiska yar ee dhinacayga bidix yaalla. Dhabarka ayaan si fiican ugu nasinayaa kursigan illaa cagaha hoose fidsan. Gidaarka guriga ayaa gadaashayda ah, induhuna waxay ku lumeen barxadda dambe ee hortayda wadhan. Faraha oo diirran ayaa imika uun hoos u dhigay telefoon ay dhagta ka caawinayeen kor-u-hayntiisa. Waa xoghayaga arrimaha debedda ee Maraykanka oo rabay in uu iigu hambalyeeyo kaambayn ku-dayasho mudan, iyo guul aan hubaashii – waa sida uu hadalka u dhigaye – ka soo hoyn doono

codbixinta berri dhici doonta. "Waad mahadsan tahay" wax aan ahayn ma odhan karo. Waxa aan u arkaa nin danta dalkiisa ka fikiraya, anna in aan tayda xoogga saaro ayaa ila gudboon. Waa markii labaad ee uu muddo laba usbuuc gudahood ah ila hadlo. Imika se ma rabo in aan ka fikiro taas, waayo in aan nasto ayaan sadriga ku hayaa. Jirtoo xaaladda aan ku jiraa aanay oggolayn in aan maskaxda faaruqiyo, haddana inta aan awoodo shaahayga ayaan isku mashquulinayaa. Qoolleyda iyo xamaamka geedka hoostiisa ku murmaya ayaan isha la raacayaa, intaa ma dhaafsiisna shaqadaydu. Cagaha kabaha dhulka soo jiidaya ee igu soo dhowaanaya ayaan dhegta bidix ka helayaa dhawaaqooda. Waa hooyo oo galaan shaah ah gacanta midig ku sidata, ta kalena tusbax dheer oo madow. Indhaha ayay iga la hadashay intii aanay kursiga dhinacayga yaalla salka saarin. Miiska ayay dul dhigatay koob kaygii laba jeer ka weynaadey. Hadal-la'aan ayay halkaa tusbaxa shanqadhiisa igu la wadaagtay galabtaa qaboobayd.

Yididdiilo ayaan la soo kacay saaka, qorraxduna kulayl saa'id ah. Kormeer guud ayaan ugu kicitimay degmooyinka caasimadda ee Dalsan, gobollada khadka telefoonka ayaan mid walba ku waraystay. Illaa hadda wax dhib

ah ma arko. Waxyaabbo aan waaweyneyn marka laga reebo oo aan markiiba u tilmaamay mas'uuliyiinta doorashada. Safafka ayaa markiiba dariiqyada sidii ilo biyo ah la dhaadhacaya waddooyinka. Sacabka ayaa aguugaya mar kasta oo aan goob codbixineed soo gaadho. Si aanan nidaamka khalkhal u gelin ayaan si degdeg ah u weydaartaa marka aan hawshayda dhammaysto. Degmadii aan ka codeyn lahaa ayaan ku soo hagaagay. Saddex baabuur oo ila socday ayaa mar keli ah meel aan durugsanayn soo joogsaday. Cagta intii aanan dhulkaba saarin ayaan ku war helay kamaradaha sanko ii saaran, waan dhex jibaaxay. Labaatan tallaabbo wax aan gaadhayn markii aan qaaday ayay ishaydu qabatay ilaallada gaarka ah ee meesha taagan, markaas ayaan fahmay. Waxa goobta ku jira madaxweynihii talada dalka hayey imika. Maan jeclayn in aannu isku soo beeganno, laakiin wuu soo qaddimay. Saxaafadda oo arrinkani xiiso gaar ah ugu fadhiyo ayaa baallahayga yaacaysa. Intii aanan shaqadayga bilaabin ayaan arkay isaga oo warqad ku foorara. Maan sixin in uu codeeyey iyo in kale weli. Haddii aan ixtiraami lahaa inta uu codkiisa dhiibanayo oo aan anna shaqadayda qabsan lahaa, waxaan ka baqay in kuwan i ag ordayaa si kale wax iiga gudbiyaan. Waxaan go'aansaday in aan dhankiisa u dhaqaaqo,

agtiisana waan joogsaday. "Asalaamu calaykum, mudane madaxweyne!" inta aan idhi ayaan gacanta aad u fidiyey. Indho daallan oo da'du ka muuqato ayuu kor iigu soo eegay intii aanu gacanta soo fidin kahor. Markiiba dhoollacaddayn ayuu igu qaabbilay. Gacmaha isku dheggaan ayaannu muddo hawada ruxaynay, intaa in ka badanna iftiinka khashaafadaha kamaradaha ayaa si is-dabajoog ah u socday. Wixii aannu is nidhi ma xasuusto, salaan iyo hadal aan meel gaadhsiisnayn, mararka qaarna debnaha oo keli ah ayaa iska dhaqdhaqaaqayey. Dad sheekeystay in aannu ahayn ayaa loo qaatay. Waan ka gudbay, codkaygiina waan soo dhiibtay. Telefoonka oo goorahaas jeebaddayda ka dhacayey ayaa la iiga soo sheegay in ay waraaqihii ka go'een goobta 51-aad ee Gobolka Galbeed. Qaylo badan iyo wakhti aan yarayn kaddibna taas waa la xalliyey.

Maalin dheer ayay ahayd, balse hadda way soo dhammaatay. Guriga ayaan degdeg u soo maray. Biyo qabow ayaan ku soo maydhay, suudh kalena waan soo xidhay. Hooyo oo i sugaysay ayaan soo kexeeyey. Waxa aan soo galay xaruntii dhexe ee xisbiga oo ah goobta lagu sugayo natiijada. Dadka oo wejiyadoodu nuurayaan ayaa salaan iga la hor imanayey illaa aan qolka weyn ee shirarka ku hagaagay. Waxa aan maqlay Oday Cumar codkiisii qaboobaa oo

gadaashayda iga soo gaadhaya. "Waaryee, maxaad halkaa ka doonaysaa?". Qosol ayaan la soo jeedsaday. Si kal iyo laab ah ayaannu isu qaabbilnay. Sidii aabbo meesha uga baxay, waxa uu isagu noqday madaxa aan eegto. Cidlo badan oo aan dareemi lahaa, isaga ayaa wehel iiga noqday. Waxa uu noqday difaacayga koowaad ee dhanka xisbiga. Salaan iyo qosol kaddib ayuu labada garbood sidaa ii qabtay, indhahana kuwayga ku aaddiyey, markaas ayuu cod aanan hore uga maqal iigu yidhi "waan ogahay in aad guulaysanayso, markaa hambalyo ayaan ku leeyahay adeer. Talo waayeel ayaan ku siinayaa Faysaloow, cabasho kasta dhegeyso oo si gaar ah u miisaam. Way adkaan doontaaye marka ay adkaatana dhabar-adaygeeda yeelo. Barta aad cagta dhigayso hoos u eeg. Intaas haddii aad samayso – waan ogahay in aad samaynaysee – waad liibaani adeer". Siday ahayd ayaan u guntaday weedhahaas.

Dareen gaar ah oo dhismahan afartiisa gidaar ku dhex wareegaya, ayaan dhex taaganahay. Kan u weyn illaa kan u yar ee shaaha la ordaya ayaa si u wada faraxsan. Codad dhaadheer, qosol googoos ah iyo sacab teelteel ah ayaa dhegaha maaweelinaya. Hoos ayaannu u soo dhaadhacnay. Waxa uu i tusay hool weyn oo aan kuraasi lahayn, balse leh meel la soo joogsado oo laga qudbadeeyo. Waa la sii

diyaariyey. Waxa ku sharraxan maryo leh midabbadii calanka xisbiga oo si farshaxan ah loogu badhxay calankii dalka. Waxa aan u gartay in ay tahay goobta aan hadhow marka ay natiijadu soo baxdo saxaafadda kula hadli doono; guul iyo guuldarroba. Waan ka gudubnay. Hoolkii weynaa ee caweyska loogu talo galay ayaannu soo galnay. Aniga ayuu iska kay horreysiiyey si aan albaabka uga galo. Ugu yaraan 250 qof ayaa u fadhiya shan-shan qof oo hal miis wadaagaya. Miis ku sharraxan maro cad oo ay korkiisa yaallaan suxuun iyo weelkii cabbitaanku. Tallaabadaydii koowaad ayaan dhigay, tii labaad waxa ka soo dheereeyey sacabka iyo dhawaaqa mar keli ah isla oogsaday. Saqafka sare ayaa qolka ka duuli gaadhay, anna xaadda ayaa i istaagtay. Waan qallalay. Hoos ayaan laba kaabadood u soo dhaadhacay, intii i soo xigtay ayaa gacmaha ila boobay. Intii aan ka gaadhsiin karayey ayaan salaamay. Oday Cumar ayaa i daba socda oo isna salaanta intii aan kari waayo gacanta marinaya. Isla daqiiqaddaas waxa aan dareemayaa gariirka telefoonka igaga imanaya, waa Indhadeeqdaydii.

Waxa aannu ahayn dad hoosta iska jeclaa, balse hadda isku soo goostay. Dareenka iyo saaxiibtinimada dhexdayada taalla ayaa sii kordhaysa mar kasta oo ay doorashadu soo

dhowaato. Meel kasta oo aan joogo iyo hawl kasta oo aan qabanayo, waxa ay noqotay qof igu lammaan. Saddex jeer ayuun baannu kala maqan nahay: marka ay wax dhiganayso, marka aan shir ku jiro iyo marka aannu hurudno. Marka ay fasalka ka soo baxdo waxa aan ka waraystaa wixii ay soo dhigatay. Markayga waxay i weydiisaa natiijadii shirka. Marka aannu soo toosno waxa aannu isu sheegnaa wixii aannu ku riyoonnay. Waxa aan jecelahay in aan waco mar kasta oo aan daqiiqad firaaqo ah haysto. Sida ay iigu jawaabto ayaan la wareeraa. "Hello babe" marka ay i tidhaa ayaa la i saaqaa. Inta aanay dhawaaqin, naqaska ka horreeya codkeeda ayaan la dawakhaa. "Iska warran, huuno?" marka ay i tidhaa ayaan iska qoslaa. "Maxaad ku faraxsan tahay" marka ay i tidhaa ayaan idhaa "adiga". Inta ay khajisho ayay in yar qososhaa. Marka aan dhugto ayaan iska dhareeriyaa. "Wax yar oo wacan ayaad tahay". "Adigaa iga wacan". "Wallay ka tahay, adaa madhab ah". "Maaha wallaahi, adaa asal ah". Muddaan wadannaa, hadal aan dhimanayn, dabadaa ka galnaa. Wanaaggaan u hayaan u higgadshaa kun jeer. Sida aan u ahay, ayay subcisaa in badan. Tartan baannu galnaa, annagoon is ogeyn. Inteeda badan, anigaa badiya. Marmar bay i tidhaa, hadal aad u macaan. Markaasaan anna waayaa mid kaloo ka

wacan. Aayar bay badisaa. "Horto sow kaa maan badin, ma aduun baa guulaysan mar kasta" ayay deedna tidhaa. Tartankaasaan galnaa mar kastoo aan hadlayno. Waan u sheegaa dareenka qalbigayga ka buuxa. Waan u sheegaa wanaagga qalbigeeda ka buuxa. Wejigeedan furan, dhabankeedan shuban iyo indheheedan qoran. Debnaheedani kuusan, ilkaheedan siman, marka ay soconayso hakinteedan qumman. Markay taagan tahay lugtan soo yara laaban. Isku soo wada duuboo, hannaankeedan wacan. Waxaas oo qurux ah marka ay ku ladho, hadalkeedan bilan. Iyadoo aan iska boobin, marka ay u nasato ereyga ay odhan doonto. Iyadoo uga jeedda, "huuno" ay i tidhaa. Waa marka aan kaba maarmo, xilkan aan u ordaayo. Waa marka aan is idhaa "bartan ay hadda joogo, Allow yaa ku ag geeya". Allow yaa dhowra uun iyadoo i hor joogta. Indhaha yaa ku illooba oo afka aan kala qaadin. "Iga jeedso dee huuno" marka ay i tidhaana, Allow yaa iska diida. Codkeedaa sallaxan, canjalad yaa ku qabta. Dabadeed iska daarta inta aanu gam'in. Allow yaa daya oo, waxba aan u diran. Faraheedani kuusan yaa ku duuga kuwayga. Naqaskay kabbato, hambadiisa dhama. Dunidoo hurudda, Allow yaa la caweeya. Dhabtaydoo barkin ah, Allow yaan is dhaqaajin. Markay "huuno" tidhaa, "hee macaaney" yidhaa. Allow yaa la rafiigoo,

odaygeedii ahaada. Bulsho yaa iska daayoo, bulshadeeda noqda.

Nasiib haddii aan leeyahay, maalintii aan aqbalay xilkii uu aabbo ka dhintay, ayaan iska diidi lahaa. Maalintii ay ii sheegtay dareenkeeda jacayl, ayaa soo horreyn lahayd. Anna maan aqbaleen xisbigaa shaqadiisa.

- Haddaan maalin hore kuu sheegi lahaa dareenkayga, siyaasadda miyaad iska dhaafi lahayd?
- Haa, waan iska dayn lahaa.
- Runta ii sheeg!
- Wallaahi waa iga dhab.
- Way hoogayeey, nasiib xumiyaa!

Way muraara-dillaacday. Haddana aniga ayay igu soo noqotay.

- Adigu maxaad maalin hore iigu sheegi weyday dareenkaaga, Faysaloow?
- Dee walaal ma kol buu aabbahaa oggolaanayey?
- Haa wallaahi, haddaad siyaasadda ka bixi lahayd.
- Haddaba way i seegtay taasi.
- Way iga daa, laba silic loogu talo galay ayaynu nahaye.

Waxaan is lahaa "si kastoo aad u jeclaato, is guursan kari maysaan". Aabbeheed Cali ayaa oggolaan guurkiinna is maan odhan. Taas ayaa keentay in aanan u sheegin dareenkayga.

Waxaan is lahaa "kolleyba suurto gal maahee, maxaad ka lug goyn?". hoostaan ka jeclaa. "Halkaa ha u dhaafin oo waxba ha u sheegin" ayaan is lahaa. In kasta oo carrabku dhowr jeer iga xaday ereyo dadban, haddana si toos ah waxba ugu maan odhan. Illaa ay igu tidhi "waan ku soo jeclaanayaa".

Waxa ay aaminsanayd in guurkayagu suurto gal noqon lahaa haddii aan siyaasadda ka bixi lahaa. Intii aanan guddoomiyaha noqonna, si dadban ayay iigu jawaabtay ii na dareensiisay waxa qalbiga ku jira. Balse sidaas ayaa qornayd. Goor aan ka sii fogaaday ayaannu is ogaannay. Derbi aan la dumin karin ayaa dhexdayada ka dhisan, mas'uuliyaddiisana aan anigu lahaa. Waa go'aan aan illaa maanta ka qoommamoodo, haddii aanan qaadan lahayna, aan farxad ku noolaan lahaa. Go'aankaasi waxa uu keenay calaaca badan oo aannu isku jibbinno wakhtiga qaar.

Walow aannu ogeyn in aanay rejo jirin, haddana waxa aannu u dhaqmaynay sidii laba is guursan doona. Waxa kale oo iska caddayd in aan doorashada badan doono, taas oo adkayn doonta xidhiidh naga sii dhexeeya mustaqbalka. Sidaas oo ay tahay, waannu isku marannay. Hal qof ayaannu noqonnay. Mar kasta oo aan firaqo haysto, dhegta ayay iigu jirtaa. Markii ay

doorashadu soo dhowaatay, shirarka habeenkii way iga la qayb geli jirtay. Khadka telefoonka ayay iga la socotaa. Waxa aad mooddaa in wakhti na kala geyn doona ku noolaanshihiisa aanu u sii sahay qaadanayno.

Waxa sii xoogaystay dareenkayagii. La'aanteed qof kala dhiman ayaan noqday. Marka aan la hadlo, muuqeeda arko ee aan naxariisteeda bogto ayaan bal-ballaadhaa. Way ka heshaa hadalka aan ku idhaa. Boqolkiiba sagaashan, qosol ayay rafataa. Laabtaa i qabowda marka ay qososho. Beryahaa maannu arag wax na dhiba, caawa kahor.

Waa saq dhexe. Dhanka guriga ayaan u socdaa. Markaas ayuun baan ka soo baxay shir aad muhiim u ah. Laba toddobaad ayaa doorashada ka dhiman. Guulaha aan soo hooyey ayaan si farxadi ku jirto ugu sheegay. Way ila faraxday, haddana i ammaantay. Siyaasad ayaa i madax-martay. Maan fahmin in guulahani ay jacaylkayaga guuldarrooyin ku yihiin. Waan iska daldalmayey illaa ay i qabatay. Cod yar oo deggan ayay ku bilowday:

- Faysaloow imika ma laba toddobaad ayaa doorashadii ka hadhay?
- Haa wallaahi huuno.
- Markaa laba toddobaad kaddib waynu kala tegaynaa?

Adakaa su'aashu. Calooshaa i xanuuntay. Wax aan idhaa waan garan waayey. "Waan ka xumahay wallaahi huuno" ayaan meel aanan garanayn ka soo qabtay.

- Markaa aayar uun baynu dad qariib ah isku noqonaynaa.

Codkeedii ayaa is beddelay. Dhuuntii ayaa xabeeb yeelatay, naqaskuna wuu sabbeeyey. Dhuunteeda mid qosolka oo keli ah taqaanna ayaan u haystay. In ay ooyi taqaanna, caawaan maqlayaa. Si kale ayaan noqday. Baabuurka ayaan wadi kari waayey, meel ayaan ku duway.

- Maalin dhow ayaad iga tegaysaa, madaxweyne ayaad noqonaysaa.

Qalbigaa i dillaacay.

- Riyadii aabbahaa ayaad rumaynaysa, farxad ayaad gelayaa. Hawl weyn oo ku mashquulisa ayaad qaban doontaa. Anigu maxaan sameeyaa? Keligey ayaan ahaan doonaa, sideen kuu illoobaa? Sideen kaaga samraa?

Maxaan ku idhaa?

- Huuno, huuno, aamus huuno ha ooyine, Indhadeeq, biliis aamus ha ooyine.

Waa runteed, waan mashquuli doonaa. Maxaan se sameeyaa? Waxaan ku dedaalay in aan iyada aammusiiyo, laakiin hadalkeedu waa gar. Indhadeeq way i jeceshahay, anna waan ka daranahay, wakhtiguna wuu na kala wadaa.

Jacayl dil ku xukuman ayaannu tunka ku sidannaa. Haddii aannaan faraha kala bixin, waa hubaal in aannu la hoyan doonno. Caawa aad ayaan uga xumaaday oohinta rejo-la'aantu keentay ee Indhadeeq. Beerka ayaa la i qabtay, balse iyada ayaan u calool-adaygay. Waan is xejiiyey. Markii ay dhammaysatay ayay nafistay. Haatan way aammustay, laakiin wixii ka oohiyey weli waa halkoodii.

Haddii ay jirto meel aan kaga hadho doorashadan, wallaahi waan ka hadhi lahaa. Waan ka hadhi lahaa oo aan iyada u hadhi lahaa. Taydii ayay noqon lahayd, markaasaan dadka u wada sheegi lahaa. "Ma arkaysaan qoftaa quruxda badan, waa Indhadeeqdaydii, waan is jecel nahay". In aan jecelahay ayaan kor ugu dhawaaqi lahaa. Markaasaan magaceeda dadka u subcin lahaa. Barta ay joogto ayaan ugu tegi lahaa. Waan u sheekayn lahaa. Qosolkeeda ayaan dhegeysan lahaa. Riyooyinka noocaas ah ayuu imika hadalkayagii u batay. Hadii aan ninkaaga noqon lahaa, wax ku dhiba ku ma idhaahdeen. Hawl ku kallifta kuu ma dirteen. Quraacda intaan soo sameeyo, ayaan sariirta kuugu keeni lahaa. Haddii aad ninkayga noqon lahayd, ku maan sii daayeen. Kolley shaqada ayaan kaa daahin lahaa. Marka aad soo hoyatana waan ku soo dhoweyn lahaa. Cunto aan kuu sii

kariyeyna waan ku hor dhigi lahaa. Sow dumarka la qabaa sidaa ma sameeyaan? Waan ku ilaashan lahaa. Naag ku soo eegaysa haddii aan arko, dhabanka ayaan kaa dhunkan lahaa, si ay u quusato.

Waannu qosolnaa. Aniga oo aan dhammayn ayay iga la wareegtaa. Marka ay waxoogaa waddo ayaan ka dhuftaa. Sidii aannu yeeli lahayn, nolosha macaan ee aannu wada dhisi lahayn, ubadka tirada iyo quruxda badan ee aannu jacayl ku dhali lahayn, iyo sidaannu isu la gaboobi lahayn ayaannu sawirannaa. Waa sawir aannu ku xarriiqno xeelliga badda, mar dhowna mawjadi masixi doonto. Sallaan dheer ayaannu hawada sare ugu baxnaa. Halka ugu sarraysa marka aannu joogno ayay runtu naga daba timaaddaa. Sallaankeedii ayay qaadataa. Madaxa ayaannu dhulka ku horreysiinnaa. Galgaladka ayaannu nolosha iyo qaddarkaba higgaadinnaa. Waannu garnaqsannaa, cid na dawbixisa weynaa. In ay noloshu naga gar daran tahay ayaannu meel isla dhignaa. Yaa looga dacwoodaa? Marka dambe ayaannu kulaylka ku eegnaa. "Noloshu waa cadow" ayaan idhaahdaa. Waa runtay. Haddii qof laga dhigi lahaa, meydkeeda ayaan ka kici lahaa. Waayo godob ayay iga gashay. Waxay i bartay barta laga helo milixdii naftayda ka dhinnayd. Markii aan dhadhamiyeyna "yaahuu" ayay i tidhi. Miyay i

qabataa? Qof aanan ka samri karin ayay i leedahay "illow". Miyaanay ogeyn in ay Indhadeeq hablaha kale wax dheer tahay. Sideen u illoobaa?

Dhanka kale marka aad eegto, wax aan beryaha qaar weyneyn lahaa, ayaan helayaa. Madaxweyne ayaan noqon rabaa. Waa tallaabbo aan maalmaha qaar ku faani lahaa. Maanta se dhadhan ma leh. Shayga aanad rabin ku soo doonan ogaa! Iyaduna – waa Indhadeeqe – guusha ku la doonan ogaa. Si kasta oo uu xilkani noo kala fageynayo, haddana garabkayga ayay taagan tahay. Way i riixaysaa oo i dhiirrigelinaysaa. Waa ficil jacaylka aan u qabo igu sii kordhinaya. Indhahayga keli ah may deeqin, gebigayga dhan ayay i deeqday. Kun jeer.

Hoolkii aannu natijada ku sugaynay ayaannu markaas uun soo galnay, markii aan dareemay gariirka jeebka bidix ka imanaya. Markii aan kursigaygii gaadhay ayaan soo saaray. "Hey babe, my madaxweyne" ayay isa soo raacisay. Farxadda aan caawa dareemayo, haddii ay kala dhiman tahay, haatan way dhan tahay. Yarta qoraalkeeda waan ku farxaa. Farriimo gaagaaban ayaannu is dhaafsannay intii aanan ku qasbanaan in aan odayaasha i ag fadhiya u soo jeedsado kahor.

Codbaahiyaha ku xidhan hoolka ayaa marna na maqashiinaya weriyaha telefiishanka kaga faalloonaaya codbixintii maanta, marna weriyaha kale ee raadiyowga ka soo gudbinaya saadaasha natiijada aan weli lagu dhawaaqin. Kolba sacab ayaa yeedhaya, sacab loo geeyey mashxarad. Dadka oo dhan ayaa rejo la sakhraansan. Guul aan weli la sheegin ayay tunka ku qaateen. In kasta oo mararka qaar la i saaqayo aniga laftayda, oo dadku iga xoog badanayaan, haddana waan is nabayaa. Weli waxba la ma hubo.

Farriimaha malabku ka da'ayo ee Indhadeeq iiga imanaya, waxa weheliya kuwa Muxiyaddiin. Waa qoraallo gaagaaban oo tirooyin u badan, waana natiijada degmooyinka tirintooda la dhammeeyey. Illaa iyo hadda, waxa uu ii soo diray 29 degmo. Laba mooyaane, inta kale Bulsho ayaa wata. Mararka qaar, marka ay farriimuhu ku filnaan waayaan, ayuu i soo wacayaa. Isaga oo jibbaysan ayuu yididdiilo i gelinayaa. Aayar ayaan ka guraa, waan u dejiyaa, in uu dareenkiisa xidho aan faraa.

Weligeey waxa aan si xun u naxay, markii aan sugayey natiijadii fasalka siddeedaad. Dhowr cisho oo calool-xanuun ah ayaa i soo maray berigaa. Maanta waa iyadii oo labanlaaban. Casho fudud oo aan mar dhoweyd is dhaafiyey, ma garanayo waxay ahayd. Waxaan se hubaa in

ay dhowr galaan oo biyo ahi igu tageen. Hooyo oo igu soo maqan ayaan kolba isha ku dhufanayaa. Way arkaysaa in aan naxsanahay, keligeed ayaanay arkaysaa.

Intii doorashadan iyo ololaheedu socday, weliba qaybteedii dambe, xiiso u maan qabin xilkan aan u ordayo. Meel aan ka soo noqdo ayuun baan garan la'aa. Mararka qaarkoodna in la iga badiyo ayaan ku ducaysan jirey, si aan jacaylkayga si xorriyad leh u la noolaado. Balse caawa in aan badiyo ayaan rabaa. Maaha in aanan Indhadeeq jeclayn, guul-darrada ayaan necebahay.

Saddex saacadood ayaa ka soo wareegay markii aan hoolkan soo galay. Salka oo i jactaday ayuu telefoonku gariiray. Marka aan arkay magaca ayaan dhegta ku la booday. Waa Muxiyaddiin oo codku dirqi kaga soo baxayo. Dadka oo ay u horreeyaan hooyo iyo Oday Cumar, ayay indhahoodu igu soo maqan yihiin. Shanqadha ayaa mar keli ah go'day. "Waynu guulaysannay" markii uu i yidhi ayaa iigu dambeysay. Xisaabihii dambe ee uu tirinayey, maan maqlayn. Dhegahaa is daboolay. Inta wejigeysa ku maqanina way ku hungowday, waayo wax dareen ah maan muujin. Aayar ayaan hoos u dhigay telefoonkii. Weedhii uu Muxiyaddiin igu yidhi ayaan hoos ugu idhi intii i la fahday. Mar keli ah ayuu hoolkii farxad

darteed qaylo la dayaamay. Dhego dheeraa!
 Daqiiqado gudahoodna, warbaahinta ayaa si
 rasmi ah ugu dhawaaqday. Madaxweyne ayaan
 noqday. Aan ku celiyo. Madaxweyne ayaan
 noqday. Malaayiin qof ayaa mar keli ah
 magacayga higgaadiyey. Faysal Keynaan, waa
 aniga, oo madaxweyne ah. Weli iga may degin.
 Kolley beryahaana iga degi mayso. Dareennada
 kala duwan ee jidhkayga ku jira oo dhan ayaa
 meel la isugu keenay, markaasaa qof xoog weyni
 laaqay. Waan istaagay, afku i kala tegay, oon
 iska ilmeeyey. Qofkii i taabta ayaan ku dhegaa,
 oon muddo haystaa. Qof kastaa wuu i la
 hadlayaa, waxba se ma maqlayo. Waan
 xasuustaa in ay Indhadeeq i soo wacday, oo ay i
 la faraxday. Dhinacan kale hooyo ayaan ku
 dheggaanahay. Farxaddaydu way dhammaystiran
 tahay. Hal qof ayuun baa ka maqan, aabbo.
 Caawa oo kale wuu boodboodi lahaa. Toloow
 miyuu og yahay in inankiisii guulaystay? In
 riyadiisii rumowday? Toloow malaa'iigtu ma u
 sheegaysaa? Waxa aan sawirtay isaga oo halkan
 soo taagan, garabkii hooyo ee uu cidleeyey
 agtiisa. Gowsaha dambe ayaa muuqda,
 indhuhuna way qoyan yihiin. Laabta ayuu i
 geliyey, laabtiisii diirranayd, markaas ayuu igu
 yidhi "waan kuu han weynahay, aabbo.
 Hambalyo, mudane madaxweyne!".

8 NABADGELYO

Laba toddobaad oo kale ayaa tegay. Afar iyo toban maalmood oo sida hillaaca igu dhaafay. Maalmo aan jeclaan lahaa in la kala jiido, balse aad mooddo in ay taas cakiskeeda ku kacayeen. Maalin aan ka ducaysan jirey ayaa iska timid. Waa barqo, waxa aan ku sii jeedaa xafiiskii dhexe ee xisbiga. Halkaas oo aannu iska raaci doonno xubno igu wehelin doona tirsashada xilka cusub. Dirawalku hawshiisa uu daqiiqado kahor bilaabay ayuu wataa – in uu i geeyo meesha aan u socdo. Aniguna shaqo aan 24 saacadood kahor bilaabay ayaan weli wadaa – in aan u sheekeeyo Indhadeeq. Sheeko daqiiqado kaddib dhammaan doonta. Dhammaad ka ma dambays ah. Shalay xilligan oo kale ayaan bilaabay telefoonkan aan ku hadlayo. Aniguna ma seexan, iyadana hadalkeedaba daa. Daqiiqad kasta si buuxda ayaannu uga faa'iideysan doonnaa. In badan waannu isu soo calool-adaygnay. Markayga ayay i dejisaa, i tidhaa "Allaa qoray". Markeedaan intii in le'eg ku idhaa. Kun ballamood ayaannu iska qaadnay. In aannan is illoobi doonin, suurto galba maahee. In aannu iska war hayn doonno, wax kasta oo dhaca. In ay walaaltinnimo naga dhaxayso, illaa inta aannu noloshaan ka tegayno. Ereyadu qadhaadhaa. Qof naftaada kaaga dhowaa, oo

aad walaaltinnimo ku sheegayso xidhiidhka idin ka dhaxayn doona. Waa fageyn. Qof mar walba ku la jooga in aad isku waanisaan in aad iska war haysaan. Waa qalbi-jab. Wehelkaaga koowaad, saaxiibkaaga rumaad, farxaddaada oo dhan sideed "nabadgelyo" ugu odhan kartaa mar keli ah. Haddii ay xumaan kale na kala geyn lahayd, way fududaan lahayd. Imika se waannu is jecel nahay, wax qalad ahna isu ma haysanno. Haddana wakhtiga ayaa na kala wada. Qof aad isku calool fayow dihiin, sidee looga tagaa. Ma jirto xeer qoran oo la adeegsadaa, waa se xanuun ay qasab tahay in la maraa. Seefta ayaa nagu dhacday. In aannu dhaawac ahaan doonno inta nolosha nooga dhiman, waa hubaal. Waxa se is weydiin leh: dhaawacaa miyaannu u dhiman doonaa?

Waxa aan ku soo dhowaaday goobtii aan u socday. Waxa aan amray in baabuurka la joojiyo. Waan ka degay. Askarigii ayaa iga soo daba degay. In uu ku noqdo baabuurka ayaan ka codsaday. Isagoo cagaha jiidaya ayuu sii jeedsaday. Wajahaddayda waxa ah dhismeyaal si kala dheer u daadsan, badhtankooda waxa ka muuqda kii aan u socday. Dhabarkayga waxa iga soo eegaya kii aan ka imid. Dhegta waxa igaga socda codkii aan maqalkiisa dunida u jeclaa. Bartaa aan taaganahay waa isgoyskii noloshayda. Marka aan hal tallaabbo hore u qaado, noloshaa

aan ka imid ee dhabarkayga daadsan ayaa iga hadhay. Nasiib-xumadu waxay tahay, Indodeeq ayaa ka mid ah. "Huuno wallaahi waan kuu soo ducaynayaa, Ilaahay wax ku dhiba ku ma tuso. Sida khayrku ku jiro Ilaahay ayaa og, Isagu farxad ha ku siiyo. Yaynaan ka dhigin hadalkan mid 'nabadgelyo' ah. Aynu nafta khiyaamayno. Kolley ma kala dhammaanayno ee aynu been u sheegno nafta. In badan ayaynu soo oynay, imika ayaanay sheekadu isugu soo ururtay. Ii faraxsanow, maalinta aad nolosha aragtana, fadlan karbaash". Meel aan qosol looga fadhiyin ayaannu iska qosolnay haddana. "Ma garanayo si aan qof kale u jeclaan doono Indhadeeqeey". Intaa in ka badan ayay i tidhi. "Haye huuno, nabadgelyo. Bye, bye". Haddana "bye". Waan dhigay. Walow uu khadku go'ay, telefoonka ayaan dhegta ka qaadi kari waayey. Telefoonkaa dhegta ku dheggaan ayaa ahaa astaantii u dambaysay ee xidhiidhkayaga. Isagana waan ka qaaday. Alla xanuun kululaa. Ilaahayoow xanuunka i hayaa weynaa. Sideen uga gudbi doona?

Baabuurka ayaan laab isaga ka culus la fuulay. Cag aan waxba ogeyn ayaa hore noo dhaqaajisay. Qof aad iigu baahnaa ayaan ka dhaqaajiyey, meel aad la iiga rabey ayaan ku hagaagay. Dhismihii ayaan soo galay. Waa la igu farxay. Ii ma dhadhamayso. Waa la ii

sacabbiyey. Ma maqlayo. Waa la i soo dhoweeyey. Fogaansho ayaan dareemay. Dareen aan qarinayo ayaa iga maax-dumaya. "Iska warran?" amma "sideed tahay?" ayaa igu filan. Waan soo fatahayaa. Sida dameerka ayaan u ciyi lahaa. Waxa ii sawiran Indhadeeq iyo xaalkeeda. Toloow sidee ayay tahay imika? Halkee ayay jiiiftaa? Ilmada yaa ka masaxaya? Durba waan tebay. Waan u duceeyey. Iyada ayaa i bartay in qofka aad tebito loo duceeyo. Casharro badan oo ay i siisay ayay ka mid ahayd. If iyo aakhiraba meel roon mar! Dhismihii ayaannu ka dhammaannay. Madaxtooyada ayaannu galnay. Madashii oo aan weli la isu wada iman. Weli hadal aan "haa" iyo "waa run" ahayn maan odhan. Maalintan baas may iga dhammaato aan iska baroorree. Maaha maalin bilowna ah weli. Kamaradaha wejigeyga qaban doona ayaan ka sii fikirayaa. Ilaahay igu ma dhibin. Wuu i baray sida qosolka beenta ah wejiga loogu xardho. Madaxweynaha daqiiqaduhu u hadheen ayaannu gaar isu aragnay. Si degdeg ah ayaan u soo dhaafay. Bartii la ii qoondeeyey ayaan la fadhiistay wadne dhiiggu da'ayo. Naftu daciifsanaa. Ma intanaa ka adag? Laabta illaa caloosha in la iga dhex saaray ayaan dareemayaa. Waxaan is weydiinayaa "maxay ahayd ujeeddada aan u bartay Indhadeeq?". Ma inta qof wanaaggiisa la i tusay ayaa haddana la

iga qaaday? Maan fahmin. Waxa la yidhaa wax walba sabab ayay u dhacaan, tan sababteeda maan garan. U malayn maayo in ay sabab leedahay. Hadalkii aan imika ku lahaa ayaa carrabkayga ka sii qoyan. Maskaxda ayaa sidiisii u haysa. Kolba way ii daaraysaa. Qaybta fahanka ayaa ka gaabinaysa in ay garato waxa ku dhacay. Sideen maanta oo dhan u joogaa aniga oo aan codkeeda maqal. Caawa miyaan seexan karaa anigoon iyada seexin? "Subax wanaagsan" yaa ii soo diraya. Farriimaheeda oo ku jira telefoonka ayaan indhaha kala furi jirey, iyaduna sidoo kale. Aroorta sidee ayay wax noqon doonaan? Telefoon qallalan ayaan ku hungoobi doonaa. Inta aan naftayda la tacaalayo, dadku xafladdan kala-wareejinta ayay la daalaa-dhacayaan. Macagaygii iyo gujada Oday Cumar ayaan ku toosay. Aar may iska kay daayaan! Naf ay kallifeen ayaan dhankii makarafoonka la aaday. Salaan aan cayuuqay ayaan bataq ka siiyey. Intaa kaddib ayuu dareenkaygii isku beddelay mid cadho. Madaxweynihii iga horreeyey oo i ammaanay, isaga oo ka sii hor dhacaya waxa aan odhan doono, ayaan maammulkiisii si toos ah u abbaaray. Talada iigu may jirin, waan se ku nafisay. Dhaqaalaha ayaan ku talax tegay. Burburka soo gaadhay ilaha dhaqaale ee dalka ayaan daaha ka qaaday. Colaadda aan loo baahnayn ee uu waddamada jaarka ah ku

abuurray ayaan dadka tusay. Xidhiidh-xumada caalamiga ah iyo diblumaasiyadda dalka ee dhimatay ayaan carrabka ku xejiiyey. Dhammaan wixii aan u qarin jirey, haddiiba ay jirtey wax aan u qarin jirey, ayaan faaqiday. Iyada oo iga dhab ah, ayaan ka sheekeeyey sida aan wax u hagaajin doono. In uu dalkani dib u soo ceshan doono haybaddii uu ku lahaa qalcaddan uu adduunka kaga yaallo. In uu calankiisu ka babban doono dalal badan oo hore u dejiyey. In uu noqon doono dal la higsado. Waxa aan carrabka ku adkeeyey musuqmaasuqii dalka loo geystay. Waxa aan ballan qaaday in aan ka daba tegi doono madaxdii hantida dalkan lunsatay, maxkamadna soo taagi doono. Dareen murugo ah oo dhexdayda sida duufaanta ugu kacsanaa, oo aan garan la'aa cid aan u sheego, ayaa sidan isu beddelay. Goortii aan kaabadaha labada ah ka soo dhaadhacayey waxa aan ahaa qof saxarka ka fudud. Aniga oo calooshayda imika dareemaya ayaan fadhiistay Oday Cumar agtiisii. Warkii ayaa durba gaadhay warbaahinta caalamka. Aniga ayaa dib u daawaday hadalkaygii. Show waxoogaa murugo ah ayaan u baahnaa. Waa loo riyaaqay. Dad aan waxba ogeyn ayaa i ammaanay. Telefoonka gaarka ah ee madaxtooyada ayaa qiiqay. Dalba dalka uu ku xigo ayaa saf soo galay. Dhammaantood waan uga mahad celiyey ereyada wacan. Mid kasta in

aan gaar u la kulmi doono ayaan u ballaan qaaday. Cadowgii uu dalku lahaa, oo qaarkood hambalyo been ah ii soo direen, ayaa markiiba quus muujiyey, sida sirdoonku ii sheegay. Balse dhankaas ma rabo in aan wax wakhti ah ku lumiyo imika. Wax ka muhiimsan ayaa jira, waana dhaqaalaha dalka.

Dalku waxa uu leeyahay afar dekadood, lix gegi-diyaaradood iyo saddex iyo toban xeebood oo dalxiiska loogu talo galay. Intaa waxa dheer ganacsiga khayraadka dabiiciga ah ee ay xukuumaddu gacanta ku haysay. Dhammaantood fadhiid ayay noqdeen. Dadkii dalxiiska u iman jirey dalka ayaa hoos u dhacay boqolkii todoobaatan iyo sagaal. Kharashkii dalka ka soo geli jirey ilaha ay xukuumaddu maammusho, ayaa gacanta u galay dad ay dowladdu si gaar ah u siiso. Taasi waxa ay keentay in uu dalku u qaybsamo dabaqado aad u kala waayo fog. Shaqadayda ayaa ah in aan dabaqadaha noocaas ah isku soo dhoweeyo, maaddaama oo aanay suurtoagal ahayn in la tirtiro. Sidaas darteed ayaan ugu magacaabay saaxiibkay Muxiyaddiin jagada wasiirka maaliyadda. Magiciisa ayaan ku soo daray liiska dowladda cusub ee toddobaad gudihi la iga sugayey in aan ku soo dhammeeyo. Ma garanayo qof isaga kaga habboon oo xisaabaadka iyo tirooyinka yaryar kala qaybin kara. Shaqo hor

leh ayaan jid toosan ku hagaajiyey. Dhidibbada ugu waaweyn ee ay dowladi ku taagan tahay saddex ayaa loo qaybiyaa, mid ka mid ah ayaa ah dhaqaalaha. Taas ayaan xoogga saaray. Taas ayaa soo dhoweyn karta cid kasta oo qarankan dantiisa ah. Markiiba waxa uu xisaab-xidh ku soo sameeyey qasnadda dalka. Wax aan lagu farxin ayaa ka soo baxay. Miisaaniyadda sannadkii inna dhaafay dalka u dejisnayd, saddex-laabkeed, oo deyn ah ayaa qaranka lagu leeyahay. Waraysiyo la iga qaaday ayaan dadka ugu sheegay in qalfoof na loo dhiibay, balse ay shaqadayda tahay in aan jiidh u yeelo. Jidkii lagaga gudbi lahaa xaaladdan degdegga ah ee maanta taagan, ayaan maray. Ma aha mid fudud, waan se ogaa in aanay shaqadani ahayn mid raaxo. Jago kasta qof u heellan, aqoonteedana leh ayaan u diray. Kormeerkeeduna waa dushayda.

Muddo aan badnayn kaddib, waxa muuqatay in deyntii soo yaraanayso, dalkuna cagihiisa ku soo istaagayo. Dhanka kale naftayda ayaan la tacaalayaa. Dadku waxay arkayaan in aan dal dunsan dhisayo. Balse ma arkayaan in aan aniga laftaydu dusanahay.

Laba maalmood markii ay ka soo wareegtay hadalkii u dambeeyey ee aniga iyo qalbigayga na dhex mara, ayaan maanta is hayn kari waayey. La'aanteed wax madhan ayaan noqday. Xafiiska

ayaan dhex fadhiyaa. Telefoon aan keligeed u soo qaatay ayaa gacanta iigu jira. Miiska hortayda yaalla ayaan u sawiray. Waan u diray. Waxaad moodaysay in ay sugaysay farriin dhankayga ka timaadda. Markiiba way ii soo jawaabtay. Alla maxaan ku tebay! Qoraallo ayaannu is weydaarsannay. Suurtogal maaha in aannu sidaas uun ku kala go'no. Wax intaa ka weyn ayaa na dhex yaalla. Wax aan sidaa ku ba'ayn ayaa naga dhexeeya. Hammuun ayaannu isku la dul dhacnay. Dhinac waannu ka taxaddiraynaa, dhinacna nafta ayaa naga xoog badan. Ma rabno in aannu dib u soo faqno dareenno labeen yari ka sarrayso. Waan qaboobay markii aan helay. Waa qabow intee socon doona, inta aanu kulaylku bilaabmi kahor? Maalintii xigtay ayaan haddana la gabbaday telefoonka. Waan wacay. La ii ma oggola in aan ku hadlo telefoon. Jiritaanka dalka ayay khalkhal gelin kartaa. Waxba iga ma gelin. Kolleyba maaha telefoon la igu og yahay. Gidaar ayaa la iiga soo iibiyey, iyada ayuun baanan ugu talo galay.

Codkeedii markii aan maqlay ayaan noqday dhimbiil la rusheeyey. Qaac iga baxay kaddib, waan qabowsaday. Si sidii hore ka duwan ayaannu u wada hadlaynay dhowr maalmood. Si aan ahayn sidii wada jacaylka ahayd. In aannu dabinka jacaylka ku dhici doonno mar labaad,

maan ogeyn. In yar kaddibba waxa aannu dib u bilownay yeedhmadii laba is jecel isticmaali jireen. Si yar ayaannu ugu soo noqonnaa sidii aannu ahayn xilka kahor. Waannu macaansannaa. Mowjad naga xoog badan ayaa na qaadata. Annagoo oggol ayay na la tagtaa. Qiyaastii laba toddobaad ayaannu sidaas ahayn. Waxaannu isla garannay in aanay sidani noo fiicnayn. In aannu joojinno xidhiidhka noocan ah. Waannu isku raacnaa. Waannu joojinnaa. Laba cisho ma kala maqnaanno. Halkii ayaannu ka bilownaa. Maalintii dambe ayaan talo keenay. Waxaan idhi "aynu joojinno hadallada dareenka ka hadlaya oo dhan". Maaddaama oo aan xidhiidh noocan ah mar keli ah la joojin karin, kolba qayb ha la xidho ayaan ku fikirayey. Waannu isla qaadannay. Waxa meesha ka baxay "waan ku jecelahay, waan ku tebay, waan kugu riyooday". Xumaa marka aanad qofkaaga u sheegi karin sida aad u dareemayso. Culayskeeda ayay lahayd, dabcan muu sii waarin qorshahaasi. Is ma xejin kartid. Imika waxa keli ah oo na kala goyn lahaa waxa uu yahay, adduunka oo korontadu ka go'do. Weligeedna aanay u soo noqon.

Xidhiidhkan dhexdayada ee soo noqday ayaa isaguna saamayntiisa taban ku yeeshay shaqadaydii. Waxa aan noqday qof ka fikiraya Indhadeeq mar kasta. Qof qalbigiisu maqan

yahay ayaan ahay. Waxay iigu dhan tahay codkeeda. Waxa kale oo dhan markaas ayaan illoobayaa. Caajis dhinacyada kale ee nolosha ah ayaa ila soo darsay. Marka aan iyada la hadlayo waan qoslayaa. Marka aan dhigo ee khadka kale la ii sheego in uu ku jiro safiir meel fadhiya, amma wasiir talo-bixin u baahan, ayaan odhanayaa "la ma heli karo" dheh. Waan iska fadhiisanayaa, wax aan qabanayaana ma jirto. Xubnihii aan dirsaday ee wasiirrada ahaa ayaannu kala xidhiidh furannay. Cid shaqadooda ku kormeerta markii ay waayeen, dhankay doonaan ayay ula keceen. Nin dardartiisii quwad-jabtay ayaan u ekaaday. Shicibka may gaadhin arrintani, balse intii aan wax u igmaday ayaa dareen noocaas ah qaatay. Anigu ma danaynayo. Marka aan telefoonka dhigo, waxa aan sugayaa marka dambe ee aan wici doono. Inta u dhaxaysana farriimo ayaan u dirayaa. Saluug badan ayaa laga muujiyey shaqadayda, ha u horreeyo saaxiibkay Muxiyaddiine. Si dadban ayuu dhowr jeer iigu sheegay, anna la maan sii wadin. Illaa markii dambe ay iyadu dareentay. Si kasta oo ay ii jeceshahay, ma rabto in uu xidhiidhkayagu noqdo mid aniga i fashiliya. "Faysaloow sidani ma sii soconayso, waa in aad waddanka hagto. Ballamihii aad qaadday waa in aad ka soo baxdo, xabiibi dee. Waa in aan joojiyaa qaskan aan

wado”. Waxaan la soo boodaa in aanay dhibku iyada ahayn. ”Haddaa waa maxay?” ayay i tidhaa. Waxaan u sheegaa in aanan shaqadan rabin in aan sii wado. Ma dadka ayaan u lumiyaa farxaddayda shakhsiga ah? Ma rabo in aan dhinto aniga oo ka qoomamaynaya waayitaanka aan waayey Indhadeeq. Ma rabo in aan la gaboobo murugo iyo qoomamo. Waxa aan rabaa in aan noloshaan ka dhammaado aniga oo ku faraxsan sidii aan u soo noolaa. Taas shaqadeeda ayaan rabaa in aan maanta bilaabbo. Alifkeeduna waa helista Indhadeeq. In aanan shaqadan niyad u hayn, in aan iska casilana rabo, ayaan u sheegay. Waa dareen maalmihii u dambeeyey soo xoogeysanayey. Ma doonayo in aan madaxweyne sii ahaado.

Habeenno badan ayay hurdo-la’aani igu dhacday. Balse go’aankaas ayaan gaar u gaadhay. Culayska i saaran ayaan iyada u sheegay. Shaqo aanad ku faraxsanayn, si kasta oo ay muhiim u tahay, qabashadeeda waad ku fashilmaysaa. Farxad ayaan rabaa in aan helo. Laakiin farxaddaasi ma tahay mid aan diyaar u ahay in aan ku bixiyo wax kasta oo ay igu kacayso. Ma tahay mid aan riyadii aabbahay, garabkii hooyaday iyo rajadii shicibkaygaba ku doorsan karo. Waa su’aal aan rajaynayo in ay jawaabteedu sidan ka fududaan lahayd. Intaas ayaan kafad saaray, farxaddaydana kafad kale

ayaan saaray, midka cuslaada ayaa la ii diiday in aan ogaado. Nolosha aniga oo keligeys ah ayaan imid, aniga oo keligeys ah ayaan ka tegi doonaa, maxay tahay markaa dadkan aan ka fikirayaa? Haddii se aanan ka fikirin, miyaanan danayste noqonayn? Mise waa qasab in aan danta guud ka horreysiiyo dantayda? Markii aan dhanna uga socon waayey, ayay igu tidhi "Faysaloow walaal ma rajaynu leennahay oo wax baa kuu qorshaysan?". Markiiba waxa aan la soo booday "haa". Sidaa ay afka uga soo baxday ayaan rajayn lahaa in uu ficilkeeduna u fududaan lahaa. Rejo ayaan ku abuuray indhahaygii. Way faraxday. Beenna u maan sheegin ee sidaas ayuu ahaa qorshahaygu.

Haddaba sidee ayaa la isu casilaa? Madaxweyne imika uun la doortay haddii aad tahay, rejada malaayiin qof haddii aad tahay, sidee loo niyad-jebiyaa hooyadaa? Halkee laga bilaabaa? Go'aan noocaas ah oo aan la wadaago hooyaday, waxa uu noqonayaa cir aan daruur lahayn hillaac ka yimid. Waa wax aan loo fadhiyin, sababtuna tahay in aan weligeys la iga arag rabitaan noocaas ah.

Qorshihii koowaad ayaan dejiyey. Muxiyaddiin ayaa sidii caadiga ahayd xafiiska iigu yimid, aniga oo markaas uun jeebadda sii xuluulinaya telefoonkii yaraa. Hortayda ayuu soo fadhiistay.

- Li warran, madaxweyne?

Hoos ayaan u qoslay. Waayo waxaan ogahay in aanu diyaar u ahayn warka aan hayo.

- Waan fiicanahee warran adigu? ayaan u celiyey aniga oo kala maqan.
- War farxad leh ayaan kuu hayaa.
- Abshir! Soo daa.
- Qoollaydii gacantaan ku dhigay.

Qoollaydu waa magaca sirta ah ee aanu u isticmaalno dalka Shiinaha. Waddan kasta oo dunidan ku yaalla, magiciisa gaarka ah ayuu leeyahay. Waxa intaas dheer hoggaan kasta oo dalkaas maammula, safiir kasta oo ay dalka ku leeyihiin iyo dan kasta oo naga dhaxaysaa, waxa ay leeyihiin magacyo u gaar ah. Shiinuhu waxa uu ahaa dalka ugu weyn ee uu dalkani xidhiidh dumlamaasiyadeed oo wanaagsan la lahaa labaatankii sanno ee u dambeeyey. Nasiib-darro waxa uu xidhiidhkaasi daciifay sannadihii ay xukuumaddii hore talada haysay. Waa guul aad u weyn.

- Haya?
 - Waxay diyaar u yihiin, sida aan hadalkooda ka fahmay, in ay soo celiyaan oo ay dib u saxeexaan heshiishkii "Dalsan lambar wan".
 - Suurtogal maaha malaha.
 - Mudane madaxweyne waa sidaas.
-

"Dalsan lambar wan" waa summadda heshiiska ugu dhaqaalaha badan ee uu dalkani abid la saxeexo dal shisheeye. Waa heshiish saddex lugood ku taagan. Waxa ay maal iyo farsamaba ku bixinayaan dhammaan isgaadhsiinta dalka oo dhan. Isgaadhsiinta oo looga jeedo dhammaan jidadka isku xidha magaalooyinka waaweyn, kuwa tuulooyinka ku xidha magaalooyinka kale iyo kuwa magaalooyinka dhexdooda ahba. Muddo shan sanno ah ayay taas ku dhammaystirayaan haddii uu heshiiskani sidaas ku dhaqan galo. Tiirka labaad ee heshiiskan ayaa ah maalgashi iyo warshado ay dalka ka dhisi doonaan, taas oo shaqaaleheedu ugu yaraan boqolkiiba sagaashan noqon doonaan dad Soomaali ah. Taas oo sahli doonta in laba sanno gudahood lagu soo afjaro shaqo-la'aanta dalka ku baahsan. Tiirka saddexaad ee heshiiskan ayaa ah korontada. Tiirka oo soo hoos gelaya isgaadhsiinta, ayaa isagu ka ciyaari doona kaalin muhiim ah xidhiidhka dadka iyo horumarinta dalka. Korontada oo gaadhi doonta qof kasta oo muwaadin ah, bartiisana ugu tegi doonta. Saddexdaas arrimood waxa loogu beddelayaa qalcadda kow iyo soddonaad ee macdanta. Qalcaddan oo markeeda horeba si tuugo ah loo isticmaalo, dad gaar ahna gacanta loo geliyey. Marka loo eego faa'iidada uu heshiiskani dalka u

leeyahay, kharashka dhanka dalka ka baxay ma badna.

Muxiyaddiin waxa aan faray in uu heshiiskan la soo diyaariyo wasaaradda ganacsiga, isaguna uu diyaarintiisa hoggaamiye ka noqdo, marka dambena la soo mariyo maxkamadda sare. Inta ka horreysana aan anigu halkaa ka sii ambaqaadi doono xidhiidhka Qoolleyda oo darajada sare ah.

Safiirkooda dalka u jooga ayaan telefoon ka helay. Wadahadal gogolxaadh u ah midka aan la yeelan doono madaxweynaha dalkiisa ayaannu dusha ka salaaxnay. 18 saacadood kaddibna waxa si toos ah ii soo wacay madaxweynaha. Martiqaad ayuu ii fidiyey. Shan maalmood kaddib ayaan baxayaa. Waan farxay. Laba arrimoodba waan u riyaayay. In dalku hadda kaddib gaadhayo isku-filnaansho dhaqaale iyo taas oo ii sahlaya in aan si fudud isa ga casilo xilka. Waayo markaa waxaan ogahay in aanan dalka dayicin oo aan heshiis aan dib loo burin karin saxeexay.

In guul noocaas ahi soo socoto ayaan u sheegay jeexaygii. Waan se ka qariyey qorshahayga is-casilaadda ee ku daba laaban. U maan sheegin in aan heshiishkaa sugayo. Waxaan se u dul maray dhowr jeer in aan dhowaan bannayn doono kursiga. Qalbi wax jecel oo ku dhex jira ayaa qaboobay. Safarkii

ayaan u baxay aniga oo iyadana jeebadda ku sita. Waa la i soo dhoweeyey. Tani waxa ay noqotay tallaabadii ugu horreysay ee aan ku hagaajinayey xaaladda arrimaha debedda ee dalkan. Wax badan ayaannu isla soo qaadnay. Warbixintiisa, sida waxyaabaha uu xiiseeyo oo uu sirdoonku ii soo gudbiyey, ayaan kala sheekaystay. Isna sidoo kale sidii qof i yaqaan ayuu ii la hadlayey. War isugu ma kaaya laabna. "Waan ka xumahay geerida aabbahaa" ayuu si beerlaxawsii leh ii yidhi. "Waan ka xumahay bisaddaadii Leo ee baxsatay" ayaan u celiyey. Sheekada ayuu beddelay. Dhankii heshiiska ayaannu falanqaynay. Soddon daqiiqo ayaannu kala wadnay. Guul ayaanay noogu soo dhammaatay. Haddii uu heshiiskaasi sidaa ku dhaqan galo, "walaaltinnimadeenna ayaa sii kordhi doonta" ayuu yidhi. Walaaltinnimo ma jirto, waa dan laba geesood ah. Taas ayaa wax la isugu yahay. Aniga oo guul tirsanaya ayaan dalkii soo cago-dhigtay. Heshiishkii oo diyaar ah ayaan miiskayga ugu imid. Wuu saxeexan yahay, keliya kaygii ayaa ka dhiman. Waan ku duugay.

Imika haatan si joogto ah, oo aan ka dhicin sidii berigii aan wakhtiga haystay, ayaannu u wada hadalnaa. Dad rejo cusub gashay ayaannu nahay. Si debecsan ayay ii weydiisaa goorta aan si buuxda keedii u noqonayo, ee aannu

tuugonimadan ka baxayno. "Dhowaan xabiibi" ayaan ugu joojin jirey. Laakiin maanta jawaabtaasi way mari weyday. Waxay iga codsatay in aan wakhti u sheego. In ay rejo-kunool tahay ayay ii sheegtay. In aanay ogeyn waxa dhici doona iyo goorta uu dhici doono, ayay ii sheegtay. Taasina dhib in ay ku hayso aniga ayaaba og. Waxaan ku idhi laba bilood kaddib ayaan go'aan ku siinayaa, weliba go'aan inna farxad geliya. Waa sida aan ku tashanayey markaa. In aan laba bilood kaddib, marka uu heshiiskani dhaqan-galo, aan is casilo. Sidaasna ay taydii ku noqoto. "Xabiibi laba bilood way fog tahay dee" ayay si macaan ii tidhi. Waa runteed. "Bil igu dheh, bishan soo socota ka dhig". Miyaan diidi karaa. Waannu xisaabinnay. Waa bishan soo socota kow iyo labaatankeeda. Waa maalinta aan siin doono go'aanka farxadda ah. waa maalinta aan is casili doono. Waa arrin iga go'an.

Maalmo aan badnayn markii annu sii wada hadlaynay, ayay galab ay qorraxdu dhuumanayso, i soo wacday. Hadallo macaan kaddib ayay ii sheegtay sida ay dareemayso. Waxa ay ii sheegtay in ay go'aankayga ka werwerayso. In aanay maalmahan ka seexan waxa soo socda. Walow aan u sheegay in uu yahay go'aan xidhiidhkayaga u fiican, haddana ay ku nafisi weyday. Sidaas darteed ay rabto in

ay isu diyaariso go'aan kiisa u xun. Haddiiba aan doorto in aanan is casilin, si aanay aad ugu niyad-jabin. Waxa ay rabtaa in ay xidhiidhka aannu maanta leennahay joojiso inta ka hadhay 21-ka bisha. "Si aan isugu diyaariyo go'aan wax yeeli kara jacaylkeenna" ayay tidhi. Waan ka naxay in aan xanuun intaa le'eg gaadhsiiyey nafteeda. In ay ka sii baqayso in aan shaqada ka doorto iyada. Walow aanay taladaydu taas ahayn, haddana waan ka aqbalay. Xidhiidhkayagii ayaa sidaa ku istaagay. Jirtoo aannu iska soo war dooni jirney, haddana waanu kala xidhiidh furannay wakhtiga intiisa badan. Aniguna waxa aan wakhti u helay isu-diyaarinta is-casilaaddayda. Xeerarka dalka ayaan dib u akhriyey. Wax kasta oo i khuseeya ayaan si sir ah u akhristay. Wax i xidhayaa ma jiraan.

Hooyo oo madaxtooyada igu la nool ayaa dhiirrigelin ila garab taagan. Ma oga laabtayda iyo qorshaha aan hoosta ka wado. Inankeeda oo aan xaas lahayn, dal dhanna hoggaaminaya, ayay tiiri is leedahay. Ma daasho. Ma nasato. Werwer ma deyso. "Iska warran, hooyo?" iga la ma daahdo. Gacanteeda ayay iigu samaysaa cuntada aan cunayo, mid kale ayay igu qasabtaa in aan qaato, iyada oo nabadgelyadayda u baqaysa, marka aan safar u baxayo. Biyaha aan cabbayo iyada ayaa ii soo habaysa. Way ila dardaarantaa. Inta badan waxay ii sheegtaa in ay ka xun tahay

in aanu aabbo i ag taagnayn, laakiin ay isku deyi doonto in ay intii ay awooddo kaalintiisa ii geli doonto. Waan jecnaan lahaa in aan wakhti u helo aan ugu sheekeeyo, aan "hooyo macaan" ku idhaa. Laakiin wakhti ayaan jirin. Waan ordayaa intaa, way i daba ordaysaa iyaduna. Waan u sheegay kun jeer in ay iska nasato. In aad hooyadaa ku tidhaahdo "ha iga werwerin" waa nin badweynta yidhi waan dhurayaa. Way igu daba go'day. "Inankaaga tiiri" ayay is leedahay. "Wuu da' yar yahay ee yaanu xilka ku khashifmin" ayay is leedahay. Intii ay hooyo wiilkeeda weydiin lahayd ayay i weydiisaa. Intii ay hooyo wiilkeeda oo madaxweyne ah odhan lahaydna way i tidhaa. Subax kasta marka ay soo kacdo farxad ayay iga la hor timaaddaa. Habeenkii inta aan imanayo ayay sugtaa. Inta aan maqanahayna si qarsoodi ah ayay xoghayntayda iiga waraysataa. Waan la socdaa, waxba se ma idhaa.

Maalmaha ayaa gurmaya, maalintii cayinnayd ayaa soo dhow. Warqad dheer oo aan gudbin doono ayaan sii qoray. Aniga iyo jacaylkaygii in aannu isku soo fakanno, warqaddaas ayaa iga xigta. Wax baan se ilduufayaa. Hooyaday macaan.

Saddex cisho ayaa ka dhiman, dhowrkii maalmood ee u dambeeyeyna maan seexan. Sideen hooyaday ugu sheegaa go'aanka aan

gaadhay? In la fikiro ayaan maskaxda wareejiyey. Qalfoof ruuxdii ka maqan tahay ayaan noqday. Waxa aan aad u rabaa in aan Indhadeeq nolosha la qaybsado. Waxa kale oo aan rabaa in ay taasi suurto gasho hooyaday oo faraxsan. Dhowr jeer ayay igu tidhi "hooyo haddii uu aabbahaa joogi lahaa wuu kugu farxi lahaa". Maalintii u dambeysay waxaan ku idhi "hooyo haddii uu joogi lahaa, isagaa madaxweyne ahaan lahaa, anna xor ayaan ahaan lahaa". Mooyi in ay fahantay waxaan ka wado. Mid ayaan se hubaa, in ay ka xumaan doonto haddii ay go'aankayga ogaato. Xumaansho keli ah maaha, waxaan ka baqayaa in wadnuhu istaago. Xilkan iyada ayaaba iga jecel. Waa riyadii aabbahay, waxay rabtaa in aan u rumeeyo. Balse aniga riyadayda yaa wax iga weydiiyey? Aniga yaa tayda ii rumaynaya? Ma noloshi aabbahay ayaan noolaadaa, deedna iska dhintaa hadhowna? Haddana nafta ayaan u diidaa in ay sidaa u fikirto. "Maxaad igu diideysaa" ayay i tidhaa. Jawaab ayaan u waayaa.

Berri bishu waa 21. Xafiiskan naxariistu ku yar tahay, saacaddiisan gidaarka soo sudhani waxay sheegaysaa 02:49 pm. Maxay wax u soo joogtay. Maxay sir haysaa. Waan la waraysane, iyada ayaa iga waayo-aragsan.

Dhowr habeen oo hurdo-la'aan ah ayay indhuhu ila ololayaan. Qalbi sidii uu u

ilmeynayey gudhay ayaa iga dhex laallaada. Farxadda Indhadeeq iyo murugada hooyo ayaa ii siman. Farxaddayda iyo qalbi-jabka hooyo ayaa isku xidhan. Ilaahayoow adaa weyn! Maxaa baas ee isku beegay. Labada farxadood miyaanan wada heli karin? Hooyaday oo mashxaradaysa miyaanan Indhadeeq kelyaha qaban karin? Qof imika uun damac yeeshay ayaan ahay. Nolosha waxba ka maan arag. Maxay tahay waxan i helay? Waxaan sawirtay hooyo oo aan ka tegay, hooyo oo aan u sheegay go'aankayga. Malaayiinka codkooda i siiyey ka maan fikirin. Iyagu ma waayayaan cid hoggaamisa. Waxa iga la weyn hooyaday dareenkeeda. Haddana waxaan sawirtay aniga oo go'aan kale u sheegay Indhadeeq. Qalbigaada jabaya ayaan qacdiisa dhegeystay. Aniga oo ku idhi "rejo ayaa jirta", in aan haddana maanta wax kale u sheego ma karayo. Haddana sidan ku ma sii jiri karo. Waa in aan dhinac uun u go'aa. Waa in aan nin iska dhigaa. Raggu go'aanka sow may qaadan jirin? Maxaa aniga igu adkeeyey? Muddo ayaan ku soo jiray meel dhexe oo aan cagba meel kula jiray. Maanta waa in aan dhinac uun raacaa. Waxa aan hubaa haddii aan is-casilaadda ka noqdo, in ay hooyo farxad ku noolaan doonto. Indhadeeqna noqon doonto qof baabuur jiidhay oo aan sideedii hore ahayn. Haddii aan iyada raacana ay hooyo si kale noqon doonto. Si kasta oo aan

farxad u helana, aan mar kasta hooyaday xasuusan doono, taasina murugo igu abuuri doonto. Labada jeerba in aan anigu ciishoon doono ayaa ii caddaatay. Haddana waxa aan ku qasbanahay in aan go'aan gaadho. Haddii aan waalan karayo, maryahaan dhigan lahaa maanta. Waa iyada oo lagu yidhi labadaada gacmood midkee la gooyaa, iyagoo caafimaad qaba. Miyaan la iska dayn karin labadaba? Jawaabtu waa "maya". Amma Indhadeeq la cawee, hooyana ha silicdo. Amma hooyo raac, Indhadeeq iyo adiguna silca. Waa run oo ma rabo in ay hooyo dhib mudato. Anigu si uun baan u maarayn xanuunkayga, laakiin ma rabo in ay Indhadeeq dartay u dhibaatooto. Saacaddii oo i soo eegaysay ayaa haatan sheegaysa 04:12 pm. Anna sidii aan u fadhiyey weli iska maan dhaqaajin. Waa in aan Indhadeeq go'aankayga u sheegaa. Waa in aan waco. Waan galiiray. Tilifoonka ayaan ku hagaagi waayey. Qiyaastii wakhtigaa way i sugaysaa. Way sii faraxsan tahay. Rejo aan geliyey ayay huwan tahay. Haddii aan waco, waxa hubaal ah in uu hadalku iga kala yaaci doono. Maaha go'aan aad hadal kaga bogan karto. Warqad ma qoraa? Warqad ayaan qoray. Sidan ayaan ku bilaabay:

"Fadlan huuno akhri warqadda oo dhan."

Noloshayda intii aad ku jirtay, waxa ay ahayd intii aan ugu farxadda badnaa. Wallaahi in aanan weligey sidaas oo kale qof u jeclaan. Waxa aad noqotay qofka markasta oo aan codkeeda maqlo, aan qoslo. Dhanka kale marka la eego, wiigaggii ugu dambeeyey waxay ahaayeen kuwii noloshayda ugu adkaa. Si kasta oo aan u dhigo, wax aan go'aansado ayaan garan waayey. Ma naftayda ayaan ka farxiyaa? Ma sida ay naftaydu jeceshahay ayaan sameeyaa oo Indhadeeq ayaan nolosha la qaybsadaa? Mar kasta 'haa' ayaan kaga jawaabayey. Waayo waan ku jecelahay. Weligeyna waan ku jeclaan doonaa. Haddana waxa dhinaca kale aan ka fikirayaa hooyo. In aan anigu farxaddayda ka fikiro iyo in aan farxaddeeda ka fikiro ayaa ii siman. Mar kasta oo aan shaqada ku jiro, way i waraysataa. Way igu dhegtaa. 'Hooyo shaqadu siday tahay? Berri ha shaqaynin ee iska naso'. Indhaheeda ayaan eegaa markaasaan idhaa 'miyaan ka tagaa?'. Ma rabo in ay murugo ku noolaato. Ma rabo in ay inankeeda weydo. Ma rabo in ay weydo wiil ay eegato. Ma rabo in ay weydo wiilkeeda ay u sheekeyso. Aabbahay ayay weyday, ma rabo in ay anigana i weydo. Waayo waan xasuustaa sidii ay dareemaysay markii uu aabbo dhintay. Waan garanayaa xanuunka ay leedahay laba is jecel oo

kala dhintay. In aan danayste noqdo oo aan farxaddayda ka fikiro, iyo in aan farxaddeeda ka fikiro ayay noqotay. Waxaan diyaar u ahay in aan anigu is dulmiyo, in aan anigu farxaddayda lumiyo si ay iyadu u qososho. Haddana xanuunka i haya marka aan warqaddan qorayo, wallaahi ma malaynaysid. Sidii ilmo yar ayaan ilmaynayaa. Erey kasta oo aan qorayaa wuu i dhibayaa. Waayo wuxuu ka dhigan yahay in aan ka fogaanayo qofka aan adduunka ugu jecelahay ee Indhadeeq. Laakiin waxa aan aad uga sii xumahay, in aan si xun ku dareensiinayo hadda. Waxa werwer badan igu haya qalbigaaga iyo xanuunka haya. Waan kaa raalligelinayaa. Wax aan ku idhaahdo ma garanayo huuno, laakiin fadlan xaaladdayda fahan. Oo fadlan i saamax. Waan ku baryayaa ee ha ii cadhoon. Waan kuu duceeyey huuno. Ilaahay meel roon ha ku mariyo. Anna murugo aan dhammaanayn ayaan la noolaan doonaa. Waayo ma garanayo si aan noqon doono la'aantaa. I love you and I am sorry.”

9 MA KAA DHAB BAA?

Waan ku qasbanaa. Xummaddiina way iga go'day. Fikir ay maskaxdu si joogto ah u wadday maalmihii u dambeeyey, ayaa iga joogsaday. Waan nafisay. Khalad ha ii fahmin; ku maan nafisin go'aanka aan gaadhay noociisa, waxaan ku nafisay in aan go'aan uun gaadhay. Maskaxda ayaa markiiba wareeggii joojisay. Biyaha ayaa iga degay markii u horreysay. Qalbiga tiisu waa sheeko kale. Farriin kale ayaan ka daba geeyey, waxaan u qoray "Indhadeeq, fadlan huuno akhriso warqadda aan kuu soo diray". Maalmahaas maannu wada hadlin, xaggii aan ka salaami lahaa ayaan farriin noocaas ah u qoray. Kolley in ay wax qaldan yihiin way fahantay markiiba. Madfac aan garan karo burburka uu geysan karo, ayaan ku qasbanaaday in aan jeexaygii ku rido. "Waan akhriyey, waan fahmayaa xaaladda. Faysaloow waan ku faraxsanahay wakhtigii aynu is naqaannay". Intaas ayaan ka helay dhankeeda. Bes. Waa ereyo kooban, siina ballaadha kolba inta aan u fiirsado. Faraha qoray iyo dhiigga dhex yaacayey ayaan garan karaa xaraaraddiisa. Intaa marka ay qortay ee ay telefoonka hoos u dhigtay ayaan garan karaa sidii ay jidhka isu gelisay. Ilaahayoow culayska i saarani weynaa! Adiga ayaa fududeeyee ii fududee. Laba aan la kala

dooran ayaa la i kala dooran siiyey. Xafiiskii ayaan ruux madhan la dhex tegay. Heshiisyadii qabyada ahaa ayay naftu i tustay. Waxa igu jirta tamar u baahan in la jiheeyo. Dhanka shaqada ayaan ku jeediyey. Hurdadii ayaan ka maarmay. Hawl ayaan u guntaday. Faylal dhasaystay ayaan boodhka ka tumay. Shaqo aan beri hore faraha ka qaaday ayaan dib u bilaabay. Wasiir kasta iyo wasaarad kasta faylkeeda ayaan dib u eegay. Waa la iga faa'iideystay intii aan dawakhsanaa. Waan ka daba tegay dhammaantood. Shaqaalihii ayaan si guud u shiriyey, haddana si gaar ah ayaan shakhsi kasta u la kulmay. Waan gilgilay. Dabeecadda ayaa iga xumaatay. Wixii ugu weynaa ee aan dhowranayey ayaan waayey, maxaa kale ee aan waayi karaa? Waxba! Cidna u maan jixin-jixin. Xukuumad wahab saarnaa ayaa toostay. Xafiisyo aan furnaan jirin ayaa illaa fiidka shaqeeya. Heshiiskii Qoolleyda ayaan dedejiyey, deedna dhaqangeliyey.

Ilaahay, sida loo shaqeeyo wuu baray nimankaa. Markiiba jidadkii ayay bilaabeen. Shaqooyin badan ayaa soo baxay. Dhaqaalihii ayaa mar keli ah cirka isku shareeray. Arrintani waxa ay keentay in dalal kale tartan soo galaan. 23 heshiis oo dalka faa'iido u ah ayaan markiiba saxeexay. 15 ka mid ah ayaa bil gudaheedku bilaabmay. Mashruuc beeraha ah ayaa markiiba miyiga ka bilaabmay. Mid garab socda oo biyaha

ah ayaa ku lammaan. Dalkii ayaa mar keli ah hore u dhaqaaqay. Aniga ayaa halkaygii ka hooseeya. Maalinba maalinta ka dambaysa, waan sii xumaanayaa. Maan moodeyn in ay murugo ii dhiman tahay, balse imika uun bay bilaabantay. Ma aha qof aan ka maarmi karo, runtaa fiicane. Hadda se meel aan ka soo noqdaa ma jirto. Mar kasta oo uu dalku sii horumaro, niyad-jabkayga ayaa sii kordhayey. Ma garanayo wax isku xidhay. Dalka ayuun baa noqday qof qayrkay ah oo hore u socda, anna hoos uun baan isu eegaa. Waxaan is odhanayaa uun "maxaa kaaga shan iyo toban ah dalkan?". Is ma ogi, laakiin waan dhaawacanahay. Inta aan sidan ahay, qalbigaygii aan warqadda u dirayna meel cidlo ah ayay keligeed rafanaysaa. Waan dareemayaa. Hadalka ay odhan doonto ayaan afka ugu sii ridi jirey. Fikirka ay rogrogayso ayaan u sheegi jirey. Hal qof oo la kala jeexay ayaannu ahayn. Laba dabeecadood oo is helay ayaannu lahayn. Ilaahay ayaan ku dhaartaye, weligey maan arag qof iyada igaga habboon. Laba nafood oo la isu abuuray ayaa nagu jira. In qaddarkoodu kala baydhi doono, ayaanan ogeyn.

Maalintii aan warqadda u qoray, ayuu xidhiidhkayagu go'ay. Dusha ayaan maalin kasta ka eegaa in ay nabad qabto. Waan qiyaastaa xaaladdeeda. Haddana dembiile ayaan dareemaa

in aan ahay. Waxa aan dusha saartaa dhaawaca gaadhay. Dhan marka la eegana, aniga ayaa ka mas'uul ah. La'aantay, xanuunkan may dareenteen. Xanuunka aan dareemayo, ayaan mid kale sii dul saaraa. Waxa aan is idhi ka war doon. Haddana waxa aan is idhi "ma habboona". Qof adiga dartaa sidaa u silcaysa, sideed haddana aayar "iska warran?" u odhan kartaa? Way ii cuntami weyday. Waxa aan qiyaastay in ay imika dadka iigu neceb tahay, haddii aan xidhiidh la sameeyana ay i sii fogeyn doonto. Waan gaabsaday. Waxa ay ahayd qofka keli ah ee aan u sheegi jirey, amma la socotay dareenkayga. Mar kasta oo aan culays la kulmana, iyada ayaa i dejin jirtey. Waxa ay ahayd qofkii iga soo saartay murugadii geeridii aabbo. Iyada ayaan wax kasta ku qarsan jirey. Maanta oo aan ugu baahi badanahay, la ma hadli karo. Cid aan ku nafiso ma haysto. Hooyaday ma odhan karo ina Cali Shaandho ayaan rabaa. Muxiyaddiin oo iigu dhow ma aammini karo. Iyadiina aniga ayaa iska fogeeyey. Qof aad fasaxday u ma sheegi kartid murugadaada. Qof gudihiisa la qasay ayaan noqday, daboolna la saaray. Haddii aan cid uun u sheegi lahaa, waan nafisi lahaa. Cid i waraysata ayaan waayey. Keligey ayaan noqday. In aan qarxo ayaan in yar u jiraa. Qolof meelaha wareegta ayaan noqday. Qalfoof dadku

madaxweyne u haystaan ayaan ahay. In uu madaxweynaha xar galay, yaa u sheega? Guntu in ay madhan tahay, yaa u sheega? Kor ayay ii eegayaan. Kuraasta ayaa la iiga kacayaa. Meel kasta oo aan tago, waa la ii sacabbinayaa. Saxaafadda ammaantayda ayaa ka socota. Waxa aan noqday qof muddo kooban ku qabtay wax aan weligii la qaban. Halka u saraysa ee qof madax ay la gaadhsiiyo, ayaa la ii la baxay. Aniga ii ma dhadhamayso. Waxaas oo dhan waxa ka muhiimsan habeen ay Indhadeeq i la hadasho. Imika oo sidaa la ii jecel yahay, haddii ay ooridayda ahaan lahayd ka warran? Qof janno adduun loo dhammeeyey ayaan ahaan lahaa. Waxaan is leeyahay, sujuudda dhulka ka maad qaaddeen.

Maalmaha aannu sii kala maqan nahay ayaa sii kordhaya. Iftiinkii gudahayga ka baxayey ayaa isna sii damaya. Haddii aan farxad haysan jirey, imika iyada ayaa qaadatay. Qof hadal gaaban ayaan noqday. Marka su'aal la i weydiiyo, waan soo koobaa. Hadalkii ayaan nacay. Cidhiidhi ayaan dareemay. Nolosha ayaan nacay, haa, gebigeedaba. Sidan in aan ku noolaado, guuldarro ayaan u arkaa.

Hooyo ayaan eegaa, way faraxsan tahay. Inankeedii oo dalka heer gaadhsiiyey ayay arkaysaa. In uu isagu kala daadsan yahay ma

dareemayso. In aan maalinba in yar dhimanayo ma oga. Hooyaday macaan way faraxsan tahay. Inankeedii macaan wuu liitaa. Dhoollacaddayntiisa beenta ah ayay run moodaysaa. Hilbahan ay arkayso in ay naf ka hoosayso ayay moodaysaa. In aan halkii ugu hoosaysay joogo, goormay ogaan? Miyaan se rabaa in ay ogaato?

Waxa aan gaadhay heer aan caafimaadka u wanaagsanayn. Maalin kasta maaha, habeen kasta amma subax kasta maaha, daqiiqad kasta madaxayga ayay ku jirtaa. Haddii aan idhaa ilbidhiqsi kasta, been ayaan sheegayaa. Waxaan se hubaa in aan daqiiqaddiiba ugu yaraan mar iyada ku fikirayo. Maskaxda gebigeediiba iyada ayaa la wareegtay. Weligey wax noocan ah ma arag. Waxa aan ahaa qof keligii socda, qof aan u haysan in ay suurto gal tahay in cid kale lagu tiirsanaado. Maantana naftaydii ayaa la yeeshay. Wax kasta oo aan qabanayo, iyada oo ila joogta ayaan sawiranayaa. Haddii aan safar u baxayo, way ila socotaa. Marka aan keligey fadhiyo, way i ag fadhidaa. Waan u sheekaynayaa, way i dhegeysanaysaa. Waan ka qoslinayaa, waan maqlayaa. Tallaabbo kasta oo aan qaado, teediina waan u qaadayaa. Wax yari haddii ay igu soo kordhaan, waan u sheegayaa. Wixii cusub waan la socodsiinayaa. Is ma hayn karayo. Meel qurux badan marka aan arko, iyada ayaan

dhax dhigayaa. Xan marka ay i qabato, iyada ayaan u sheegayaa. Marka u dambeysa ayaan ogaadaa in ay keligeys igu eeg tahay. Markaas ayaan sii burburaa. Kun jeer ayaan dhintaa. Sidaas ayaan muddo dheer ahaa. Waanan ka sii darayaa.

Weli xidhiidh la maan samayn, laakiin taasi maanta ayay is beddeli doontaa. Laba bilood ayaa ka soo wareegtay maalintii aan warqadda xun qoray. Baabuur aan ka bilic roonayn baabuurta magaalada, ayaa madaxtooyada ii dhax yaalla. Kaas ayaan kaxaystaa keligeys marka aan laydh u baahdo. Sidii caadiga ahayd ayaan foofsanahay. Waa galab ay qorraxdu weli kulushahay. Buur yar oo magaalada ka baxsan ayaan ka soo socdaa. Sidii qasabad jabtay, aniga oo aan filayn, ayuu dareen aan qarinqayey xadhdhaha soo goostay. Intii hore oo dhan waan fikiri jirey. Maanta indhaha ayaan biyo ka keenay. Waan is hayn kari waayey. May ahayn wax aan maammuli karo. Isku celi ayaan is idhi. Waan ka sii daray. Naqaska ayaan isku celiyey. Laabta ayaa i ruxantay. Xoog ayuu igu soo dhaafay. Ciil ayaan la ooyey. Soddon daqiiqo ayaa iiga hadhay inta aan madaxtooyada gaadhayo, soddonkaba si xidhiidh ah ayaan u ooyayey. Ma garanayo meel ay ku qarsoonayd. Wuxuun baa la i tusay rejo-xumada, xaaladda aan ku jiro, iyo wakhtiga soconaya. Waxa ii

sawirantay aniga oo sidaa ku gaboobay, dibna u soo milicsanaya nolol bilaa farxad ah, sidaana ku dhimanaya. Nolol bilaa Indhadeeq ah. Runtu markay doonto ku dhirbaaxi ogaa. Iyada oo aan ooridayda noqon, ma rabo in aan dunidan ka tago. Maxaan se sameeyaa?

Wax yar marka aan u jiro dhismihii dalka looga talinayey, ayuu telefoonku yeedhay. Cod gaar ah ayaa farriimaheeda iigu xidhan. Jabaq ayuu sameeyey, jabaq mar keli ah i soo jeedisay. Shib ayaan idhi. Hoos ayaan u eegay. Faraha ayaan la boobay. Waa Indhadeeq lafteedii. Waan furay.

- Maaddaama oo aad iga soo war dooni weyday, anigaa kaa fiicnaane, iska warran?

Nacas keli ah ku maan sifoobin, fulayna waan noqday. Inta aan farxay in le'eg ayaan naxay. Waa runteed. Jawaabta aan u hayo qoraal ku ma soo koobi karo, haddana waan isku dayey.

- Wallaahi Indhadeeqeey in aanan ku illoobin, imika oo u dambeysay ayaan saacad ku dhowaad cidlo ka barooranayey. Waan ku tebay.
- Ok, sideed tahay?

Waxa aan dareemay in ay ka boodayso ereyada dareenka wata. Waxa kale oo aan dhadhansaday in aanay i rumaysnayn. Waxa aan

fahmay in ay wax badan tirsanayso, laakiin aanay hadda diyaar u ahayn in ay ka hadasho. Sida aan u tebay ayaan ugu celceliyey. Shaqada ayay iga waraysataa. Waxay u eeg tahay qof soo kabatay. Waxa aan dareemayaa in ay iga fogaatay. In ay heshay hab ay nolosha u maarayso. Taasina waxay i dareensiisaa fogaansho xanuun badan. Keligey in aan sidan dareemayo ayaan ogaaday, waanan ka damqaday. Nasakh ayaan isu la eekaaday. In ay ila yaabban tahay ayaan sawirtay. In ay is leedahay "haddii uu sidan dareemayo, muxuu warqadda kuugu soo diray? Markee ayuu waalan yahay?". Indhadeeqi waxay ahayd qofka iigu dhow aadamaha dunidan, waxaan is leeyahay way fahmi doontaa. Illeyn Faysalkeedii ayaad tahaye, qalbigeedu muu qallalin.

Marka aan ogaaday halka ay taagan tahay, waxa aan joojiyey ereyadii dareenka watey. Ma rabo in ay iga sasto oo ay xidhiidhkan yar iga goosato. Si caadi ah ayaan isku qasbaa in aan u la hadlo. Dad aan is aqoon, waxyaabaha ay iska waraystaan, ayaannu is weydiinnaa. Waan is cabbudhiyey. Sidaas ayay muddo ku socotay, illaa aan is hayn kari waayey.

Awal hore, marka aan farriin u diro, markaba jawaab degdeg ah ayaan ka heli jirey. Imika iyadu taydii maaha, ka mana rajaynayo tii oo kale, haddana way i dhibaysaa in ay jawaabta la

daahdo. Beerka ayaa la iga dhex qaadayaa marka ay hore u soo jawaabi weydo. Sidii wax waalan ayaan noqonayaa. Telefoonka yar ee aan iyada oo keli ah u haysto ayaan ku khalkhalayaa. Ma hawadaa xun. May, iyada ayaan weli soo jawaabin. Maskaxda caafimaad qabtaa, waxay og tahay in ay mashquulsan tahay. Maskaxda aniga igu jirtaa, raadkeeda ayay baacsanaysaa. Aniga ayay i sii waalaysaa. ”Indhadeeq hadalkaaga ma rabto, iska daa. Maxaad u wareerinaysaa. Waxan aad ka hadlayso way ka gudubtay, qoraalkaagu xiiso ma leh”. Anna waan rumaysanayaa. Haddana marka ay ii soo jawaabto, ee weliba ay si waafi ah ii la hadasho, ayaan qaboobayaa.

- Indhadeeq waan ku tebay, ayaan u qoray.
- Faysal maxaan sameeyaa, ayay ii soo qortay.
- Waxba huuno, waan ku tebay uun. Sidii aynu ahayn ayaan tebay.
- Maalintii aad warqadda ii soo qortay ayaad i fogeysay.

Qalbigaa qurubyo i noqday.

- Wallaahi Faysaloow imika marka aan wax kuu soo qorayo ayaan ilmaynayaa. Maalintii aad go’aanka gaadhay sidaan noqday ma malayn kartid. Dhowr maalmood ayaan habeen iyo maalin ooyayey.
 - Sorry huuno wallaahi.
-

- Markii dambe Ilaahay ayaan isku xidhay. Isaga ayaan weydiistay in uu qalbigayga waxan ka saaro.
- Imika markaa sideed tahay?
- Imika waan fiicanahay, alx.
- Huuno wallaahi sida aan uga shalleeyey go'aan-ku-sheeggaa xun ma malayn kartid. Go'aan muu ahayn. Haddii aan xilka ka tegi lahaana, aniga oo hooyaday ka murugaysan ayuun baan ku la joogi lahaa. Waan ku qasbanaa.
- Adigu sideed tahay?
- Aniga, anigu halka aan joogo miyaad garanaysaa?
- Maya.
- Ma xasuusataa beri aynu sawiran jirnay innaga oo kolba waxyaabbo kala duwan wada qabanayna oo wada joogna.
- Haa.
- Halkii ayaan weli marayaa.
- Alla Ilaahayoow! Faysal waxaasi caadi maaha. Fadlan iska kay illow.

"Iska kay illow" markii aan akhriyey ayaan isku dhex daatay. Weedhu foolxumaa!

- Fadlan hore u soco oo iska kay illow, waayo kolleyba rejo ma jirto sow maaha?
- Marka ay wakhtigeeda gaadho ayaan isku dayi in aan sidaa sameeyo.

Waxa aan ka wareegayaa in aan qoro ereyga "illow".

- Faysaloow wakhtigeedii waa la dhaafay.
- Ax, xanuun kululaa ereyadaadu walaal.
- Lol miyaan kugu adkeeyey.
- Haa, ii khafiifi.
- Faysal, waad u baahan tahay in aad runta maqasho dee.
- Haaye laakiin waxa i dhibaya in aynu noqonnay sidii laba ajnabi ah oo kale.
- Dee waa qasab taasi Faysal, maxaan samayn lahaa, kolleyba sidii hore kuu ma noqon karo.
- Maya, anba ku ma lihi sidii hore ii noqo, yacnii.. mooyi wallaahi.
- Faysal, fadlan ii ballaan qaad in aad qalbiga iga jarayso.
- Waan kuu ballan qaadi doonaa haddii Alle yidhaa.
- Maalintii aad warqadda ii soo dirtay ayay ahayd in aad qalbiga iga jarto.
- Wallaahi ma malayn kartid warqaddaa yari inta ay noloshayda ka jartay. Weligey warqad aan qoro oo ka adag ma garanayo.
- Faysal, mid kalena waan kuu sheegayaa, noloshaydii waad ku ciyaartay.

Alla Ilaahay dhulka ku lama gooyo! Maxay tidhi? Wallaahi carrabka ayay candhuuftii ka

tahriibtay. Wax aan idhaa ayaan garan waayey. Waxay raacisay "laabtayda in aan ka dul qaado ayaan rabay intaana". Culays aanan qaadi karin ayay mar keli ah dusha igaga rogtay. Ku ma qaldana, way se igu culus tahay aniga. Wax aan qoro ayaan garan waayey.

- Indhadeeq, wallaahi waan ogahay in aan wax badan ku yeelay. Huuno wax walba oo dartay kuu soo gaadhay ka raalli noqo.
- Waa iska caadi.
- Sorry wallaahi. Wax aan qoro ma garanayo, waan khalkhalay.
- Ka raalli ahow wadnaha aan ku xanuuniyey adna. Oo fadlan jooji raallidan badan, ma tihid qof ajnabi ahe.

Sidaas ayaannu maalintaa ku kala tagtay. Horto waan nafisay, laakiin iyada ayaa inta badan nafistay. Dhib ma leh, wanaaggeedu waa kayga. Waan qabowsaday. Laakiin weedh ayaan ka gam'i waayey. "Noloshaydii waad ku ciyaartay". Qof aanan jeclayn in ay farxadda wax kale u weheliyaan, ayaan dhaawacay. Waan dareemayey in aan haamadda gooyey, balse marka ay iyadu ii sheegtay, culays kale ayay lahayd. Dhuunta ayuu ii mari waayey. Wuu se ku qasban yahay.

Tan iyo maalintii aan warqadda u diray, dareenka tebista ah, waxa ii wehelinayey dareen

kale. Walow aan maalmahaa u dambeeyey, intii aanan warqadda qorin kahor, si aad ah uga fikiray go'aanka, haddana dib-u-eegis ayaan ku sameeyey. Waxa aan in badan ka fikiray sida aan ahay. Sida aan noqday. Indhadeeq la'aanteed noloshaydu sida ay isu beddeshay. Waa run oo waan ogaa in aan tebi doono, balse in aan u waalan doono, maan ogeyn. Taasi waxay keentay in aan mar labaad ka fikiro go'aankii qasabka ahaa ee aan gaadhay. "Culayska intan le'eg, ma qasab baa in aan tunka ku qaato?" ayaan is weydiiyey. Kun jeer ayaan jawaabta ka dhigay "maya". Nolosha ayaan sawirtaa iyada oo igu la midowday. Si qurux badan annaga oo ubad u daadihinayna ayaan sawirtaa. Aniga oo si niyad ah u qoslaya ayaa i soo hor marta. Iyada oo kaftankayga dhegeysanaysa, goob cidlo ahna baabuur wadanna, ayaan is hor dhigaa. Markaas ayaan is idhaa "waa maxay micnaha noloshu, haddii aanad intaas samayn? Waa maxay sababta aad iyada la'aanteed u noolaan doontaa?". Aniga ayaa gar isu dhigta. Qaybta farxadda rabta ayaa mar kasta badisa. Waxa soo xoogaystay rabitaanka ah in aan Indhadeeq helo, qiimo kasta ha igu kacdee. Haaheey, Indhadeeq waa in ay taydii noqotaa. Wax kale waxba iga ma gelin. Wallee in aanan cid dambe u joojinayn. Hooyo odaygeedii way heshay, iyada oo ku faraxsan ayay guursatay aabbahay. Ilaahay

ayaa ka qaaday imika, balse nolol ay ku qanacsan tahay maanta, ayay la soo qaadatay. Markaa maxay tahay sababta aan anigu u heli waayey Indhadeeq? Ma qasab baa in aan dadka kale tixgeliyo, aniga oo naftayda cabbudhinaya? Waa maya. Waxa aan imika ogaaday xanuunka ay leedahay in aan Indhadeeq ka tago. Maaha xanuun aan qaddarkiisa garan karo. U malayn maayo in aan xanuunkan oo kale dareemi doono haddii aan iyada doorto maanta. Xanuunkan mid ka xumi ma jiro. Wallay ka tahay! Sidaa darteed waa in aan go'aan gaadhaa. Maaha in aan qalbiga uun ka sawirto nolol aan jirin, marka aan indhaha kala qaado. Go'aankiina waan gaadhay. Indhadeeq xaggeeda ayaan u dhaqaaqayaa. Maalintaa ay ila soo xidhiidhay, iyo maalintan dambe ee ay iiga sheekaysay xaalkeeda, labada maalmoodba go'aankaygu wuu ii dhammaa. Laakiin ma rabin in aan ku idhaa "waan kuu soo socdaa". Qof xanuunka aad gaadhsiisay kaaga sheekaynaya, ma odhan kartid "haddana waan kuu soo socdaaye i sug". Waxa aan u baahanahay laba bilood oo kale. Labadaa bilood waxa aan isku hagaajinayaa xaaladda dalka. Kaddibna waa iga go'aan in aan dhaqaaqiyo. Iyada ayaan si dadban u weydiiyey in ay rag kale la sheekaysato. Waxay iigu jawaabtay in ay imika xoogga saarayso

waxbarashada, ragna aanay wakhti u haynin. Farxad weynaa! Way isugu kay beegantay.

Diyaargarow ayaan bilaabay. Xadhkihiifurfurnaa oo dhan ayaan soo wada xidhay. Dhammaan wixii ka dayacnaa dalka ayaan bilaabay in aan hagaajiyo. Weli lexejeclo ayaa iga haysa, ma rabo in aan aayar uun iska dhaqaajiyo. Hawl qaadan doonta labadaa bilood ee aan sheegay, ayaan si dardar leh u bilaabay. Si fiican ayay iigu socotaa. Hoosta ayaan ka faraxsanahay. Iyada xidhiidh joogto ah, balse taxaddir miidhan ah, ayaa naga dhexeeya. Sidii dad walaalo ah ayaannu hadallada isu weydaarsanaynaa. Hadday ogaan lahayd waxa aan soo wado, way farxi lahayd. Kolleyba ma raagsanayso, waayo ma oga. Sidaas ayaana fiican. Iyada oo aan filayn ayuun baan u sheegayaa.

Qorsheyaal kala duwan ayaan bilaabay. Waxaan ka baaraandegay habka aan ugu tegayo. Ma iyada oo aan ogeyn ayaad halkaad joogto ugu tagtaa, mise waad u sheegtay hortoy? Fikirro noocaas ah ayaan rogrogayey. Waxa soo socda, maan ogeyn. Marka ay wax ii hagaagaanba, wax kale oo kala tuura ayuu Ilaahay keenaa.

Farriimihii caadiga ahaa ayay mararka qaarkood illowdaa in ay ka soo jawaabto. Dareenkii xumaa ayaa caloosha i qabta. Marka ay i xasuusan weydo ayaan maalin kaddib u

diraa farriin kale. Markaas ayay ii soo qortaa "walaal iga raalli ahow, waan iloobay". Anigaa halkaa is dhigay. Xaq ugu ma lihi in aan wax kale ku idhaa. Waan ku qasbanahay in aan iska daba socdo. Maalintii labaad ayay haddana illowday in ay farriintayda ka soo jawaabto. Qaar badan oo kale ayaan ka daba diray. Ma jirto. Subixii dambe ayaan u qoray "dee imika la isu ma soo jawaabayo". Si kaftan ah dabcan, balse wada run ah. Way ka naxday, waanay i raalli gelisay. Indhadeeq oo sidaas oo dhan u mashquulsan weligay ma arag. Dareen aan wacnayn ayaa caloosha i kala wareejiyey. Wax ayaan sawirtay. Waan is diidsiiyey.

Waa subax ay qorraxdu soo badh-jeeddo. Baabuurkaygii yaraa ayaan la baxay. Inta badan galabtii ayaan bixi jirey. Madixii ilaalada ayaan ku qanciye in aanan fogaaneyn. Waxaan oggolaaday in ay waxooga iga dambeeyaan oo ay dusha iga ilaaliyaan, maaddaama oo ay diideen in ay iga hadhaan. Farriintii kaftanka ahayd ayaan u diray aniga oo baabuurka wada. Markii ay ii soo jawaabtay ayaan u raaciyey "ma aroos baad ku mashquushay?". Su'aashu waxay ahayd "ma aroos qof qaraabada ah ayaad ku mashquushan tahay?". Jawaabteedii ayaa soo dhacday aniga oo aan u jeedin baabuurta iga horreysa.

- Haha waad garatay, aroos weeyaan. Yartaadii waa la soo doonayaa.
- Yartaydee? ayay naxdini iga keentay, aniga oo fahansan qofka ay ka hadlayso.
- Maxaad u jeeddaa? ayay ii soo qortay.

Miskiina, waxay moodaysaa in aan dafirayo iyada.

- Sowniga ku idhi yartaadii, ayay soo raacisay.

Alla naxdin weynaa! Maxay tidhi?

- Hee?
- Waa la i soo doonayaa.
- Nasiib xumiyaa.. waan garanayey. Indhadeeq, ma ku soo wici karaa?

Wax yar inta ay daahday, ayay ii soo qortay "haa".

Waxa codkeeda iigu dambeysay muddo aan yarayn. Maalintii ay igu lahayd "waxa aan u sii diyaargaroobayaa go'aankaaga". Faraha ayaa waxba qori kari waayey. Wixii aan noloshayda dhan ka baqayey ayaa dhacay. Rafaad aan moodayey in uu ii dhammaaday, ayaa hadda kowsaday. Baabuurka ayaan meel aan loogu talogelin ku duway. Aniga oo isku dhex yaacsan ayaan dhegeystan dhawaaqa uu telefoonku bixinayo. Waan raagsaday. Waxaan is idhi jar oo ku celi. Way iga qabatay. Si caadi ah ayay "hello" ii tidhi. "Indhadeeq, iska warran?" ayaan iska soo jaray aniga oo u qaadan la' in aan maanta

codkeedii maqlay. Way mashquulsanayd. In yar kaddib ayay bannaanka u baxday.

- Hey, ii warran? ayay i tidhi.

Ma war baa jira. Waxa aan ka naxay sida aanay ii fahmin iyo sida qabow ee ay iigu jawaabtay.

- Indhadeeq, miyaa lagu soo doonayaa.

- Haa, waa la-yaab sow maaha?

Ugu yaraan saddex jeer ayaan ku idhi "ma kaa dhab baa?". Waa ka dhab.

- Laakiin sowdigii igu yidhi "waxbarashada ayaan xoogga saarayaa".

- Haa, waan ogahay. Haddana inankan oo annu beri dhexdaa ahayd is barannay ayaa i guursanaya.

- Masha Allah, huuno wallaahi waan kuu soo ducaynayaa.

Intaa markii aan idhi ayuu naqasku isku kay taagay. Erey kale ayaa iga soo bixi waayey. Way shakiday.

- Faysal, miyuu kaa go'ay.

- May, ayaan dirqi ku soo rogay.

- Maad ooyaysaa?

Alla maxay ii weydiisay! Telefoonka ayaan afka ka fogeeyey, balse way i maqashay.

- Faysal, huuno ha ooyin.

- Jabtar dhan oo noloshayda ka mid ah ayaa soo xidhmay maanta. Rejadii ayaa halkaa igaga tagtay. Waan kuu

ducaynayaa huuno, waan kuu ducaynayaa. Farxadda ayaa u mihiimsan, Ilaahay farxad ha ku siiyo. Kuwii farxad ku wada noolaada Ilaahay ha idin ka dhigo.

- Faysal, laakiin waxaan rajaynayaa in uu xidhiidhkeennan walaaltinnimo sii jiro.
- Way adag tahay wallaahi, ayaan idhi anigoo naqaska kala googoynaya.
- Fadlan xidhiidhkeennani ha sii jiro.
- Way adag tahay, Indhadeeq. Qof la qabo ayaad noqonaysaa. Maxaan ku odhan doonaa? Qof dumar ah oo la qabo asxaab ma noqon kartaan.

Way aamustay. In yar kaddibna, anigoo u ducaynaya ayaannu kala tagnay. Telefoonkii ayaan hoos u dhigay. Baroor ayaan qabsaday. In badan waan soo ooyay, laakiin weligey sidan u ma qaylin. Habeenkii uu aabbahay dhintay, sidan maan noqon. Waan cabaaday. Cod dheer. Cod foolxun. Qiyaastii toban daqiiqo oo xidhiidh ah ayaan qaylinayey. Waan aamusi kari waayey. Oohinta aabbeheed ayaa yimid. Filimmada ayaan ka daawan jirey nin sidan u ooyaya, qiyaastii marka reerkiisa oo dhan la madhiyo. Waan ku qosli jirey. Wax dhaca u ma haysan. Nin weyn ayaa sidaa u jibaada, is maan lahayn. Illaa ay maanta aniga igu dhacday. Waa baroor jirta. Nolol aan dirqi isugu keenay ayaa

hortayda ku kala daadatay. Sawirro qurxoon oo aan sawirtay ayaa mar keli ah meesha ka baxay. In aan madhanahay ayaan dareemay. Nolol ay geeridu dhaanto ayaan dhex taaganahay. Guuldarrayste ayaan noqday. Khasaare ayaan ahay. Wixii ugu qaalisanaa noloshayda ayaan waayey. Qofkii aan noloshayda dhan udub-dhexaadka uga dhigay ayaan waayey. Noloshee ayaa micno ii samayn weyday. Ujeeddada aan madaxweynaha u ahay ayaan garan waayey. Haddana waan is canaantay. Diirka ayaan iska siibay. Qof aanan waxba u sheegin ayaan iska sahansaday. Qof aan fasaxay ayaan moodayey in ay meel ii fadhiyi doonto. Doqonsaniyaa. Nalkii ii baxayey ayaa iga damey. Nal nin kale u ifa ayay noqon doontaa. Nin kale oo ayna hore isu aqoon, ayaa iga xiga maanta. Nin aan aniga ahayn dhiniciisa, ayay ka soo toosi doontaa. Isaga ayay u sheekeyn doontaa, "xabiibi" ku odhan doontaa. Laakiin waa ereygaygii kaasi. Qof kale u ma adeegsan karto. Indhaha ayay ku eegi doontaa nin aan aniga ahayn, iyada oo qoslaysa. Laakiin indhahaasi waa kuwaygii, kelige ayay igu eegi jirtey. Aniga ayay iigu sanqan jirtey. Afkaa quruxda badan, magacayga ayaa ka soo bixi jirey. Imika magac kale ayay u adeegsan doontaa. Toloow magicii? Maxaa iiga dan ah. Siduu u eeg yahay? Ma rabo in aan ogaado.

Nolosha inteedii badnayd ayaa ii hadhay, waana inteedii ugu liidatay. Sideen sannaddadaa dhan u noolaan doonaa? Sideen berri u gaadhi doonaa. Wax noocan ah sidee looga kabtaa? Rejadu marka ay hallowdo, xaggee laga doonaa? Dhafoorrada ayaa i ololaya. Goor ay i qaboobina ma garanayo. Xumaa marka aad noloshaada ku xidho hal qof, waxa kale oo dhanna aad nacdo. Qofkii ayaa i daayey, wixii kale ee aan nacay ayaa i hor yaalla.

Waxa la-yaab leh, nolosha dadku waa sidoodii. Way soo toosayaan, shaqaysanayaan oo seexanayaan. Dad qoslaya ayaa i ag marmaraya. Kuwo kale ayaa cod dheer ku sheekeysanaya. Miyaan la ila murugoonayn? Dadku miyaanay arkayn waxa igu dhacay. Cid aan u sheego ma haysto. Qof aan garabkiisa ku ooyo ma haysto. Wehel kale ma lihi. Qof "iska aamus" igu yidhaahda ma haysto. Keligey ayaa isla dawakhay. Indhuhu way iska hoorayaan, aniga oo aan ogeyn. Illinta kulul ee dhabanka yaacaysa ayuun baan ku war helayaa. Waan masaxayaa. Inta aanan sacabka ka qaadin dhabanka, ayuu haddana qoyayaa. Wejigeyga oo caadi ah ayuun baa isku soo ururaya, sidii liin-dhanaan la tuujiyey. Sidaan caadi u ahay, ayuun baan foolxumaanayaa. Waan ciishoonayaa, cid aan eersadana ma hayo.

Qorraxdu hawsheeda ayay qabsanaysaa, maalmuhuna sidoodii ayay isugu xigaan. Dhowr maalmood markii aan aammusnaa, ayay iga soo war doonaysaa. "Faysal, huuno sideed tahay?". Naxariista ku ladhan su'aasha ayaa iga ilmaysiinaysa.

Qofkaygii waan waayey. Haddii Alle i daayana, nolol dheer ayaa ii hadhay. Wax igu dhici doona garan maayo. Sida aan caadi u ahay, ayuun baan iska ilmaynayaa. Aniga oo imika caadi ah, ayuun baan arkayaa wax i xasuusiya sheekadeedii. Markaasaan is beddelayaa. Murugo socota ayaan ahay. Wax weyn ayaa i gaadhay. Dhabarkaa i jaban. Cirkaa igu soo dumay. Indhadeeq waa la yeeshay, aniguna ajnabi ayaan agteeda ka noqon doonaa. Way i illoobi doontaa. Qof ay beri hore wada sheekeysan jireen, ayuun baan noqon doonaa. Sheekada na dhex martay, ayaa sidaa ku dhiman doonta. Annaga na dhaafi mayso. In aan dhaawacan ka bogsan doonana ma sugayo. Nafta ayaan rabaa in ay iskeed u barato noolaanshaha nolol bilaa Indhadeeq ah. Noloshu haddii ay badweyn tahay, laash yar oo badhtankeeda sabbaynaya ayaan ahaan doonaa. Wax ficil ah ku darsan maayo. Dhanka ay ii kaxayso ayuun baan u raaci. Waayo kolleyba dhinac kan ka xun ma arko. Inta ay iyadu ubad aan kuwayga ahayn ifka keenayso, ee ay

korinayso, ee ay gaboobayso, anigu waan iska jiri doonaa. Waan iska ahaan doonaa. Haddii dib wakhtiga loo celin lahaa, maalintii xilkii uu aabbo ka dhintay aan oggolaaday ayaan diidi lahaa. Taas waxaan samayn doonaa, maalinta dib fursaddaas la ii siiyo. Inta ka horreysa, dushaan ka daawan doonaa. Haddii aan sidaa ku dhintana, aakhiraan u shaqaysan, si aan Ilaahay Indhadeeq u weydiisto, markaan jannada galo.